

प्रकाशक :

अखिल भारतीय सुधर्म जैन संस्कृति रक्षक संघ

जोधपुर



शाखा कार्यालय

नेहरू गेट बाहर, ब्यावर (राजस्थान)

☎ : (01462) 251216, 257699, 250328

चन्द्रप्रज्ञप्ति सूर्यप्रज्ञप्ति शूत्र

(शुद्ध मूल पाठ, कठिन शब्दार्थ, भावार्थ एवं विवेचन सहित)

आवरण सौजन्य

विद्या बाल मंडली सोसायटी, मेरठ

श्री अखिल भारतीय सुधर्म जैन संस्कृति रक्षक संघ साहित्य रत्न माला का १३३ वां रत्न

चन्द्रप्रज्ञप्ति सूत्र सूर्यप्रज्ञप्ति सूत्र

सम्पादक

नेमीचन्द बांठिया
पारसमल चण्डालिया

प्रकाशक

श्री अखिल भारतीय सुधर्म जैन संस्कृति रक्षक संघ, जोधपुर
शाखा-बेहरू गेट बाहर, ब्यावर-305901



(01462) 251216, 257699 Fax No. 250328

द्रव्य सहायक

उदारमना श्रीमान् सेठ जशवंतलाल भाई शाह, बम्बई प्राप्ति स्थान

१. श्री अ. भा. सुधर्म जैन संस्कृति रक्षक संघ, सिटी पुलिस, जोधपुर 2626145
२. शाखा-अ. भा. सुधर्म जैन संस्कृति रक्षक संघ, नेहरू गेट बाहर, ब्यावर 251216
३. महाराष्ट्र शाखा-माणके कंपाउंड, दूसरी मंजिल आंबेडकर पुतले के बाजू में, मनमाड
४. श्री जशवन्तभाई शाह एदुन बिल्डिंग पहली धोबी तलावलेन पो० बाँ० नं० 2217, बम्बई-2
५. श्रीमान् हस्तीमल जी किशनलालजी जैन प्रीतिम हाऊस कॉ० सोसा० ब्लॉक बं० १०
स्टेट बैंक के सामने, मालेगांव (नासिक) 252097
६. श्री एच. आर. डोशी जी-३६ बस्ती नारनौल अजमेरी गेट, दिल्ली-६ 23233521
७. श्री अशोकजी एस. छाजेड़, १२१ महावीर क्लॉथ मार्केट, अहमदाबाद 5461234
८. श्री सुधर्म सेवा समिति भगवान् महावीर मार्ग, बुलडाणा
९. श्री श्रुतज्ञान स्वाध्याय समिति सांगानेरी गेट, भीलवाड़ा 236108
१०. श्री सुधर्म जैन आराधना भवन २४ ग्रीन पार्क कॉलोनी साउथ तुकोगंज, इन्दौर
११. श्री विद्या प्रकाशन मन्दिर, ट्रांसपोर्ट नगर, मेरठ (उ. प्र.)
१२. श्री अमरचन्दजी छाजेड़, १०३ वाल टेक्स रोड, चैन्नई 25357775
१३. श्री संतोषकुमार बोथरा वर्द्धमान स्वर्ण अलंकार ३६४, शॉपिंग सेन्टर, कोटा 2360950

मूल्य : २०-००

द्वितीय आवृत्ति

१०००

वीर संवत् २५३३

विक्रम संवत् २०६४

सितम्बर २००७

मुद्रक - स्वास्तिक प्रिन्टर्स प्रेम भवन हाथी भाटा, अजमेर 2423295

निवेदन

जैन आगम साहित्य गहन, गूढ़ एवं सूक्ष्म हैं इसमें आध्यात्मिकता की उत्कर्ष भूमिका तक पहुँचाने के साधनों का वर्णन मिलता है, तदनुसार इसकी विषय सामग्री भी विशाल एवं तलछट तक पहुँच कर विभिन्न तथ्यों को उजागर करने वाली है। इस रत्नाकर में अनेक प्रकार के रत्न समाहित हैं, जिसके तल को स्पर्श करने पर अनेक प्रकार के रत्न प्राप्त हो सकते हैं। इसमें जहाँ एक ओर जीव-अजीव, लोक-अलोक, आचार विचार और इससे सम्बन्ध रखने वाले पुण्य, पाप, आस्रव, बंध आदि के स्वरूप का निरूपण किया गया है, तो दूसरी ओर संसार के समस्त बन्धनों से मुक्त होने पर भी चिंतन किया गया है। इसके अलावा धर्मास्तिकाय आदि जैसे अरूपी लोक अलोक व्यापी द्रव्यों, ज्योतिष, भूगोल-खगोल-गणित आदि अनेक विषयों पर भी इस दर्शन में गहन चिंतन-मनन किया गया है। इस प्रकार संसार का ऐसा कोई भी तत्त्व नहीं जिसका निरूपण इस दर्शन में नहीं मिलता है। जहाँ तक इस दर्शन में निरूपित विषयों की प्रामाणिकता का प्रश्न है, वे सम्पूर्ण विषय सर्वज्ञ सर्वदर्शी तीर्थंकर प्रभु अथवा श्रुत केवली कथित हैं। श्रुतकेवली रचित आगम साहित्य भी उतना ही प्रामाणिक माना जाता जितना सर्वज्ञ कथित, क्योंकि श्रुतधर केवली अपनी कमनीय-कल्पना का संमिश्रण अपने आगम साहित्य में नहीं करते, वे तो केवल भाव को भाषा के परिधान में समलंकृत करते हैं। अत एव यह पूर्ण खातरी के साथ कहा जा सकता है कि जिन-जिन विषयों का इस दर्शन में प्रतिपादन हुआ है वह शतप्रतिशत प्रामाणिक ही है।

जैन आगम साहित्य का समय-समय पर विभिन्न रूप में वर्गीकरण हुआ है। सर्व प्रथम इसे अंग-प्रविष्ट और अंग-बाह्य के रूप में प्रतिष्ठापित किया गया। अंग-प्रविष्ट में उन आगमों को लिया गया, जिनका निर्यूहण गणधर भगवन्तों द्वारा किया है और अंग-बाह्य में स्थविर श्रुतकेवली रचित आगम साहित्य को। समवायांग और अनुयोग द्वार सूत्र में आगम साहित्य का केवल द्वादशांगी के रूप में निरूपण हुआ है। इसके अलावा आगम साहित्य का उसकी विषय सामग्री के अनुसार (द्रव्यानुयोग, चरणानुयोग, गणितानुयोग एवं धर्मकथानुयोग में) भी वर्गीकरण

हुआ है। सबसे अर्वाचीन रूप जो वर्तमान बत्तीस आगम साहित्य का है वह है - ग्यारह अंग, बारह उपांग, चार मूल, चार छेद और बत्तीसवाँ आवश्यक सूत्र।

प्रस्तुत चन्द्रप्रज्ञप्ति सूत्र और सूर्यप्रज्ञप्ति सूत्र छट्ठा एवं सातवाँ उपांग हैं। चन्द्रप्रज्ञप्ति सूत्र कालिक सूत्र है। इसमें २० प्राभृत हैं। इसका विषय गणितानुयोग है। सूर्यप्रज्ञप्ति सूत्र उत्कालिक सूत्र है। इसमें भी २० प्राभृत हैं। इन उपांगों में खगोल-गणित नक्षत्र, ज्योतिष आदि विषयों की मुख्य रूप से चर्चा हुई है। इन उपांगों के बारे में उल्लेख मिलता है कि निर्युक्तिकार श्री भद्रबाहु ने प्रथम बार निर्युक्ति की रचना की थी, किन्तु काल दोष से नष्ट हो जाने अथवा अन्य किसी कारण से उपलब्ध न होने पर आचार्य मलयगिरि ने इन पर टीका लिखी, उन्होंने अपनी टीका में लिखा है 'भद्रबाहुसूरिकृत निर्युक्ति के नष्ट हो जाने से मैं केवल मूल सूत्र की व्याख्या करूँगा।'

जैन आगम साहित्य में चन्द्र, सूर्य, नक्षत्र, ज्योतिष्कचक्र आदि का व्यवस्थित एवं विस्तृत वर्णन जैसा इन उपांगों में उपलब्ध है वैसा अन्यत्र कही नहीं है, बावजूद इसके इनका अध्ययन सामान्य पाठकों के लिए वर्जित है।

इनके अर्न्तगत जहाँ नक्षत्रों का वर्णन है वहाँ भोजन सम्बन्धी जो पाठ है, वे अमुक अभक्ष्य पदार्थों के भक्षण से सम्बन्ध रखने वाले हैं, जो भगवद् वाणी से कदापि मेल नहीं खाते हैं। वीतराग वाणी में इस प्रकार के अभक्ष्य के भक्षण रूप प्ररूपणा कदापि नहीं हो सकती है। अत एव सामान्य पाठक भ्रमित न हो, उनकी श्रद्धा डांवाडोल न हो। अत एव पूर्वाचार्यों ने उनके लिए इनके पढ़ने का निषेध किया है। मात्र बहुश्रुत गीतार्थ आगम के तलस्पर्शी ज्ञाताओं को ही इन्हें पढ़ने की आज्ञा दी, वे ही इन स्थलों का अपने विशिष्ट क्षयोपशम के अनुसार उचित, आगे पीछे का संदर्भ जोड़कर एवं अभक्ष्य पदार्थ का वनस्पति परक अर्थ संगत बिठा सकते हैं। यही कारण है कि इन दोनों सूत्रों का मूल पाठ ही संघ द्वारा प्रकाशित अनंगपविट्ट सुत्ताणि से यहाँ उद्धृत कर प्रकाशित करवाया जा रहा है।

चन्द्रप्रज्ञप्ति सूत्र के दसवें पाहुड (प्राभृत) के सतरहवें पाहुडपाहुड (प्रति प्राभृत) में नक्षत्र में क्या भोजन करना विषयक पाठ है। यहाँ- 'मंसं' शब्द आया है। इस विषयक पूज्य ज्ञानी गुरु भगवंतों से जानकारी प्राप्त हुई है कि पूज्य बहुश्रुत गीतार्थ पं. र. श्री समर्थमलजी म. सा. की धारणा इस प्रकार थी -

“इस पाठ के आगे ‘एगे एवमाइक्खंति वयं पुण एवं वयामो’ करके सूत्रकार का अपना मंतव्य दिखाने वाला पाठ कहीं छूट गया लगता है। सूत्रकार के किसी वचन में मांस भक्षण प्रेरक कोई मिथ्या उपदेश संभव नहीं है।”

निघण्टु आदि शब्दकोष में बहुत से मंस सूचक शब्दों के वनस्पति परक अर्थ किये हैं यहाँ भी उसी प्रकार का अर्थ संभव है। क्योंकि पंचेन्द्रिय घात और मांस का सेवन नरक गति में जाने का कारण होने से तीर्थंकर प्रभु ऐसी प्ररूपणा नहीं कर सकते हैं।

सूर्यप्रज्ञप्ति एवं चन्द्रप्रज्ञप्ति दोनों सूत्रों के पाठ कुछ श्लोकों के अलावा प्रायः समान है। इसका समाधान पूज्य स्वर्गीय गुरुदेव बहुश्रुत पण्डित समर्थमलजी म. सा. ने इस प्रकार फरमाया कि - जैसे सूर्यप्रज्ञप्ति की दो नकले पड़ी हों, उसमें से एकाध पाना चन्द्रप्रज्ञप्ति का शामिल हो गया हो, उस पत्रे को देख कर सूर्य प्रज्ञप्ति पर ही चन्द्र प्रज्ञप्ति नाम लगा दिया हो, फिर नकलें होकर प्रचलित हो गई हो। अथवा शास्त्र लिपिबद्ध करते समय इन दोनों सूत्रों को भिन्न-भिन्न साधु द्वारा लिपि बद्ध करते हुए एक तरफ एक सूत्र और दूसरी तरफ दूसरे सूत्र के बदले भ्रांति से उसी को लिपि बद्ध कर दिया हो अथवा दीमक आदि पाने को खा जाने से दूसरे सूत्र की भ्रांति में दूसरे का ही लगा दिया हो, इत्यादि कारण हो सकते हैं वस्तुतः यह विशेषज्ञों के खोज का विषय है।

इन सूत्रों में मंडल गति संख्या, सूर्य का तिर्यक् परिभ्रमण, प्रकाश्य क्षेत्र परिमाण, प्रकाश संस्थान, लेश्या प्रतिघात, ओजःसंस्थिति, सूर्यावरक उदय संस्थिति, पौरुषी छाया प्रमाण योगचररूप, संवत्सरों के आदि और अंत, संवत्सर के भेद, चन्द्र की वृद्धि अपवृद्धि, ज्योत्सना प्रमाण, शीघ्र गति निर्णय, ज्योत्सना लक्षण, च्यवन और उपपात, चन्द्रसूर्य आदि की ऊंचाई, उनका परिमाण, नक्षत्रों एवं अमुक नक्षत्र में अमुक भोजन ग्रहण करने आदि का अधिकार। इनकी रचना गद्य-पद्य दोनों के मिश्रण से हुई है। इनमें एक अध्ययन, २० प्राभृत और उपलब्ध मूल पाठ २२०० श्लोक परिणाम है।

संघ का आगम प्रकाशन का कार्य पूर्ण हो चुका है। इस आगम प्रकाशन के कार्य में **धर्म प्राण समाज रत्न तत्त्वज्ञ सुश्रावक श्री जशवंतलाल भाई शाह एवं श्राविका रत्न श्रीमती मंगला बहन शाह, बम्बई** की गहन रुचि है। आपकी भावना है कि संघ द्वारा जितने भी आगम प्रकाशित हुए हैं वे अर्द्ध मूल्य में ही बिक्री के लिए पाठकों को उपलब्ध हों। इसके लिए उन्होंने सम्पूर्ण आर्थिक सहयोग प्रदान करने की आज्ञा प्रदान की है। तदनुसार प्रस्तुत आगम पाठकों को उपलब्ध कराया जा रहा है, संघ एवं पाठक वर्ग आपके इस सहयोग के लिए आभारी हैं।

आदरणीय शाह साहब तत्त्वज्ञ एवं आगमों के अच्छे ज्ञाता हैं। आप का अधिकांश समय धर्म साधना आराधना में बीतता है। प्रसन्नता एवं गर्व तो इस बात का है कि आप स्वयं तो आगमों का पठन-पाठन करते ही हैं, पर आपके सम्पर्क में आने वाले चतुर्विध संघ के सदस्यों को भी आगम की वाचनादि देकर जिनशासन की खूब प्रभावना करते हैं। आज के इस हीयमान युग में आप जैसे तत्त्वज्ञ श्रावक रत्न का मिलना जिनशासन के लिए गौरव की बात है। आपकी धर्म सहायिका **श्रीमती मंगलाबहन शाह एवं पुत्र रत्न मयंकभाई शाह एवं श्रेयांसभाई शाह** भी आपके पद चिह्नों पर चलने वाले हैं। आप सभी को आगमों एवं थोकड़ों का गहन अभ्यास है। आपके धार्मिक जीवन को देख कर प्रमोद होता है। आप चिरायु हों एवं शासन की प्रभावना करते रहें। **चन्द्रप्रज्ञप्ति सूत्र सूर्यप्रज्ञप्ति सूत्र** की प्रथम आवृत्ति का प्रकाशन सितम्बर २००६ में हुआ था। जो अल्प समय में ही अप्राप्य हो गई। अब इसकी द्वितीय आवृत्ति का प्रकाशन शाह परिवार, मुम्बई की ओर से किया जा रहा है। जैसा कि पाठक बन्धुओं को मालूम ही है कि वर्तमान में कागज एवं मुद्रण सामग्री के मूल्य में काफी वृद्धि हो चुकी है। फिर भी श्रीमान् सेठ **जशवंतलाल भाई शाह, मुम्बई** के आर्थिक सहयोग से इसका मूल्य मात्र **रु. २०) बीस रुपया** ही रखा गया है जो कि वर्तमान् परिपेक्ष्य में ज्यादा नहीं है। पाठक बन्धु इस द्वितीय आवृत्ति का अधिक से अधिक लाभ उठाएंगे।

इसी शुभ भावना के साथ!

ब्यावर (राज.)

दिनांक: २०-६-२००७

संघ सेवक

नेमीचन्द बांठिया

अ. भा. सु. जैन सं. रक्षक संघ, जोधपुर

अस्वाध्याय

निम्नलिखित बत्तीस कारण टालकर स्वाध्याय करना चाहिये।

आकाश सम्बन्धी १० अस्वाध्याय

१. बड़ा तारा टूटे तो-
२. दिशा-दाह *
३. अकाल में मेघ गर्जना हो तो-
४. अकाल में बिजली चमके तो-
५. बिजली कड़के तो-
६. शुक्ल पक्ष की १, २, ३ की रात-
७. आकाश में यक्ष का चिह्न हो-
- ८-९. काली और सफेद धूंअर-
१०. आकाश मंडल धूलि से आच्छादित हो-

औदारिक सम्बन्धी १० अस्वाध्याय

११-१३. हड्डी, रक्त और मांस,

१४. अशुचि की दुर्गन्ध आवे या दिखाई दे-
१५. श्मशान भूमि-
१६. चन्द्र ग्रहण-

(चन्द्र ग्रहण जिस रात्रि में लगा हो उस रात्रि के प्रारम्भ से ही अस्वाध्याय गिनना चाहिये।)

१७. सूर्य ग्रहण-

(सूर्य ग्रहण जिस दिन में कभी भी लगे उस दिन के प्रारंभ से ही उसका अस्वाध्याय गिनना चाहिये।)

१८. राजा का अवसान होने पर,

१९. युद्ध स्थान के निकट

२०. उपाश्रय में पंचेन्द्रिय का शव पड़ा हो,

(सीमा तिर्यच पंचेन्द्रिय के लिए ६० हाथ, मनुष्य के लिए १०० हाथ। उपाश्रय बड़ा होने पर इतनी सीमा के बाद उपाश्रय में भी अस्वाध्याय नहीं होता। उपाश्रय की सीमा के बाहर हो तो यदि दुर्गन्ध न आवे या दिखाई न देवे तो अस्वाध्याय नहीं होता।)

२१-२४. आषाढ़, आश्विन, कार्तिक और चैत्र की पूर्णिमा दिन रात

२५-२८. इन पूर्णिमाओं के बाद की प्रतिपदा- दिन रात

२९-३२. प्रातः, मध्याह्न, संध्या और अर्द्ध रात्रि-

इन चार सन्धिकालों में-

१-१ मुहूर्त्त

उपरोक्त अस्वाध्याय को टालकर स्वाध्याय करना चाहिए। तुले मुंह नहीं बोलना तथा सामायिक, पौषध में दीपक के उजाले में नहीं बांचना चाहिए।

नोट - नक्षत्र २८ होते हैं उनमें से आर्द्रा नक्षत्र से स्वाति नक्षत्र तक नौ नक्षत्र वर्षा के गिने गये हैं। इनमें होने वाली मेघ की गर्जना और बिजली का चमकना स्वाभाविक है। अतः इसका अस्वाध्याय नहीं गिना गया है।

* आकाश में किसी दिशा में नगर जलने या अग्नि की लपटें उठने जैसा दिखाई दे और प्रकाश हो तथा नीचे अंधकार हो, वह दिशा-दाह है।

विषयानुक्रमणिका

चन्द्रप्रज्ञप्ति सूत्र

क्रं.	विषय	पृष्ठ
१.	पढमं पाहुडं	१-१५
१.	पढमस्स पाहुडस्स पढमं पाहुडपाहुडं	१-४
२.	पढमस्स पाहुडस्स बीयं पाहुडपाहुडं	४-५
३.	पढमस्स पाहुडस्स तइयं पाहुडपाहुडं	६
४.	पढमस्स पाहुडस्स चउत्थं पाहुडपाहुडं	६-८
५.	पढमस्स पाहुडस्स पंचमं पाहुडपाहुडं	९-१०
६.	पढमस्स पाहुडस्स छट्ठं पाहुडपाहुडं	१०-१२
७.	पढमस्स पाहुडस्स सत्तमं पाहुडपाहुडं	१२
८.	पढमस्स पाहुडस्स अट्ठमं पाहुडपाहुडं	१२-१५
२.	बीयं पाहुडं	१५-२०
१.	विइयस्स पाहुडस्स पढमं पाहुडपाहुडं	१५-१६
२.	विइयस्स पाहुडस्स विइयं पाहुडपाहुडं	१६-१७
३.	विइयस्स पाहुडस्स तइयं पाहुडपाहुडं	१७-२०
३.	तइयं पाहुडं	२०-२१
४.	चउत्थं पाहुडं	२१-२३
५.	पंचमं पाहुडं	२३-२४
६.	छट्ठं पाहुडं	२४-२६
७.	सत्तमं पाहुडं	२६
८.	अट्ठमं पाहुडं	२६-३०
९.	णवमं पाहुडं	३०-३३
१०.	दसमं पाहुडं	३३-५६
१.	दसमस्स पाहुडस्स पढमं पाहुडपाहुडं	३३
२.	दसमस्स पाहुडस्स विइयं पाहुडपाहुडं	३३-३५
३.	दसमस्स पाहुडस्स तइयं पाहुडपाहुडं	३५
४.	दसमस्स पाहुडस्स चउत्थं पाहुडपाहुडं	३५-३६
५.	दसमस्स पाहुडस्स पंचमं पाहुडपाहुडं	३७

क्र.	विषय	पृष्ठ
६.	दसमस्स पाहुडस्स छट्ठं पाहुडपाहुडं	३७-३९
७.	दसमस्स पाहुडस्स सत्तमं पाहुडपाहुडं	३९-४०
८.	दसमस्स पाहुडस्स अट्ठमं पाहुडपाहुडं	४०
९.	दसमस्स पाहुडस्स णवमं पाहुडपाहुडं	४०
१०.	दसमस्स पाहुडस्स दसमं पाहुडपाहुडं	४१-४२
११.	दसमस्स पाहुडस्स एक्कारसमं पाहुडपाहुडं	४२-४३
१२.	दसमस्स पाहुडस्स बारसमं पाहुडपाहुडं	४४
१३.	दसमस्स पाहुडस्स तेरसमं पाहुडपाहुडं	४४
१४.	दसमस्स पाहुडस्स चउद्दसमं पाहुडपाहुडं	४४
१५.	दसमस्स पाहुडस्स पण्णरसमं पाहुडपाहुडं	४५
१६.	दसमस्स पाहुडस्स सोलसं पाहुडपाहुडं	४५
१७.	दसमस्स पाहुडस्स सत्तरसमं पाहुडपाहुडं	४५-४६
१८.	दसमस्स पाहुडस्स अट्ठारसमं पाहुडपाहुडं	४६
१९.	दसमस्स पाहुडस्स एग्गुणवीसइमं पाहुडपाहुडं	४६
२०.	दसमस्स पाहुडस्स वीसइमं पाहुडपाहुडं	४७
२१.	दसमस्स पाहुडस्स एकवीसइमं पाहुडपाहुडं	४७-४९
२२.	दसमस्स पाहुडस्स बावीसइमं पाहुडपाहुडं	४९-५६
११.	एक्कारसमं पाहुडं	५६-५८
१२.	बारसमं पाहुडं	५८-६२
१३.	तेरसमं पाहुडं	६३-६५
१४.	चोद्दसमं पाहुडं	६५-६६
१५.	पण्णरसमं पाहुडं	६६-६८
१६.	सोलसमं पाहुडं	६९
१७.	सत्तरसमं पाहुडं	६९
१८.	अट्ठारसमं पाहुडं	६९-७३
१९.	एग्गुणवीसइमं पाहुडं	७४-८०
२०.	वीसइमं पाहुडं	८०-८५
सूर्यप्रज्ञप्ति सूत्र		
१.	१-२० पाहुडं	८६-८७

चंद्रपण्णत्ती

पढमं पाहुडं

जयइ णवणालिणकुवलयवियसियसयवत्तपत्तलदलच्छो । वीरो गयंदमयगलसललि-
यगयविक्रमो भयवं ॥ १ ॥ णमिऊण सुरअसुरगरुलभुयगपरिवंदिए गयविलेसे ।
अरिहे सिद्धायरिए उवज्झाय सव्वसाहू य ॥ २ ॥ फुडवियडपागडत्थं बुच्छं पुव्व-
सुयसारणीसंदं । सुहुमगणिणोवइडं जोइसगणरायपण्णत्तिं ॥ ३ ॥ णामेण इंदभूइत्ति
गोयमो वंदिऊण तिविहेणं । पुच्छइ जिणवरवसहं जोइसगणरायपण्णत्तिं ॥४॥ कइ
मंडलाइ वच्चइ १, तिरिच्छा किं च गच्छइ २ । ओभासइ केवइयं ३ सेयाई किं ते
संठिई ४ ॥ ५ ॥ कहिं पडिहया लेसा ५ कहिं ते ओयसंठिई ६ । के सूरियं वर-
यए ७ कहं ते उदयसंठिई ८ ॥ ६ ॥ कहं कट्ठा पोरिसिच्छाया ९ जोगे किं ते व
आहिए १० । किं ते संवच्छरेणाई ११, कइ संवच्छराइ य १२ ॥ ७ ॥ कहं चंद-
मसो बुद्धी १३, कया ते दोसिणा बहू १४ । केइ सिग्घगई बुत्ते १५, कहं दोसिण-
लक्खणं १६ ॥ ८ ॥ चयगोववाय १७ उच्चत्ते १८ सूरिया कइ आहिया १९ ।
अणुभावे के व संवुत्ते २०, एवमेयाइं वीसई ॥ ९ ॥ वड्ढोवड्ढी मुहुत्ताणं १, अद-
मंडलसंठिई २ । के ते चिण्णं परियरइ ३, अंतरं किं चरंति य ४ ॥१०॥ उग्गा-
हइ केवइयं ५, केवइयं च विकंपइ ६ । मंडलाण य संठाणे ७, विक्खंभो ८ अट्ट
पाहुडा ॥ ११ ॥ छप्पंच य सत्तेव य अट्ट तिण्णिण य हवंति पडिवत्ती । पढमस्स
पाहुडस्स हवंति एयाउ पडिवत्ती ॥१२॥ पडिवत्तीओ उदए, तहा अत्थमणेसु य ।
भियवाए कण्णकला, मुहुत्ताण गईइ य ॥ १३ ॥ णिक्खममाणे सिग्घगई,
पविसंते मंदगईइ य । चुलसीइसयं पुरिसाणं, तेसिं च पडिवत्तीओ ॥ १४ ॥
उदयम्मि अट्ट भणिया भेयग्घाए दुवे य पडिवत्ती । चत्तारि मुहुत्तगईए हुंति तइयम्मि
पडिवत्ती ॥१५॥ आवलिय १ मुहुत्तग्गे २, एवंभागा य ३ जोगस्ता ४ । कुलाइं ५
पुण्णमासी ६ य, सण्णिवाए ७ य संठिई ८ ॥ १६ ॥ तार(य)गं च ९ णेया य
१० चंदमगत्ति ११ यावरे । देवयाण य अज्झयणे १२, मुहुत्ताणं णामया इय
१३ ॥ १७॥ दिवसा राइ बुत्ता य १४, तिहि १५ गोत्ता १६ भोयणाणि १७ य ।
आइच्चवार १८ मासा १९ य, पंच संवच्छरा इय २० ॥१८॥ जोइसस्स य दाराइं
२१, णक्खत्तविजए विय २२ । दसमे पाहुडे एए, बावीसं पाहुडपाहुडा ॥ १९ ॥

तेणं कालेणं तेणं समएणं मिहिला गामं णयरी होत्था रिद्धत्थिमियसमिद्धा पमुइय-
जणजाणवया"पासादीया ४ ॥ १ ॥ तीसे णं मिहिलाए णयरीए बहिया उत्तर-
पुरत्थिमे दिसीभाए माणिभहे गामं चेइए होत्था वण्णओ ॥२॥ तीसे णं मिहिलाए
णयरीए जियसत्तू गामं राया होत्था वण्णओ ॥ ३ ॥ तस्स णं जियसत्तुस्स रण्णो
धारिणी गामं देवी होत्था वण्णओ ॥४ ॥ तेणं कालेणं तेणं समएणं तम्मि चेइए
सामी समोसढे, परिसा णिग्गया, धम्मो कहिओ, परिसा पडिगया जाव राया
जामेव दिसिं पाउब्भूए तामेव दिसिं पडिगए ॥ ५ ॥ तेणं कालेणं तेणं समएणं
समणस्स भगवओ म्हावीरस्स जेडे अंतेवासी इंदभूई गामं अणगारे गोयमे गोत्तेणं
सत्तुस्सेहे समचउरंससंठाणसंठिए वज्जरिसहणारायसंघयणे जाव एवं वयासी-ता
कहं ते वद्दोवद्दी मुहुत्ताणं आहितेति वएजा ? ता अट्टएगूणवीसे मुहुत्तसए सत्तावीसं
च सट्ठिभागें मुहुत्तस्स आहितेति वएजा ॥ ६ ॥ ता जया णं सूरिए सव्वभंतराओ
मंडलाओ सव्ववाहिरं मंडलं उवसंकमित्ता चारं चरइ सव्ववाहिराओ मंडलाओ
सव्वभंतरं मंडलं उवसंकमित्ता चारं चरइ एस णं अद्धा केवइयं राइंदियग्गेणं
आहितेति वएजा ? ता तिण्णि छावडे राइंदियसए राइंदियग्गेणं आहितेति वएजा
॥ ७ ॥ ता एयाए अद्धाए सूरिए कइ मंडलाइं चरइ, कइ मंडलाइं दुक्खुत्तो
चरइ, कइ मंडलाइं एगक्खुत्तो चरइ ? ता चुलसीयं मंडलसयं चरइ, वासीइ
मंडलसयं दुक्खुत्तो चरइ, तंजहा-णिकखममाणे चेव पविसमाणे चेव, दुवे य खलु
मंडलाइं सइं चरइ, तंजहा-सव्वभंतरं चेव मंडलं सव्ववाहिरं चेव मंडलं
॥ ८ ॥ जइ खलु तस्सेव आइच्चस्स संवच्छरस्स सयं अट्टारसमुहुत्ते दिवसे भवइ
सइं अट्टारसमुहुत्ता राई भवइ सयं दुवालसमुहुत्ते दिवसे भवइ सइं दुवालस-
मुहुत्ता राई भवइ, पढमे छम्मासे अत्थि अट्टारसमुहुत्ता राई, णत्थि अट्टारसमुहुत्ते
दिवसे, अत्थि दुवालसमुहुत्ते दिवसे, णत्थि दुवालसमुहुत्ता राई भवइ, दोच्चे छम्मासे
अत्थि अट्टारसमुहुत्ते दिवसे, णत्थि अट्टारसमुहुत्ता राई, अत्थि दुवालसमुहुत्ता
राई, णत्थि दुवालसमुहुत्ते दिवसे भवइ, पढमे वा छम्मासे दोच्चे वा छम्मासे णत्थि
पण्णरसमुहुत्ते दिवसे भवइ, णत्थि पण्णरसमुहुत्ता राई भवइ, तत्थ णं कं हेउं
वएजा ? ता अयणं जंबूदीवे २ सव्वदीवसमुद्दाणं सव्वभंतराए जाव विसेसा-
हिए परिकखेवेणं पण्णत्ते, ता जया णं सूरिए सव्वभंतरमंडलं उवसंकमित्ता
चारं चरइ तथा णं उत्तमकट्ठपत्ते उक्कोसए अट्टारसमुहुत्ते दिवसे भवइ, जहणिया

दुवाल्समुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरइ, ता जया णं सूरिए अब्भितराणंतरं मंडलं उवसंकमित्ता चारं चरइ तथा णं अट्टारसमुहुत्ते दिवसे भवइ दोहिं एगट्ठिभागमुहुत्तेहिं ऊणे, दुवाल्समुहुत्ता राई भवइ दोहिं एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरइ, ता जया णं सूरिए अब्भितरं तच्चं मंडलं उवसंकमित्ता चारं चरइ तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवाल्समुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं णिक्खममाणे सूरिए तयाणंतराओ तयाणंतरं मंडलाओ मंडलं संकममाणे २ दो २ एगट्ठिभागमुहुत्ते एगमेगे मंडले दिवसखेत्तस्स णिवुद्धेमाणे २ रयणिवखेत्तस्स अभिवुद्धेमाणे २ सव्वबाहिरमंडलं उवसंकमित्ता चारं जरइ, ता जया णं सूरिए सव्वब्भंतराओ मंडलाओ सव्वबाहिरं मंडलं उवसंकमित्ता चारं चरइ तथा णं सव्वब्भंतरमंडलं पणिहाय एगेणं तेसीएणं राइंदियसएणं तिण्णिछावट्टे एगट्ठिभागमुहुत्ते सए दिवसखेत्तस्स णिवुद्धित्ता रयणिवखेत्तस्स अभिवुद्धित्ता चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहण्णए बारसमुहुत्ते दिवसे भवइ, एस णं पढमे छम्मासे, एस णं पढमस्स छम्मासस्स पजवसाणे । से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरइ, ता जया णं सूरिए बाहिराणंतरं मंडलं उवसंकमित्ता चारं चरइ तथा णं अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा, दुवाल्समुहुत्ते दिवसे भवइ दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरइ, ता जया णं सूरिए बाहिरं तच्चं मंडलं उवसंकमित्ता चारं चरइ तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं ऊणा, दुवाल्समुहुत्ते दिवसे भवइ चउहिं एगट्ठिभागमुहुत्तेहिं अहिए । एवं खलु एएणुवाएणं पविसमाणे सूरिए तयाणंतराओ तयाणंतरं मंडलाओ मंडलं संकममाणे २ दो दो एगट्ठिभागमुहुत्ते एगमेगे मंडले रयणिवखेत्तस्स णिवुद्धेमाणे २ दिवसखेत्तस्स अभिवुद्धेमाणे २ सव्वब्भंतरं मंडलं उवसंकमित्ता चारं चरइ, ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमित्ता चारं चरइ तथा णं सव्वबाहिरं मंडलं पणिहाय एगेणं तेसीएणं राइंदियसएणं तिण्णिछावट्टे एगट्ठिभागमुहुत्तसए रयणिवखेत्तस्स णिवुद्धित्ता दिवसखेत्तस्स अभिवुद्धित्ता चारं चरइ, तथा णं उत्तमकट्टपत्ते उक्कोसए अट्टारसमुहुत्ते

दिवसे भवइ, जहणिया दुवालसमुहुत्ता राई भवइ, एस णं दोच्चे छम्मासे, एस णं दुच्चस्स छम्मासस्स पजवसाणे, एस णं आइच्चे संवच्छरे, एस णं आइच्चस्स संवच्छरस्स पजवसाणे, इइ खलु तस्सेवं आइच्चस्स संवच्छरस्स सइं अट्टारसमुहुत्ते दिवसे भवइ, सइं अट्टारसमुहुत्ता राई भवइ, सयं दुवालसमुहुत्ते दिवसे भवइ, सयं दुवालसमुहुत्ता राई भवइ, पढमे छम्मासे अत्थि अट्टारसमुहुत्ता राई भवइ, गत्थि अट्टारसमुहुत्ते दिवसे भवइ, अत्थि दुवालसमुहुत्ते दिवसे, गत्थि दुवालसमुहुत्ता राई भवइ, दोच्चे छम्मासे अत्थि अट्टारसमुहुत्ते दिवसे भवइ, गत्थि अट्टारसमुहुत्ता राई, अत्थि दुवालसमुहुत्ता राई, गत्थि दुवालसमुहुत्ते दिवसे भवइ, पढमे वा छम्मासे दोच्चे वा छम्मासे गत्थि पण्णरसमुहुत्ते दिवसे भवइ, गत्थि पण्णरसमुहुत्ता राई भवइ, गण्णत्थ राइंदियाणं वट्ठोवट्ठीए मुहुत्ताण वा चओवचएणं, गण्णत्थ वा अणुवायगईए० गाहाओ भाणियन्वाओ ॥९॥ पढमस्स पाहुडस्स पढमं पाहुडपाहुडं समत्तं ॥

ता कंह ते अद्धमंडल्लसंठिई आहिताति वएज्जा ? तत्थ खलु इमा दुविहा अद्धमंडल्लसंठिई पण्णत्ता, तंजहा-दाहिणा चेव अद्धमंडल्लसंठिई उत्तरा चेव अद्धमंडल्लसंठिई । ता कंह ते दाहिणं अद्धमंडल्लसंठिई आहिताति वएज्जा ? ता अयण्णं जंबूदीवे दीवे सव्वदीवसमुद्दाणं जाव परिकखेवेणं०, ता जया णं सूरिए सव्वभ्भंतरं दाहिणं अद्धमंडल्लसंठिइ उवसंकमित्ता चारं चरइ तथा णं उत्तमकट्ठपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि दाहिणाए अंतराए भागाए तस्साइपएसाए अब्भितराणंतरं उत्तरद्धमंडलं संठिइ उवसंकमित्ता चारं चरइ, जया णं सूरिए अब्भितराणंतरं उत्तरं अद्धमंडल्लसंठिइ उवसंकमित्ता चारं चरइ तथा णं अट्टारसमुहुत्ते(हिं) दिवसे भवइ दोहिं एगट्ठिभागमुहुत्तेहिं ऊणे, दुवालसमुहुत्ता राई० दोहिं एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि उत्तराए अंतराए भागाए तस्साइपएसाए अब्भितरं तच्चं दाहिणं अद्धमंडलं संठिइ उवसंकमित्ता चारं चरइ । ता जया णं सूरिए अब्भितरं तच्चं दाहिणं अद्धमंडलं संठिइ उवसंकमित्ता चारं चरइ तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे, दुवालसमुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं णिक्खममाणे सूरिए तयाणंतराओऽणंतरंसि तंसि २ वेसंसि तं तं अद्धमंडल्लसंठिइ संकममाणे २ दाहिणाए २ अंतराए भागाए तस्साइपएसाए सव्वयाहिरं उत्तरं अद्धमंडल्लसंठिइ उवसंकमित्ता चारं चरइ, ता जया णं सूरिए सव्व-

बाहिरं उत्तरं अद्धमंडल्लसंठिइं उवसंकमिक्ता चारं चरइ तथा णं उत्तमकड्डपत्ता उवको-
 सिया अट्टारसमुहुत्ता राई भवइ, जहण्णए दुवाल्समुहुत्ते दिवसे भवइ । एस णं
 पढमे छम्मासे, एस णं पढमछम्मासस्स पज्वसाणे, से पविसमाणे सूरिए दोच्चं
 छम्मासं अयमाणे पढमंसि अहोरत्तंसि उत्तराए अंतरभागाए तस्साइपएसाए बाहि-
 राणंतरं दाहिणं अद्धमंडल्लसंठिइं उवसंकमिक्ता चारं चरइ, ता जया णं सूरिए
 बाहिराणंतरं दाहिणअद्धमंडल्लसंठिइं उवसंकमिक्ता चारं चरइ तथा णं अट्टारस-
 मुहुत्ता राई भवइ दोहिं एगट्ठिभागमुहुत्तेहिं उणा, दुवाल्समुहुत्ते दिवसे भवइ दोहिं
 एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि दाहिणाए
 अंतराए भागाए तस्साइपएसाए बाहिरंतरं तच्चं उत्तरं अद्धमंडल्लसंठिइं उवसंकमिक्ता
 चारं चरइ, ता जया सूरिए बाहिरं तच्चं उत्तरं अद्धमंडल्लसंठिइं उवसंकमिक्ता
 चारं चरइ तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं अहिया,
 एवं खलु एएणं उवाएणं पविसमाणे सूरिए तयाणंतराओ तयाणंतरं०तंसि २ देसंसि
 तं तं अद्धमंडल्लसंठिइं संकममाणे २ उत्तराए अंतराभागाए तस्साइपएसाए सव्वब्भं-
 तरं दाहिणं अद्धमंडल्लसंठिइं उवसंकमिक्ता चारं चरइ, ता जया णं सूरिए सव्वब्भं-
 तरं दाहिणं अद्धमंडल्लसंठिइं उवसंकमिक्ता चारं चरइ तथा णं उत्तमकड्डपत्ते उवकोसए
 अट्टारसमुहुत्ते दिवसे भवइ, जहण्णिया दुवाल्समुहुत्ता राई भवइ, एस णं दोच्चे
 छम्मासे, एस णं दोच्चस्स छम्मासस्स पज्वसाणे, एस णं आइच्चे संवच्छरे, एस णं
 आइच्चसंवच्छरस्स पज्वसाणे ॥ १० ॥ ता कइं ते उत्तरा अद्धमंडल्लसंठिइं आहि-
 ताति वएजा ? ता अयं णं जंबूदीवे दीवे सव्वदीव जाव परिकखेवेणं, ता जया णं
 सूरिए सव्वब्भंतरं उत्तरं अद्धमंडल्लसंठिइं उवसंकमिक्ता चारं चरइ तथा णं उत्तम-
 कड्डपत्ते उवकोसए अट्टारसमुहुत्ते दिवसे भवइ, जहण्णिया दुवाल्समुहुत्ता राई
 भवइ, जहा दाहिणा तहा चेव णवरं उत्तरट्ठिओ अर्भितराणंतरं दाहिणं उवसंकमइ,
 दाहिणाओ अर्भितरं तच्चं उत्तरं उवसंकमइ, एवं खलु एएणं उवाएणं जाव
 सव्वबाहिरं दाहिणं उवसंकमइ सव्वबाहिरं दाहिणं उवसंकमिक्ता दाहिणाओ
 बाहिराणंतरं उत्तरं उवसंकमइ, उत्तराओ बाहिरं तच्चं दाहिणं तच्चाओ दाहिणाओ
 संकममाणे २ जाव सव्वब्भंतरं उवसंकमइ, तहेव । एस णं दोच्चे छम्मासे, एस
 णं दोच्चस्स छम्मासस्स पज्वसाणे, एस णं आइच्चे संवच्छरे, एस णं आइच्चस्स
 संवच्छरस्स पज्वसाणे, गाहाओ ॥११॥ पढमस्स पाहुडस्स बीयं पाहुड-
 पाहुडं समत्तं ॥ १-२ ॥

ता के ते चिण्णं पडिचरइ आहितेति वएज्जा ? तत्थ खलु इमे दुवे सूरिया पण्णत्ता, तंजहा-भारहे चेव सूरिए एरवए चेव सूरिए, ता एए णं दुवे सूरिया पत्तेयं २ तीसाए २ मुहुत्तेहिं एगमेगं अद्धमंडलं चरंति, सट्ठीए २ मुहुत्तेहिं एगमेगं मंडलं संघायंति, ता णिक्खममाणा खलु एए दुवे सूरिया णो अण्णमण्णस्स चिण्णं पडिचरंति, पविसमाणा खलु एए दुवे सूरिया अण्णमण्णस्स चिण्णं पडिचरंति, तं सयमेगं चोयालं, तत्थ के हेऊ०ति वएज्जा ? ता अयण्णं जंबूदीवे २ जाव परिकखे-वेणं०, तत्थ णं अयं भारहए चेव सूरिए जंबूदीवस्स २ पाईणपडीणाययउदीण-दाहिणाययाए जीवाए मंडलं चउवीसएणं सएणं छेत्ता दाहिणपुरत्थिमिल्लंसि चउ-भागमंडलंसि बाणउइं सूरियमयाइं जाइं अप्पणा चेव चिण्णाइं पडिचरइ, उत्तरपच्च-त्थिमिल्लंसि चउभागमंडलंसि एक्काणउइं सूरियमयाइं जाइं सूरिए अप्पणो चेव चिण्णं पडिचरइ, तत्थ णं अयं भारहे सूरिए एरवयस्स सूरियस्स जंबूदीवस्स २ पाईण-पडीणाययाए उदीणदाहिणाययाए जीवाए मंडलं चउवीसएणं सएणं छेत्ता उत्तर-पुरत्थिमिल्लंसि चउभागमंडलंसि बाणउइं सूरियमयाइं जाइं सूरिए परस्स चिण्णं पडिचरइ, दाहिणपच्चत्थिमिल्लंसि चउभागमंडलंसि एगूणणउइं सूरियमयाइं जाइं सूरिए परस्स चेव चिण्णं पडिचरइ, तत्थ णं अयं एरवए सूरिए जंबूदीवस्स २ पाईणपडीणाययाए उदीणदाहिणाययाए जीवाए मंडलं चउवीसएणं सएणं छेत्ता उत्तरपुरत्थिमिल्लंसि चउभागमंडलंसि बाणउइं सूरियमयाइं जाव सूरिए अप्पणो चेव चिण्णं पडिचरइ, दाहिणपुरत्थिमिल्लंसि चउभागमंडलंसि एक्काणउइं सूरियमयाइं जाइं सूरिए अप्पणो चेव चिण्णं पडिचरइ, तत्थ णं अयं एरवइए सूरिए भारहस्स सूरियस्स जंबूदीवस्स २ पाईणपडीणाययाए उदीणदाहिणाययाए जीवाए मंडलं चउवीसएणं सएणं छेत्ता दाहिणपच्चत्थिमिल्लंसि चउभागमंडलंसि बाणउइं सूरियमयाइं सूरिए परस्स चिण्णं पडिचरइ, उत्तरपुरत्थिमिल्लंसि चउभागमंडलंसि एक्काणउइं सूरियमयाइं जाइं सूरिए परस्स चेव चिण्णं पडिचरइ, ता णिक्खममाणा खलु एए दुवे सूरिया णो अण्णमण्णस्स चिण्णं पडिचरंति, पविसमाणा खलु एए दुवे सूरिया अण्णमण्णस्स चिण्णं पडिचरंति, सयमेगं चोयालं । गाहाओ ॥ १२ ॥

पढमस्स पाहुडस्स तइयं पाहुडपाहुडं समत्तं ॥ १-३ ॥

ता केवइयं एए दुवे सूरिया अण्णमण्णस्स अंतरं कट्टु चारं चरंति आहिताति

वएजा ? तन्थ खलु इमाओ छ पडिवत्तीओ पण्णत्ताओ, तंजहा—तन्थ एगे एवमा-
हंसु—ता एगं जोयणसहस्सं एगं च तेत्तीसं जोयणसयं अण्णमण्णस्स अंतरं कट्टु
सूरिया चारं चरंति आहिताति वएजा एगे एवमाहंसु १, एगे पुण एवमाहंसु—ता
एगं जोयणसहस्सं एगं च चउत्तीसं जोयणसयं अण्णमण्णस्स अंतरं कट्टु सूरिया चारं
चरंति आहिताति वएजा एगे एवमाहंसु २, एगे पुण एवमाहंसु—ता एगं जोयण-
सहस्सं एगं च पण्णत्तीसं जोयणसयं अण्णमण्णस्स अंतरं कट्टु सूरिया चारं चरंति
आहिताति वएजा एगे एवमाहंसु ३, एवं एगं दीवं एगं समुद्दं अण्णमण्णस्स अंतरं
कट्टु ४, एगे...दो दीवे दो समुद्दे अण्णमण्णस्स अंतरं कट्टु सूरिया चारं चरंति
आहिताति वएजा एगे एवमाहंसु ५, एगे...तिण्णि दीवे तिण्णि समुद्दे अण्णमण्णस्स
अंतरं कट्टु सूरिया चारं चरंति आहिताति वएजा एगे एवमाहंसु ६, वयं पुण एवं
वयामो—ता पंच पंच जोयणाहं पण्णत्तीसं च एगट्ठिभागे जोयणस्स एगमेगे मंडले
अण्णमण्णस्स अंतरं अभिवट्ठेमाणा वा णिवट्ठेमाणा वा सूरिया चारं चरंति० ।
तन्थ णं को हेऊ आहिएति वएजा ? ता अयण्णं जंबूदीवे २ जाव परिक्खेवेणं
पण्णत्ते, ता जया णं एए दुवे सूरिया सव्वभंतरमंडलं उवसंकमित्ता चारं चरंति
तया णं णवणउहजोयणसहस्साहं छच्चत्ताले जोयणसए अण्णमण्णस्स अंतरं कट्टु
चारं चरंति आहिताति वएजा, तया णं उत्तमकट्टुपत्ते उक्कोसए अट्टारसमुहुत्ते दिवसे
भवइ, जहण्णिया दुवाल्समुहुत्ता राई भवइ, ते णिक्खममाणा सूरिया णवं संवच्छरं
अयमाणा पढमंसि अहोरत्तंसि अब्भितराणंतरं मंडलं उवसंकमित्ता चारं चरंति,
ता जया णं एए दुवे सूरिया अब्भितराणंतरं मंडलं उवसंकमित्ता चारं चरंति
तया णं णवणवइं जोयणसहस्साहं छच्च पण्णत्ताले जोयणसए पण्णत्तीसं च एगट्ठिभागे
जोयणस्स अण्णमण्णस्स अंतरं कट्टु चारं चरंति आहिताति वएजा, तया णं अट्टारस-
मुहुत्ते दिवसे भवइ दोहिं एगट्ठिभागमुहुत्तेहिं उणे, दुवाल्समुहुत्ता राई भवइ दोहिं
एगट्ठिभागमुहुत्तेहिं अहिया, ते णिक्खममाणा सूरिया दोच्चंसि अहोरत्तंसि अब्भितरं
तच्चं मंडलं उवसंकमित्ता चारं चरंति, ता जया णं एए दुवे सूरिया अब्भितरं तच्चं
मंडलं उवसंकमित्ता चारं चरंति तया णं णवणवइं जोयणसहस्साहं छच्चइकावण्णे
जोयणसए णव य एगट्ठिभागे जोयणस्स अण्णमण्णस्स अंतरं कट्टु चारं चरंति
आहिताति वएजा, तया णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं
उणे, दुवाल्समुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणु-

चन्द्रप्रज्ञप्ति सूत्र

वाएणं गिक्खममाणा एए दुवे सूरिया तओऽणंतराओ तयाणंतरं मंडलाओ मंडलं संकममाणा २ पंच २ जोयणाइं पणतीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवड्ढेमाणा २ सव्ववाहिरं मंडलं उवसंकमित्ता चारं चरंति, ता जया णं एए दुवे सूरिया सव्ववाहिरं मंडलं उवसंकमित्ता चारं चरंति तथा णं एगं जोयणसयसहस्सं छच्च सट्ठे जोयणसए अण्णमण्णस्स अंतरं कट्टु चारं चरंति, तथा णं उत्तमकट्टुपत्ता उक्कोसिया अट्टारसमुहुत्ता राई भवइ, जहण्णए दुवाल्स-मुहुत्ते दिवसे भवइ, एस णं पटमे छम्मासे, एस णं पटमस्स छम्मास्स पज्जवसाणे, ते पविसमाणा सूरिया दोच्चं छम्मासं अयमाणा पटमंसि अहोरत्तंसि बाहिराणंतरं मंडलं उवसंकमित्ता चारं चरंति, ता जया णं एए दुवे सूरिया बाहिराणंतरं मंडलं उवसंकमित्ता चारं चरंति तथा णं एगं जोयणसयसहस्सं छच्च चउप्पण्णे जोयणसए छत्तीसं च एगट्ठिभागे जोयणस्स अण्णमण्णस्स अंतरं कट्टु चारं चरंति आहिताति वएजा, तथा णं अट्टारसमुहुत्ता राई भवइ दोहिं एगट्ठिभागमुहुत्तेहिं ऊणा, दुवाल्स-मुहुत्ते दिवसे भवइ दोहिं एगट्ठिभागमुहुत्तेहिं अहिए, ते पविसमाणा सूरिया दोच्चंसि अहोरत्तंसि बाहिरं तच्चं मंडलं उवसंकमित्ता चारं चरंति, ता जया णं एए दुवे सूरिया बाहिरं तच्चं मंडलं उवसंकमित्ता चारं चरंति तथा णं एगं जोयणसयसहस्सं छच्च अडयाले जोयणसए वावण्णं च एगट्ठिभागे जोयणस्स अण्णमण्णस्स अंतरं कट्टु चारं चरंति, तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं ऊणा, दुवाल्समुहुत्ते दिवसे भवइ चउहिं एगट्ठिभागमुहुत्तेहिं अहिए । एवं खलु एएणुवाएणं पविसमाणा एए दुवे सूरिया तओऽणंतराओ तयाणंतरं मंडलाओ मंडलं संकममाणा २ पंच २ जोयणाइं पणतीसे एगट्ठिभागे जोयणस्स एगमेगे मंडले अण्णमण्णस्संतरं गिक्खेमाणा २ सव्वभंतरमंडलं उवसंकमित्ता चारं चरंति, ता जया णं एए दुवे सूरिया सव्वभंतरं मंडलं उवसंकमित्ता चारं चरंति तथा णं णवणउइजोयणसहस्साइं छच्च चत्ताले जोयणसए अण्णमण्णस्स अंतरं कट्टु चारं चरंति, तथा णं उत्तमकट्टुपत्ते उक्कोसए अट्टारसमुहुत्ते दिवसे भवइ, जहण्णिया दुवाल्समुहुत्ता राई भवइ, एस णं दोच्चे छम्मासे, एस णं दोच्चस्स छम्मास्स पज्जवसाणे, एस णं आइच्चे संवच्छरे, एस णं आइच्चसंवच्छरस्स पज्जवसाणे ॥१३॥

पटमस्स पाहुडस्स चउत्थं पाहुडपाहुडं समत्तं ॥१-४॥

ता केवइयं ते दीवं वा समुहं वा ओगाहिता सूरिए चारं चरइ आहिताति वएजा ? तत्थ खलु इमाओ पंच पडिवत्तीओ पणत्ताओ, तं०-तत्थ एगे एवमाहंसु-ता एगं जोयणसहस्सं एगं च तेत्तीसं जोयणसयं दीवं वा समुहं वा ओगाहिता सूरिए चारं चरइ...१, एगे पुण एवमाहंसु-ता एगं जोयणसहस्सं एगं च चउत्तीसं जोयणसयं दीवं वा समुहं वा ओगाहिता सूरिए चारं चरइ० एगे एवमाहंसु २, एगे पुण एवमाहंसु-ता एगं जोयणसहस्सं एगं च पणतीसं जोयणसयं दीवं वा समुहं वा ओगाहिता सूरिए चारं चरइ० एगे एवमाहंसु २, एगे पुण एवमाहंसु-ता अवहं दीवं वा समुहं वा ओगाहिता सूरिए चारं चरइ० एगे एवमाहंसु ४, एगे पुण एवमाहंसु-ता णो किंचि दीवं वा समुहं वा ओगाहिता सूरिए चारं चरइ...५, तत्थ जे ते एवमाहंसु-ता एगं जोयणसहस्सं एगं च तेत्तीसं जोयणसयं दीवं वा समुहं वा ओगाहिता सूरिए चारं चरइ, ते एवमाहंसु-ता जया णं सूरिए सव्वभंतरं मंडलं उवसंकमित्ता चारं चरइ तथा णं जंबूदीवं २ एगं जोयणसहस्सं एगं च तेत्तीसं जोयणसयं ओगाहिता सूरिए चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवाल्समुहुत्ता राई भवइ, ता जया णं सूरिए सव्ववाहिरं मंडलं उवसंकमित्ता चारं चरइ तथा णं ल्वणसमुहं एगं जोयणसहस्सं एगं च तेत्तीसं जोयणसयं ओगाहिता चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवाल्समुहुत्ते दिवसे भवइ । एवं चोत्तीसं जोयणसयं । एवं पणतीसं जोयणसयं । तत्थ जे ते एवमाहंसु-ता अवहं दीवं वा समुहं वा ओगाहिता सूरिए चारं चरइ, ते एवमाहंसु-ता जया णं सूरिए सव्वभंतरं मंडलं उवसंकमित्ता चारं चरइ तथा णं अवहं जंबूदीवं २ ओगाहिता चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवाल्समुहुत्ता राई भवइ, एवं सव्ववाहिरएवि, णवरं अवहं ल्वणसमुहं, तथा णं राइंदियं तहेव, तत्थ जे ते एवमाहंसु-ता णो किंचि दीवं वा समुहं वा ओगाहिता सूरिए चारं चरइ, ते एवमाहंसु-ता जया णं सूरिए सव्वभंतरं मंडलं उवसंकमित्ता चारं चरइ तथा णं किंचि दीवं वा समुहं वा ओगाहिता सूरिए चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ तहेव एवं सव्ववाहिरए मंडले णवरं णो किंचि ल्वणसमुहं ओगाहिता चारं चरइ, राइंदियं तहेव, एगे एवमाहंसु ५॥ १४॥ वयं पुण एवं वयामो-ता जया णं सूरिए सव्वभंतरं मंडलं उवसंकमिता चारं चरइ तथा णं जंबूदीवं २ असीयं जोयण-

सयं ओगाहिता चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, एवं सव्वबाहिरेवि, णवरं लवणसमुहं तिण्णि तीसे जोयणसए ओगाहिता चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, गाहाओ भाणिय-
व्वाओ ॥१५॥ पढमस्स पाहुडस्स पंचमं पाहुडपाहुडं समत्तं । १-५।

ता केवइयं(ते)एगमेगेणं राईदिएणं विकंपइत्ता २ सूरिए चारं चरइ आहितेति वएजा ? तत्थ खलु इमाओ सत्त पडिवत्तीओ पणत्ताओ, तं०—तत्थगे एवमाहंसु—
ता दो जोयणाइं अद्धदुचत्तालीसं तेसीयसयभागे जोयणस्स एगमेगेणं राईदिएणं
विकंपइत्ता २ सूरिए चारं चरइ० एगे एवमाहंसु १, एगे पुण एवमाहंसु—ता अट्टाइ-
जाइं जोयणाइं एगमेगेणं राईदिएणं विकंपइत्ता २ सूरिए चारं चरइ० एगे एवमाहंसु
२, एगे पुण एवमाहंसु—ता तिभागूणाइं तिण्णि जोयणाइं एगमेगेणं राईदिएणं विकंप-
इत्ता २ सूरिए चारं चरइ० एगे एवमाहंसु ३, एगे पुण एवमाहंसु—ता तिण्णि
जोयणाइं अद्धसीयालीसं च तेसीइसयभागे जोयणस्स एगमेगेणं राईदिएणं विकंप-
इत्ता २ सूरिए चारं चरइ० एगे एवमाहंसु ४, एगे पुण एवमाहंसु—ता अद्धुट्टाइं
जोयणाइं एगमेगेणं राईदिएणं विकंपइत्ता २ सूरिए चारं चरइ० एगे एवमाहंसु ५
एगे पुण एवमाहंसु—ता चत्तारि जोयणाइं एगमेगेणं राईदिएणं
विकंपइत्ता २ सूरिए चारं चरइ० एगे एवमाहंसु ६, एगे पुण एवमाहंसु—ता चत्तारि
जोयणाइं अद्धवावणं च तेसीइसयभागे जोयणस्स एगमेगेणं राईदिएणं विकंपइत्ता २
सूरिए चारं चरइ० एगे एवमाहंसु ७ । वयं पुण एवं वयाओ—ता दो जोयणाइं
अडयालीसं च एगट्टिभागे जोयणस्स एगमेगेणं मंडलं एगमेगेणं राईदिएणं विकंपइत्ता २
सूरिए चारं चरइ०, तत्थ णं को हेऊ०ति वएजा ? ता अयणं जंबूदीवे २ जाव
परिक्खेवेणं पणत्ते, ता जया णं सूरिए सव्वभंतंरं मंडलं उवसंकमित्ता चारं चरइ
तया णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता
राई भवइ, से णिक्खममाणे सूरिए णवं संवच्छंरं अयमाणे पढमंसि अहोरत्तंसि
अभिंतराणंतंरं मंडलं उवसंकमित्ता चारं चरइ, ता जया णं सूरिए अभिंतराणंतंरं
मंडलं उवसंकमित्ता चारं चरइ तथा णं दो जोयणाइं अडयालीसं च एगट्टिभागे
जोयणस्स एगेणं राईदिएणं विकंपइत्ता चारं चरइ, तथा णं अट्टारसमुहुत्ते दिवसे
भवइ दोहिं एगट्टिभागमुहुत्तोहिं ऊणे, दुवालसमुहुत्ता राई भवइ दोहिं एगट्टिभाग-
मुहुत्तोहिं अहिया । से णिक्खममाणे सूरिए दोच्चंसि अहोरत्तंसि अभिंतरं तच्चं मंडलं

उवसंकमिक्ता चारं चरइ, ता जया णं सूरिए आर्भितरं तच्चं मंडलं उवसंकमिक्ता चारं चरइ तथा णं पंच जोयणाइं पणतीसं च एगट्ठिभागे जोयणस्स दोहिं राइंदिएहिं विकंपइत्ता २ चारं चरइ, तथा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं उणे, दुवाल्समुहुत्ता राई भवइ चउहिं एगट्ठिभागमुहुत्तेहिं अहिया, एवं खलु एएणं उवाएणं णिक्खममाणे सूरिए तयाणंतराओ तयाणंतरं मंडलाओ मंडलं संकममाणे २ दो २ जोयणाइं अडयालीसं च एगट्ठिभागे जोयणस्स एगमेगं मंडलं एगमेगेणं राइंदिएणं विकंपमाणे २ सव्वबाहिरं मंडलं उवसंकमिक्ता चारं चरइ, ता जया णं सूरिए सव्वभंतराओ मंडलाओ सव्वबाहिरं मंडलं उवसंकमिक्ता चारं चरइ तथा णं सव्वभंतरं मंडलं पणिहाय एगेणं तेसीएणं राइंदियसएणं पंचदसुत्तरजोयणसए विकंपइत्ता २ चारं चरइ, तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहण्णए दुवाल्समुहुत्ते दिवसे भवइ, एस णं पटमछम्भासे, एस णं पटमछम्भासस्स पज्जवसाणे, से य पविसमाणे सूरिए दोच्चं छम्भासं अयमाणे पटमंसि अहोरत्तंसि बाहिराणंतरं मंडलं उवसंकमिक्ता चारं चरइ, ता जया णं सूरिए बाहिराणंतरं मंडलं उवसंकमिक्ता चारं चरइ तथा णं दो दो जोयणाइं अडयालीसं च एगट्ठिभागे जोयणस्स एगेणं राइंदिएणं विकंपइत्ता २ चारं चरइ, तथा णं अट्टारसमुहुत्ता राई भवइ दोहिं एगट्ठिभागमुहुत्तेहिं उणा, दुवाल्समुहुत्ते दिवसे भवइ दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरतच्चंसि मंडलंसि उवसंकमिक्ता चारं चरइ, ता जया णं सूरिए बाहिरतच्चं मंडलं उवसंकमिक्ता चारं चरइ तथा णं पंच जोयणाइं पणतीसं च एगट्ठिभागे जोयणस्स दोहिं राइंदिएहिं विकंपइत्ता २ चारं चरइ, राइंदिए तहेव, एवं खलु एएणुवाएणं पविसमाणे सूरिए तओऽणंतराओ तयाणंतरं च णं मंडलं संकममाणे २ दो २ जोयणाइं अडयालीसं ज एगट्ठिभागे जोयणस्स एगमेगेणं राइंदिएणं विकंपमाणे २ सव्वभंतरं मंडलं उवसंकमिक्ता चारं चरइ, ता जया णं सूरिए सव्वबाहिराओ मंडलाओ सव्वभंतरं मंडलं उवसंकमिक्ता चारं चरइ तथा णं सव्वबाहिरं मंडलं पणिहाय एगेणं तेसीएणं राइंदियसएणं पंचदसुत्तरे जोयणसए विकंपइत्ता २ चारं चरइ, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहण्णिया दुवाल्समुहुत्ता राई भवइ, एस णं दोच्चे छम्भासे, एस णं दोच्चरस छम्भासस्स पज्जव-

साणे, एस णं आइच्चे संवच्छरे, एस णं आइच्चस्स संवच्छरस्स पजवसाणे ॥१६॥

पढमस्स पाहुडस्स छट्ठं पाहुडपाहुडं समत्तं ॥१-६॥

ता कहं ते मंडल्लसंठिई आहिताति वएजा ? तत्थ खलु इमाओ अट्ट पडि-
वत्तीओ पण्णत्ताओ, तं०-तत्थेगे एवमाहंसु-ता सव्वावि णं मंडल्लवया समचउरंस-
संठाणसंठिया पण्णत्ता एगे एवमाहंसु १, एगे पुण एवमाहंसु-ता सव्वावि णं
मंडल्लवया विसमचउरंससठाणसंठिया पण्णत्ता एगे एवमाहंसु २, एगे पुण एवमा-
हंसु-ता सव्वावि णं मंडल्लवया समचउक्कोणसंठिया पण्णत्ता एगे एवमाहंसु ३, एगे
पुण एवमाहंसु-ता सव्वावि णं मंडल्लवया विसमचउक्कोणसंठिया पण्णत्ता एगे एव-
माहंसु ४, एगे पुण एवमाहंसु-ता सव्वावि णं मंडल्लवया समचक्कवाल्लसंठिया
पण्णत्ता एगे एवमाहंसु ५, एगे पुण एवमाहंसु-ता सव्वावि णं मंडल्लवया विसम-
चक्कवाल्लसंठिया पण्णत्ता एगे एवमाहंसु ६, एगे पुण एवमाहंसु-ता सव्वावि णं
मंडल्लवया चक्कदचक्कवाल्लसंठिया पण्णत्ता एगे एवमाहंसु ७, एगे पुण एवमाहंसु-ता
सव्वावि णं मंडल्लवया छत्तागारसंठिया पण्णत्ता एगे एवमाहंसु ८, तत्थ जे ते
एवमाहंसु-ता सव्वावि णं मंडल्लवया छत्तागारसंठिया पण्णत्ता एएणं णएणं णायव्वं,
णो चेव णं इयरेहिं, पाहुडगाहाओ भाणियव्वाओ ॥१७॥ **पढमस्स पाहुडस्स**

सत्तमं पाहुडपाहुडं समत्तं ॥ १-७ ॥

ता सव्वावि णं मंडल्लवया केवइयं बाहल्लेणं केवइयं आयामविकखम्भेणं केवइयं
परिक्खेवेणं आहिताति वएजा ? तत्थ खलु इमाओ तिण्णि पडिवत्तीओ पण्णत्ताओ
तंजहा-तत्थेगे एवमाहंसु-ता सव्वावि णं मंडल्लवया जोयणं बाहल्लेणं एगे जोयण-
सहस्सं एगं च तेत्तीसं जोयणसयं आयामविकखम्भेणं तिण्णि जोयणसहस्साइं तिण्णि
य णवणउए जोयणसए परिक्खेवेणं पण्णत्ता एगे एवमाहंसु १, एगे पुण एवमा-
हंसु-ता सव्वावि णं मंडल्लवया जोयणं बाहल्लेणं एगं जोयणसहस्सं एगं च चउ-
तीसं जोयणसयं आयामविकखम्भेणं तिण्णि जोयणसहस्साइं चत्तारि बिउत्तरे जोयण-
सए परिक्खेवेणं पण्णत्ता एगे एवमाहंसु २, एगे पुण एवमाहंसु-ता० जोयणं बाह-
ल्लेणं एगं जोयणसहस्सं एगं च पण्णत्तीसं जोयणसयं आयामविकखम्भेणं तिण्णि जोयण-
सहस्साइं चत्तारि य पंचुत्तरे जोयणसए परिक्खेवेणं पण्णत्ता एगे एवमाहंसु ३, वयं
पुण एवं वयामो-ता सव्वावि णं मंडल्लवया अडयालीसं च एगट्ठिभागे जोयणस्स

वाहल्लेणं अणियया आयामविकखंभेणं परिकखेवेणं आहिताति वएजा, तत्थ णं को हेऊ० त्ति वएजा ? ता अंयणं जम्बूदीवे २ जाव परिकखेवेणं०, ता जया णं सूरिए सव्वभंभंतरं मंडलं उवसंकमित्ता चारं चरइ तथा णं सा मंडलवया अडयालीसं च एगट्ठिभागे जोयणस्स वाहल्लेणं णवणउइं जोयणसहस्साइं छच्च चत्ताले जोयणसए आयामविकखंभेणं तिण्णि जोयणसयसहस्साइं पण्णरसजोयणसहस्साइं एगूणणउइं जोयणाइं किंचिविसेसाहिए परिकखेवेणं०, तथा णं उच्चमकट्टपत्ते उक्कोसए अट्टारस-मुहुत्ते दिवसे भवइ, जहणिया दुवाल्समुहुत्ता राई भवइ, से णिकखममाणे सूरिए णवं संवच्छरं अयमाणे पटमंसि अहोरत्तंसि अब्भितराणंतरं मंडलं उवसंकमित्ता चारं चरइ, ता जया णं सूरिए अब्भितराणंतरं मंडलं उवसंकमित्ता चारं चरइ तथा णं सा मंडलवया अडयालीसं च एगट्ठिभागे जोयणस्स वाहल्लेणं णवणउइ-जोयणसहस्साइं छच्च पणयाले जोयणसए पणतीसं च एगट्ठिभागे जोयणस्स आयाम-विकखंभेणं तिण्णि जोयणसयसहस्साइं पण्णरस य सहस्साइं एगं चउत्तरं जोयण-सयं किंचिविसेसूणं परिकखेवेणं०, तथा णं दिवसराइप्पमाणं तहेव । से णिकखम-माणे सूरिए दोच्चंपि अहोरत्तंसि अब्भितरं तच्चं मंडलं उवसंकमित्ता चारं चरइ, ता जया णं सूरिए अब्भितरं तच्चं मंडलं उवसंकमित्ता चारं चरइ तथा णं सा मंडलवया अडयालीसं च एगट्ठिभागे जोयणस्स वाहल्लेणं णवणउइजोयण-सहस्साइं छच्च एक्कावण्णे जोयणसए णव य एगट्ठिभागा जोयणस्स आयामविकखं-भेणं तिण्णि जोयणसयसहस्साइं पण्णरस य सहस्साइं एगं च पणर्वीसं जोयणसयं परिकखेवेणं पण्णत्ता, तथा णं दिवसराई तहेव, एवं खलु एएणं णएणं णिकखममाणे सूरिए तथाणंतराओ तथाणंतरं मंडलाओ मंडलं उवसंकममाणे २ पंच जोयणाइं पणतीसं च एगट्ठिभागें जोयणस्स एगमेगे मंडले विकखंभवुद्धिं अभिवट्ठेमाणे २ अट्टारस २ जोयणाइं परिरयवुद्धिं अभिवट्ठेमाणे २ सव्ववाहिरं मंडलं उवसंकमित्ता चारं चरइ, ता जया णं सूरिए सव्ववाहिरमंडलं उवसंकमित्ता चारं चरइ तथा णं सा मंडलवया अडयालीसं च एगट्ठिभागा जोयणस्स वाहल्लेणं एगं जोयणसयसहस्सं छच्च सट्ठे जोयणसए आयामविकखंभेणं तिण्णि जोयणसयसहस्साइं अट्टारस सहस्साइं तिण्णि य पण्णरसुत्तरे जोयणसए परिकखेवेणं०, तथा णं उक्कोसिया अट्टारसमुहुत्ता राई भवइ, जहण्णए दुवाल्समुहुत्ते दिवसे भवइ, एस णं पटमे छम्मासे, एस णं पटमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पटमंसि अहोरत्तंसि बाहिराणंतरं मंडलं उवसंकमित्ता चारं चरइ, ता जया णं

सूरिए बाहिराणंतरं मंडलं उवसंकमिक्ता चारं चरइ तथा णं सा मंडल्वया अडयालीसं च एगट्टिभागे जोयणस्स बाहल्लेणं एगं जोयणसयसहस्सं छच्च चउप्पण्णे जोयणसए छव्वीसं च एगट्टिभागे जोयणस्स आयामविकखंभेणं तिण्णि जोयणसयसहस्साइं अट्टारससहस्साइं दोण्णि य सत्ताणउए जोयणसए परिकखेवेणं पण्णत्ता, तथा णं राइंदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिक्ता चारं चरइ, ता जया णं सूरिए बाहिरं तच्चं मंडलं उवसंकमिक्ता चारं चरइ तथा णं सा मंडल्वया अडयालीसं च एगट्टिभागे जोयणस्स बाहल्लेणं एगं जोयणसयसहस्सं छच्च अडयाले जोयणसए वावणं च एगट्टिभागे जोयणस्स आयामविकखंभेणं तिण्णि जोयणसयसहस्साइं अट्टारससहस्साइं दोण्णि य अउयणासीए जोयणसए परिकखेवेणं पण्णत्ता, दिवसराइं तहेव, एवं खलु एण्णुवाएणं से पविसमाणे सूरिए तयाणंतराओ तयाणंतरं मंडलाओ मंडलं संकममाणे २ पंच २ जोयणाइं पणतीसं च एगट्टिभागे जोयणस्स एगमेगे मंडले विकखंभवुद्धिं णिवुद्धेमाणे २ अट्टारस जोयणाइं परिरयवुद्धिं णिवुद्धेमाणे २ सव्वभंतरं मंडलं उवसंकमिक्ता चारं चरइ, ता जया णं सूरिए सव्वभंतरं मंडलं उवसंकमिक्ता चारं चरइ तथा णं सा मंडल्वया अडयालीसं च एगट्टिभागे जोयणस्स बाहल्लेणं णवणउइं जोयणसहस्साइं छच्च चत्ताले जोयणसए आयामविकखंभेणं तिण्णि जोयणसयसहस्साइं पण्णरस य सहस्साइं अउणाउइं च जोयणाइं किंचिविसेसाहियाइं परिकखेवेणं पण्णत्ता, तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवाल्लसमुहुत्ता राइं भवइ, एस णं दोच्चे छम्मासे, एस णं दोच्चस्स छम्मासस्स पज्जवसाणे एस णं आइच्चे संवच्छरे, एस णं आइच्चस्स संवच्छरस्स पज्जवसाणे, ता सव्वावि णं मंडल्वया अडयालीसं च एगट्टिभागे जोयणस्स बाहल्लेणं, सव्वावि णं मंडलं तरिया दो जोयणाइं विकखंभेणं, एस णं अट्टा तेसीयसयपडुप्पणो पंचदसुत्तरे जोयणसए आहिताति वएजा, ता अब्भितराओ मंडल्वयाओ बाहिरं मंडल्वयं बाहिराओ वा० अब्भितरं मंडल्वयं एस णं अट्टा केवइयं आहिताति वएजा ? ता पंचदसुत्तरजोयणसए आहिताति वएजा, ता अब्भितराए मंडल्वयाए बाहिरा मंडल्वया बाहिराओ मंडल्वयाओ अब्भितरा मंडल्वया एस णं अट्टा केवइयं आहिताति वएजा ? ता पंचदसुत्तरे जोयणसए अडयालीसं च एगट्टिभागे जोयणस्स आहिताति वएजा, ता अब्भितराओ मंडल्वयाओ बाहिरमंडल्वया बाहिराओ० अब्भितरमंडल्वया एस णं

अद्वा केवइयं आहिताति वएजा ? ता पंचणवुत्तरे जोयणसए तेरस य एगट्टिभागे जोयणस्स आहिताति वएजा, ता अब्भितराए मंडल्वयाए बाहिरा मंडल्वया बाहिराए मंडल्वयाए अब्भितरमंडल्वया एस णं अद्वा केवइयं आहिताति वएजा ? ता पंचदसुत्तरे जोयणसाए आहिताति वएजा ॥१८॥ **पढमस्स पाहुडस्स अट्टमं पाहुडपाहुडं समत्तं ॥१८॥ पढमं पाहुडं समत्तं ॥१९॥**

विइयं पाहुडं

ता कइं ते तेरिच्छगई आहिताति वएजा ? तत्थ खलु इमाओ अट्ट पडिवत्तीओ पण्णत्ताओ, तं०-तत्थगे एवमाहंसु-ता पुरत्थिमाओ लोयंताओ पाओ मरीई आगासंसि उत्तिट्ठइ, से णं इमं तिरियं लोयं तिरियं करेइ तिरियं करेत्ता पच्चत्थिमंसि लोयंतंसि सायंमि रायं आगासंसि विद्धंसइ एगे एवमाहंसु १, एगे पुण एवमाहंसु-ता पुरत्थिमाओ लोयंताओ पाओ सूरिए आगासंसि उत्तिट्ठइ, से णं इमं तिरियं लोयं तिरियं करेइ करित्ता पच्चत्थिमंसि लोयंतंसि सूरिए आगासंसि विद्धंसइ एगे एवमाहंसु २, एगे पुण एवमाहंसु-ता पुरत्थिमाओ लोयंताओ पाओ सूरिए आगासंसि उत्तिट्ठइ, से णं इमं तिरियं लोयं तिरियं करेइ करित्ता पच्चत्थिमंसि लोयंसि सायं सूरिए आगासं अणुपविसइ २ त्ता अहे पडियागच्छइ अहे पडियागच्छेत्ता पुणरवि अवरभूपुरत्थिमाओ लोयंताओ पाओ सूरिए आगासंसि उत्तिट्ठइ एगे एवमाहंसु ३, एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमिल्लंसि लोयंतंसि सायं सूरिए पुढविकायंसि विद्धंसइ एगे एवमाहंसु ४, एगे पुण एवमाहंसु-ता पुरत्थिमाओ लोयंताओ पाओ सूरिए पुढविकायंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि सायं सूरिए पुढविकायंसि अणुपविसइ अणुपविसित्ता अहे पडियागच्छइ २ त्ता पुणरवि अवरभूपुरत्थिमाओ लोयंताओ पाओ सूरिए पुढविकायंसि उत्तिट्ठइ एगे एवमाहंसु ५, एगे पुण एवमाहंसु-ता पुरत्थिमिल्लाओ लोयंताओ पाओ सूरिए आउकायंसि उत्तिट्ठइ, से णं इमं तिरियं लोयं तिरियं करेइ करेत्ता पच्चत्थिमंसि लोयंतंसि पाओ सूरिए आउकायंसि विद्धंसइ एगे एवमाहंसु ६, एगे पुण एवमाहंसु-ता पुरत्थिमाओ लोयंताओ पाओ सूरिए आउकायंसि उत्तिट्ठइ, से णं इमं तिरियं लोयं तिरियं करेइ करित्ता पच्चत्थिमं लोयंतंसि सायं सूरिए आउकायंसि अणुपविसइ २ त्ता अहे

पडियागच्छइ २ ता पुणरवि अवरभूपुरत्थिमाओ लोयंताओ पाओ सूरिए आउ-
 कायंसि उत्तिट्ठइ एगे एवमाहंसु ७, एगे पुण एवमाहंसु—ता पुरत्थिमाओ लोयंताओ
 बहूइं जोयणाइं बहूइं जोयणसयाइं बहूइं जोयणसहस्साइं उह्वं दूरं उप्पइत्ता एत्थ णं
 पाओ सूरिए आगासंसि उत्तिट्ठइ, से णं इमं दाहिणह्वं लोयं तिरियं करेइ करेत्ता
 उत्तरह्वलोयं तमेव राओ, से णं इमं उत्तरह्वलोयं तिरियं करेइ २ ता दाहिणह्वलोयं
 तमेव राओ, से णं इमाइं दाहिणुत्तरह्वलोयाइं तिरियं करेइ करेत्ता पुरत्थिमाओ
 लोयंताओ बहूइं जोयणाइं बहूइं जोयणसयाइं बहूइं जोयणसहस्साइं उह्वं दूरं उप्प-
 इत्ता एत्थ णं पाओ सूरिए आगासंसि उत्तिट्ठइ एगे एवमाहंसु ८ । वयं पुण एवं
 वयामो—ता जम्बूदीवस्स २ पाईणपडीणाययउदीणदाहिणाययाए जीवाए मंडलं चउ-
 व्वासेणं सएणं छेत्ता दाहिणपुरत्थिमंसि उत्तरपच्चत्थिमंसि य चउभागमंडलंसि
 इमीसे रयणप्पभाए पुटवीए बहुसमरमणिजाओ भूमिभागाओ अट्ट जोयणसयाइं उह्वं
 उप्पइत्ता एत्थ णं पाओ दुवे सूरिया० उत्तिट्ठंति, ते णं इमाइं दाहिणुत्तराइं जम्बू-
 दीवभागाइं तिरियं करेति २ ता पुरत्थिमपच्चत्थिमाइं जम्बूदीवभागाइं तमेव राओ,
 ते णं इमाइं पुरत्थिमपच्चत्थिमाइं जम्बूदीवभागाइं तिरियं करेति २ ता दाहिणुत्तराइं
 जम्बूदीवभागाइं तमेव राओ, ते णं इमाइं दाहिणुत्तराइं पुरत्थिमपच्चत्थिमाइं च
 जम्बूदीवभागाइं तिरियं करेति २ ता जम्बूदीवस्स २ पाईणपडीणाययउदीणदाहि-
 णाययाए जीवाए मंडलं चउव्वासेणं सएणं छेत्ता दाहिणपुरत्थिमिल्लंसि उत्तरपच्च-
 त्थिमिल्लंसि य चउभागमंडलंसि इमीसे रयणप्पभाए पुटवीए बहुसमरमणिजाओ
 भूमिभागाओ अट्ट जोयणसयाइं उह्वं उप्पइत्ता एत्थ णं पाओ दुवे सूरिया आगा-
 संसि उत्तिट्ठंति । ११। **बिइयस्स पाहुडस्स पढमं पाहुडपाहुडं समत्तं ।**

ता कहं ते मंडलाओ मंडलं संकममाणे २ सूरिए चारं चरइ आहिताति वएजा ?
 तत्थ खलु इमाओ दुवे पडिवत्तीओ पणत्ताओ, तं०—तत्थेगे एवमाहंसु—ता मंडलाओ
 मंडलं संकममाणे २ सूरिए भेयघाएणं संकमइ० एगे एवमाहंसु १, एगे पुण एवमा-
 हंसु—ता मंडलाओ मंडलं संकममाणे २ सूरिए कण्णकलं णिव्वेढेइ...२, तत्थ (णं)
 जे ते एवमाहंसु—ता मंडलाओ मंडलं संकममाणे २ सूरिए भेयघाएणं संकमइ, तेसि
 णं अयं दोसे, ता जेणंतरेणं मंडलाओ मंडलं संकममाणे २ सूरिए भेयघाएणं संकमइ
 एवइयं च णं अद्धं पुरओ ण गच्छइ, पुरओ अगच्छमाणे मंडलकालं परिह्वेइ, तेसि
 णं अयं दोसे, तत्थ जे ते एवमाहंसु—ता मंडलाओ मंडलं संकममाणे २ सूरिए
 कण्णकलं णिव्वेढेइ, तेसि णं अयं विसेसे, ता जेणंतरेणं मंडलाओ मंडलं संकममाणे २

सूरिए कण्णकलं णिव्वेदेइ एवइयं च णं अद्धं पुरओ गच्छइ, पुरओ गच्छमाणे मंडलकालं ण परिह्वेइ, तेसि णं अयं विसेसे, तत्थ जे ते एवमाहंसु—ता मंडलाओ मंडलं संकममाणे २ सूरिए कण्णकलं णिव्वेदेइ, एएणं णएणं णेयव्वं, णो चैव णं इयरेणं ॥ २० ॥ **बिइयस्स पाहुडस्स बिइयं पाहुडपाहुडं समत्तं ॥ २०२ ॥**

ता केवइयं ते खेत्तं सूरिए एगमेगेणं मुहुत्तेणं गच्छइ आहिताति वएज्जा ? तत्थ खलु इमाओ चत्तारि पडिवत्तीओ पण्णत्ताओ, तं०—तत्थ एगे एवमाहंसु—ता छ छ जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु १ एगे पुण एवमाहंसु—ता पंच पंच जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु २, एगे पुण एवमाहंसु—ता चत्तारि २ जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु ३, एगे पुण एवमाहंसु—ता छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छइ० एगे एवमाहंसु ४, तत्थ खलु जे ते एवमाहंसु—ता छ छ जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु—ता जया णं सूरिए सव्वब्भंतरं मंडलं उवसंकमित्ता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवाल्समुहुत्ता राई भवइ, तंसि च णं दिवसंसि एगं जोयणसयसहस्सं अट्ट य जोयणसहस्साइं तावक्खेत्ते पण्णत्ते, ता जया णं सूरिए सव्वबाहिरं मंडलं उवसंकमित्ता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवाल्समुहुत्ते दिवसे भवइ, तंसि च णं दिवसंसि वावत्तरिं जोयणसहस्साइं तावक्खेत्ते पण्णत्ते, तथा णं छ छ जोयणसहस्साइं सूरिए एगमेगेणं मुहुत्तेणं गच्छइ, तत्थ जे ते एवमाहंसु—ता पंच पंच जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु—ता जया णं सूरिए सव्वब्भंतरं मंडलं उवसंकमित्ता चारं चरइ, तद्देव दिवसराइप्पमाणं, तंसि च णं दिवसंसि तावक्खेत्तं णउइजोयणसहस्साइं, ता जया णं सूरिए सव्वबाहिरं मंडलं उवसंकमित्ता चारं चरइ तथा णं तं चैव राइंदियप्पमाणं, तंसि च णं दिवसंसि सट्ठिं जोयणसहस्साइं तावक्खेत्ते पण्णत्ते, तथा णं पंच पंच जोयणसहस्साइं सूरिए एगमेगेणं मुहुत्तेणं गच्छइ, तत्थ जे ते एवमाहंसु—ता चत्तारि २ जोयणसहस्साइं सूरिए एगमेगेणं मुहुत्तेणं गच्छइ, ते एवमाहंसु—ता जया णं सूरिए सव्वब्भंतरं मंडलं उवसंकमित्ता चारं चरइ तथा णं दिवसराई तद्देव, तंसि च णं दिवसंसि वावत्तरिं जोयणसहस्साइं तावक्खेत्ते पण्णत्ते, ता जया णं सूरिए सव्वबाहिरं मंडलं उवसंक-

मित्ता चारं चरइ तथा णं राइदियं तहेव, तंसि च णं दिवसंसि अडयालीसं जोयण-
सहस्साइं तावक्खेत्ते पण्णत्ते, तथा णं चत्तारि २ जोयणसहस्साइं सूरिए एगमेगेणं
मुहुत्तेणं गच्छइ, तत्थ जे ते एवमाहंसु-ता छवि पंचवि चत्तारिवि जोयणसहस्साइं
सूरिए एगमेगेणं मुहुत्तेणं गच्छइ, ते एवमाहंसु-ता सूरिए णं उग्गमणमुहुत्तंसि य
अत्थमणमुहुत्तंसि य सिग्गई भवइ, तथा णं छ छ जोयणसहस्साइं एगमेगेणं मुहु-
त्तेणं गच्छइ, मज्झिमतावक्खेत्तं समासाएमाणे २ सूरिए मज्झिमगई भवइ, तथा
णं पंच पंच जोयणसहस्साइं एगमेगेणं मुहुत्तेणं गच्छइ, मज्झिम २ तावक्खेत्तं संपत्ते
सूरिए मंदगई भवइ, तथा णं चत्तारि जोयणसहस्साइं एगमेगेणं मुहुत्तेणं गच्छइ,
तत्थ को हेऊ०ति वएजा ? ता अयण्णं जंबुद्दीवे २ जाव परिकखेवेणं०, ता जया णं
सूरिए सब्बभंत्तरं मंडलं उवसंकमित्ता चारं चरइ तथा णं दिवसराई तहेव, तंसि च
णं दिवसंसि एक्काणउइं जोयणसहस्साइं तावक्खेत्ते पण्णत्ते, ता जया णं सूरिए सब्ब-
बाहिरं मंडलं उवसंकमित्ता चारं चरइ तथा णं राइदियं तहेव, तंसि च णं दिवसंसि
एगट्टिजोयणसहस्साइं तावक्खेत्ते पण्णत्ते, तथा णं छवि पंचवि चत्तारिवि जोयण-
सहस्साइं सूरिए एगमेगेणं मुहुत्तेणं गच्छइ एगे एवमाहंसु । वयं पुण एवं वयामो-
ता साहरेगाइं पंच पंच जोयणसहस्साइं सूरिए एगमेगेणं मुहुत्तेणं गच्छइ०, तत्थ
को हेऊ०ति वएजा ? ता अयण्णं जंबुद्दीवे २...परिकखेवेणं०, ता जया णं सूरिए
सब्बभंत्तरं मंडलं उवसंकमित्ता चारं चरइ तथा णं पंच २ जोयणसहस्साइं दोण्णि
य एक्कावण्णे जोयणसए एगूणतीसं च सट्ठिभागे जोयणस्स एगमेगेणं मुहुत्तेणं गच्छइ,
तथा णं इहगयस्स मणुस्सस्स सीयालीसाए जोयणसहस्सेहिं दोहि य तेवट्ठेहिं जोयण-
सएहिं एक्कवीसाए य सट्ठिभागेहिं जोयणस्स सूरिए चक्खुप्फासं हव्वमागच्छइ, तथा
णं दिवसे राई तहेव, से णिक्खममाणे सूरिए णवं संवच्छरं अयमाणे पढमंसि अहो-
रत्तंसि अब्भितराणंतंरं मंडलं उवसंकमित्ता चारं चरइ, ता जया णं सूरिए अब्भि-
तराणंतंरं मंडलं उवसंकमित्ता चारं चरइ तथा णं पंच पंच जोयणसहस्साइं दोण्णि
य एक्कावण्णे जोयणसए सीयालीसं च सट्ठिभागे जोयणस्स एगमेगेणं मुहुत्तेणं गच्छइ,
तथा णं इहगयस्स मणुस्सस्स सीयालीसाए जोयणसहस्सेहिं अउणासीए य जोयणसए
सत्तावण्णाए सट्ठिभागेहिं जोयणस्सं सट्ठिभागं च एगट्ठिहा छेत्ता अउणावीसाए
चुण्णियाभागेहिं सूरिए चक्खुप्फासं हव्वमागच्छइ, तथा णं दिवसराई तहेव, से
णिक्खममाणे सूरिए दोच्चंसि अहोरत्तंसि अब्भितरत्तच्चं मंडलं उवसंकमित्ता चारं

चरइ, ता जया णं सूरिए अब्भितरतच्चं मंडलं उवसंकमित्ता चारं चरइ तथा णं पंच २ जोयणसहस्साइं दोण्णि य वावण्णे जोयणसए पंच य सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयरस मणूसस्स सीयालीसाए जोयणसहस्सेहिं छण्णउईए य जोयणेहिं तेत्तीसाए य सट्ठिभागेहिं जोयणस्स सट्ठिभागं च एगाट्ठिहा छेत्ता दोहिं चुण्णियाभागेहिं सूरिए चक्खुप्फासं हव्वमागच्छइ, तथा णं दिवससई तहेव, एवं खलु एएणं उवाएणं णिवग्गममाणे सूरिए तथाणंतराओ तथाणंतरं मंडलाओ मंडलं संकममाणे २ अट्टारस २ सट्ठिभागे जोयणस्स एगमेगे मंडले मुहुत्तगइं अभिवुट्ठेमाणे २ चुलसीइं साइरेगाइं जोयणाइं पुरिसच्छायं णिवुट्ठेमाणे २ सव्व-बाहिरं मंडलं उवसंकमित्ता चारं चरइ, ता जया णं सूरिए सव्वबाहिरमंडलं उवसंक-मित्ता चारं चरइ तथा णं पंच २ जोयणसहस्साइं तिण्णि य पंचुत्तरे जोयणसए पण्णरस य सट्ठिभागे जोयणस्स एगमेगेणं मुहुत्तेणं गच्छइ, तथा णं इहगयस्स मणू-सस्स एकतीसाए जोयणसहस्सेहिं अट्ठहिं एकतीसेहिं जोयणसएहिं तीसाए य सट्ठि-भागेहिं जोयणस्स सूरिए चक्खुप्फासं हव्वमागच्छइ, तथा णं उत्तमकट्ठपत्ता उवको-सिया अट्टारसमुहुत्ता राई भवइ, जहण्णए दुवालसमुहुत्ते दिवसे भवइ, एस णं पढमे छम्मासे, एस णं पढमस्स छम्मासस्स पजवसाणे । से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरइ, ता जया णं सूरिए बाहिराणंतरं मंडलं उवसंकमित्ता चारं चरइ तथा णं पंच २ जोयणसह-स्साइं तिण्णि य चउरुत्तरे जोयणसए सत्तावण्णं च सट्ठिभाए जोयणस्स एगमेगेणं मुहुत्तेणं गच्छइ, तथा णं इहगयस्स मणूसस्स एकतीसाए जोयणसहस्सेहिं णवहि य सोलेहिं जोयणसएहिं एगूणयालीसाए सट्ठिभागेहिं जोयणस्स सट्ठिभागं च एगाट्ठिहा छेत्ता सट्ठिए चुण्णियाभागे सूरिए चक्खुप्फासं हव्वमागच्छइ, तथा णं राइंदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरइ, ता जया णं सूरिए बाहिरतच्चं मंडलं उवसंकमित्ता चारं चरइ तथा णं पंच पंच जोयणसहस्साइं तिण्णि य चउत्तरे जोयणसए ऊयालंसं च सट्ठिभागे जोयणस्स एग-मेगेणं मुहुत्तेणं गच्छइ, तथा णं इहगयस्स मणूसस्स एगाहिगेहिं वत्तीसाए जोयण-सहस्सेहिं एक्कावण्णाए य सट्ठिभागेहिं जोयणस्स सट्ठिभागं च एगाट्ठिहा छेत्ता तेवी-साए चुण्णियाभागेहिं सूरिए चक्खुप्फासं हव्वमागच्छइ, राइंदियं तहेव, एवं खलु एएणुवाएणं पविसमाणे सूरिए तथाणंतराओ तथाणंतरं मंडलाओ मंडलं संकममाणे २

अद्वारस २ सट्टिभागे जोयणस्स एगमेगे मंडले मुहुत्तगइं णिवुद्धेमाणे २ साइरेगाइं पंचासीइं २ जोयणाइं पुरिसच्छायं अमिवुद्धेमाणे २ सब्बभंतंरं मंडलं उवसंकमित्ता चारं चरइ, ता जया णं सूरिए सब्बभंतंरं मंडलं उवसंकमित्ता चारं चरइ तथा णं पंच २ जोयणसहस्साइं दोण्णि य एक्कावण्णे जोयणसए अट्ठतीसं च सट्टिभागे जोयणस्स एगमेगेणं मुहुत्तेणं गच्छइ तथा णं इहगयस्स मणूसस्स सीयालीसाए जोयणसहस्सेहिं दोहि य दोवडेहिं जोयणसएहिं एक्कीसाए य सट्टिभागेहिं जोयणस्स सूरिए चक्खुप्फासं हव्वमागच्छइ, तथा णं उत्तमकट्ठपत्ते उवकोसए अद्वारसमुहुत्ते दिवसे भवइ, जहणिया दुवालममुहुत्ता राई भवइ, एस णं दोच्चे छम्मासे, एस णं दोच्चस्स छम्मासस्स पज्जवसाणे, एस णं आइच्चे संवच्छरे, एस णं आइच्चस्स संवच्छरस्स पज्जवसाणे ॥२१॥ बिइयस्स पाहुडस्स तइयं पाहुडपाहुडं समत्तं ॥ २-३॥
बिइयं पाहुडं समत्तं ॥ २ ॥

तइयं पाहुडं

ता केवइयं खेत्तं चंदिमसूरिया ओभासंति उज्जोवेति तवेति पगासंति आहिताति वएजा ? तत्थ खलु इमाओ बारस पडिवत्तीओ पण्णताओ, तं०—तत्थेगे एवमाहंसु-ता एगं दीवं एगं समुहं चंदिमसूरिया ओभासंति उज्जोवेति तवेति पगासंति... १, एगे पुण एवमाहंसु—ता तिण्णि दीवे तिण्णि समुहे चंदिमसूरिया ओभासंति... एगे एवमाहंसु २ एगे पुण एवमाहंसु—ता अद्धचउत्थे दीवसमुहे चंदिमसूरिया ओभासंति... एगे एवमाहंसु ३ एगे पुण एवमाहंसु—ता सत्त दीवे सत्त समुहे चंदिमसूरिया ओभासंति... एगे एवमाहंसु ४, एगे पुण एवमाहंसु—ता दस दीवे दस समुहे चंदिमसूरिया ओभासंति... एगे एवमाहंसु ५ एगे पुण एवमाहंसु—ता बारस दीवे बारस समुहे चंदिमसूरिया ओभासंति... ६ एगे पुण एवमाहंसु—ता बायालीसं दीवे बायालीसं समुहे चंदिमसूरिया ओभासंति... एगे एवमाहंसु ७ एगे पुण एवमाहंसु—ता बावत्तारिं दीवे बावत्तारिं समुहे चंदिमसूरिया ओभासंति... एगे एवमाहंसु ८, एगे पुण एवमाहंसु—ता बायालीसं दीवसयं बायालीसं समुहसयं चंदिमसूरिया ओभासंति... एगे एवमाहंसु ९, एगे पुण एवमाहंसु—ता बावत्तारिं दीवसयं बावत्तारिं समुहसयं चंदिमसूरिया ओभासंति... एगे एवमाहंसु १०, एगे पुण एवमाहंसु—ता बायालीसं दीवसहस्सं बायालीसं समुहसहस्सं चंदिमसूरिया ओभासंति... एगे एवमाहंसु ११, एगे पुण एवमाहंसु—ता बावत्तारिं दीवसहस्सं बावत्तारिं समुहसहस्सं चंदिमसूरिया ओभा-

संति... एगे एवमाहंसु १२, वयं पुण एवं वयामो—ता अयणं जंबुद्वीवे २ सव्वदीव-
समुदाणं जाव परिक्खेवेणं पण्णत्ते, से णं एगाए जगईए सव्वओ समंता संपरि-
क्खित्ते, सा णं जगई तहेव जहा **जंबूदीवपण्णत्तीए** जाव एवामेव सपुव्वावरेणं
जंबुद्वीवे २ चोद्दससल्लिसयसहस्सा छप्पणं च सल्लिसहस्सा भवर्त्ता ति मक्खया
जंबुद्वीवे णं दीवे पंचचक्रभागसंठिए आहिएति वएज्जा, ता कहं जंबुद्वीवे २ पंचचक्र-
भागसंठिए आहिएति वएज्जा ? ता जया णं एए दुवे सूरिया सव्वब्भंतरं मंडलं
उवसंक्कमित्ता चारं चरंति तया णं जंबुद्वीवस्स २ तिण्णि पंचचक्रभागे ओभासंति...
तंजहा—एगेवि एगं दिवहं पंचचक्रभागं ओभासइ”, एगेवि एगं दिवहं पंचचक्रभागं
ओभासेइ”, तया णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया
दुवाल्लसमुहुत्ता राई भवइ, ता जया णं एए दुवे सूरिया सव्वबाहिरं मंडलं उवसंक्क-
मित्ता चारं चरंति तया णं जंबुद्वीवस्स २ दोण्णि चक्रभागे ओभासंति... ता एगेवि
सूरिए एगं पंचचक्रवालभागं ओभासइ उज्जोवेइ तवेइ पभासेइ, एगेवि एगं पंचचक्र-
वालभागं ओभासइ”, तया णं उत्तमकट्टपत्ता उक्कोसिया अट्टारसमुहुत्ता राई भवइ,
जहणिए दुवाल्लसमुहुत्ते दिवसे भवइ ॥ २२ ॥ **तइयं पाहुडं समत्तं ॥३॥**

चउत्थं पाहुडं

ता कहं ते सेयाए संठिई आहिताति वएज्जा ? तत्थ खलु इमा दुविहा संठिई
पण्णत्ता, तंजहा—चंदिमसूरियसंठिई य तावक्खेत्तसंठिई य, ता कहं ते चंदिमसूरिय-
संठिई आहिताति वएज्जा ? तत्थ खलु इमाओ सोल्लस पडिबत्तीओ पण्णत्ताओ,
तं०—तत्थेगे एवमाहंसु—ता समचउरंससंठिया णं चंदिमसूरियसंठिई० एगे एवमाहंसु
१, एगे पुण एवमाहंसु—ता विसमचउरंससंठिया णं चंदिमसूरियसंठिई पण्णत्ता० २,
एवं एएणं अभिल्लवेणं समचउक्कोणसंठिया ३, विसमचउक्कोणसंठिया ४, समचक्र-
वाल्लसंठिया ५, विसमचक्रवाल्लसंठिया ६, ... ता चक्रद्वचक्रवाल्लसंठिया... पण्णत्ता
एगे एवमाहंसु ७, एगे पुण एवमाहंसु—ता छत्तागारसंठिया णं चंदिमसूरियसंठिई
पण्णत्ता० ८, एवं गेहसंठिया ९, गेहावणसंठिया १०, पासायसंठिया ११, गोपुर-
संठिया १२, पेच्छाघरसंठिया १३, बलभीसंठिया १४, हम्मियतल्लसंठिया १५,
एगे पुण एवमाहंसु—ता वाल्लगपोइयासंठिया णं चंदिमसूरियसंठिई पण्णत्ता० १६,
तत्थ जे ते एवमाहंसु—ता समचउरंससंठिया णं चंदिमसूरियसंठिई पण्णत्ता०, एवं

एएणं णएणं णेयव्वं णो चेव णं इयरेहिं । ता क्हं ते तावक्खेत्तसंठिई आहिताति वएज्जा ? तत्थ खलु इमाओ सोल्लस पडिवत्तीओ पण्णत्ताओ, तं०—तत्थ णं एगे एवमाहंसु—ता गेह-संठिया णं तावक्खेत्तसंठिई पण्णत्ता एवं जाव वाल्गपोइयासंठिया णं तावक्खेत्त-संठिई०, एगे पुण एवमाहंसु—ता जस्संठिए णं जम्बुद्दीवे २ तस्संठिया णं तावक्खेत्तसंठिई पण्णत्ता एगे एवमाहंसु ९, एगे पुण एवमाहंसु—ता जस्संठिए णं भारहे वासे तस्संठिया० पण्णत्ता० १०, एवं उजाणसंठिया णिजाणसंठिया एगओ णिसहसंठिया दुहओ णिसहसंठिया सेयणसंठिया० एगे एवमाहंसु १५, एगे पुण एवमाहंसु—ता सेणग-पट्टसंठिया णं तावक्खेत्तसंठिई पण्णत्ता एगे एवमाहंसु १६, वयं पुण एवं वयामो—ता उद्धीमुहकलंबुयापुप्फसंठिया णं तावक्खेत्तसंठिई पण्णत्ता, अंतो संकुडा बाहिं वित्थडा अंतो वट्ठा बाहिं पिहुला अंतो अंकमुहसंठिया बाहिं सत्थिमुहसंठिया, उभओ पासेणं तीसे दुवे बाहाओ अवट्ठियाओ भवंति पणयालीसं २ जोयणसहस्साइं आयामेणं, तीसे दुवे बाहाओ अणवट्ठियाओ भवंति, तंजहा—सव्वभंतरिया चेव बाहा सव्व-वाहिरियाः च्चेव बाहा, तत्थ को हेऊ०ति वएज्जा ? ता अयणं जम्बुद्दीवे २ जाव परिक्खेवेणं०, ता जया णं सूरिए सव्वभंतरं मंडलं उवसंकमित्ता चारं चरइ तथा णं उद्धीमुहकलंबुयापुप्फसंठिया णं तावक्खेत्तसंठिई आहिताति वएज्जा, अंतो संकुडा बाहिं वित्थडा अंतो वट्ठा बाहिं पिहुला अंतो अंकमुहसंठिया बाहिं सत्थिमुहसंठिया, दुहओ पासेणं तीसे तहेव जाव सव्ववाहिरिया चेव बाहा, तीसे णं सव्वभंतरिया बाहा मंदरपव्वयंतेणं णव जोयणसहस्साइं चत्तारि य छलसीए जोयणसए णव य दसभागे जोयणस्स परिक्खेवेणं आहिताति वएज्जा, तासे णं परिक्खेवविसेसे कओ आहिएति वएज्जा ? ता जे णं मंदरस्स पव्वयस्स परिक्खेवे तं परिक्खेवं तिहिं गुणित्ता दसहिं छेत्ता दसहिं भागे हीरमाणे एस णं परिक्खेवविसेसे आहिएति वएज्जा, तीसे णं सव्ववाहिरिया बाहा लव्वणसमुद्धंतेणं चउणउइं जोयणसहस्साइं अट्ट य अट्टसट्ठे जोयणसए चत्तारि य दसभागे जोयणस्स परिक्खेवेणं आहिताति वएज्जा, तासे णं परिक्खेवविसेसे कओ आहिएति वएज्जा ? ता जे णं जम्बुद्दीवस्स २ परिक्खेवे... तिहिं गुणित्ता दसहिं छेत्ता दसहिं भागे हीरमाणे एस णं परिक्खेवविसेसे आहिएति वएज्जा, तीसे णं तावक्खेत्ते केवइयं आयामेणं आहिएति वएज्जा ? ता अट्टत्तरिं जोयणसहस्साइं तिण्णि य तेत्तीसे जोयणसए जोयणतिभागे य आयामेणं आहिएति वएज्जा, तथा णं किंसंठिया अंधयारसंठिई आहिताति वएज्जा ? ता उद्धीमुहकलंबुया-

पुष्पसंठिया तद्देव जाव बाहिरिया चेव बाहा, तीसे णं सव्वभंतरिया बाहा मंदर-
 पव्वयंतेणं रुज्जोयणसहस्साइं तिण्णि य चउवीसे जोयणसए छच्च दरुभागे जोयणस्स
 परिकखेवेणं आहिताति वएजा, तीसे णं परिकखेवविसेसे कओ आहिएति वएजा ?
 ता जे णं मंदरस्स पव्वयस्स परिकखेवे तं परिकखेव दोहिं गुणेत्ता सेसं तद्देव, तीसे
 णं सव्वबाहिरिया बाहा ल्वणसमुद्धंतेणं तेवद्विजोयणसहस्साइं दोण्णि य पणयाले
 जोयणसए छच्च दरुभागे जोयणस्स परिकखेवेणं आहिताति वएजा, तासे णं परि-
 कखेवविसेसे कओ आहिएति वएजा ? ता जे णं जम्बुद्दीवस्स २ परिकखेवे तं परि-
 कखेवं दोहिं गुणित्ता दसहिं छेत्ता दसहिं भागे हीरमाणे एस णं परिकखेवविसेसे
 आहिएति वएजा, ता से णं अंधयारे केवइयं आयामेणं आहिएति वएजा ? ता
 अट्टत्तारिं जोयणसहस्साइं तिण्णि य तेत्तीसे जोयणसए जोयणतिभागं च आया-
 मेणं आहिएति वएजा, तया णं उत्तमकट्टपत्ते अट्टारसमुद्धत्ते दिवसे भवइ, जहणिया
 दुवालसमुद्धत्ता राई भवइ, ता जया णं सूरिए सव्वबाहिरं मंडलं उवसंकमित्ता चारं
 चरइ तया णं किसंठिया तावकखेत्तसंठिई आहिताति वएजा ? ता उद्धीमुहकलंबुया-
 पुष्पसंठिया तावकखेत्तसंठिई आहिताति वएजा, एवं जं अर्भितरमंडले अंधयार-
 संठिईए पमाणं तं बाहिरमंडले तावकखेत्तसंठिईए जं तहिं तावकखेत्तसंठिईए तं
 बाहिरमंडले अंधयारसंठिईए भाणियव्वं जाव तया णं उत्तमकट्टपत्ता उक्कोसिया
 अट्टारसमुद्धत्ता राई भवइ, जहणिए दुवालसमुद्धत्ते दिवसे भवइ, ता जंबुद्दीवे २ सूरिया
 केवइयं खेत्तं उद्धं तवंति केवइयं खेत्तं अहे तदंति केवइयं खेत्तं तिरियं तवंति ?
 ता जम्बुद्दीवे णं दीवे सूरिया एगं जोयणसयं उद्धं तवंति अट्टारस जोयणसयाइं अहे
 तवंति सीयालीसं जोयणसहस्साइं दुण्णि य तेवट्टे जोयणसए एगवीसं च सट्टिभागे
 जोयणस्स तिरियं तवंति ॥२३॥ चउत्थं पाहुडं समत्तं ॥४॥

पंचमं पाहुडं

ता कस्सि णं सूरियस्स लेस्सा पडिहया आहिताति वएजा ? तत्थ खलु इमाओ
 वीसं पडिवत्तीओ पण्णत्ताओ, तं०—तत्थेगे एवमाहंसु—ता मंदरंसि णं पव्वयंसि सूरि-
 यस्स लेस्सा पडिहया आहिताति वएजा एगे एवमाहंसु १, एगे पुण एवमाहंसु—ता
 मेरंसि णं पव्वयंसि सूरियस्स लेस्सा पडिहया आहिताति वएजा एगे एवमाहंसु २,
 एवं एएणं अभिलावेणं भाणियव्वं—ता मणोरमंसि णं पव्वयंसि, ता सुदंसणंसि णं
 पव्वयंसि, ता सयंपमंसि णं पव्वयंसि, ता गिरिरायंसि णं पव्वयंसि, ता रयणुच्चयंसि

णं पव्वयंसि, ता सिलुच्चयंसि णं पव्वयंसि, ता लोयमज्झंसि णं पव्वयंसि, ता लोयणा-
भिसि णं पव्वयंसि, ता अच्चंसि णं पव्वयंसि, ता सूरियावत्तंसि णं पव्वयंसि, ता
सूरियावरणंसि णं पव्वयंसि, ता उत्तमंसि णं पव्वयंसि, ता दिसाहंसि णं पव्वयंसि,
ता अवयंसंसि णं पव्वयंसि, ता धरणिखीलंसि णं पव्वयंसि, ता धरणिसिगंसि णं
पव्वयंसि, ता पव्वइदंसि णं पव्वयंसि, ता पव्वयरायंसि णं पव्वयंसि सूरियस्स लेस्सा
पडिहया आहिताति वएजा, एगे एवमाहंसु २० । वयं पुण एवं वयामो—ता मंद-
रेवि पुच्चइ जाव पव्वयराया० पुच्चइ, ता जे णं पुग्गला सूरियस्स लेस्सं पुसंति
ते णं पुग्गला सूरियस्स लेस्सं पडिहणंति, अदिट्ठावि णं पोग्गला सूरियस्स लेस्सं
पडिहणंति, चरिमलेस्संतरगयावि णं पोग्गला सूरियस्स लेस्सं पडिहणंति० ॥२४॥

पंचमं पाहुडं समत्तं ॥५॥

छट्ठं पाहुडं

ता कइं ते ओयसंतिई आहिताति वएजा ? तत्थ खलु इमाओ पणवीसं
पडिवत्तीओ पणत्ताओ, तं०—तत्थेगे एवमाहंसु—ता अणुसमयमेव सूरियस्स ओया
अण्णा उप्पजइ अण्णा अवेइ एगे एवमाहंसु १, एगे पुण एवमाहंसु—ता अणुमुहुत्तमेव
सूरियस्स ओया अण्णा उप्पजइ अण्णा अवेइ० २, एवं एएणं अमिलवेणं णेयत्वा-
ता अणुराहंदियमेव, ता अणुपक्खमेव, ता अणुमासमेव, ता अणुत्तडुमेव, ता अणु-
अयणमेव, ता अणुसंवच्छरमेव, ता अणुजुगमेव, ता अणुवाससयमेव, ता अणुवास-
सहस्समेव, ता अणुवाससयसहस्समेव, ता अणुपुव्वमेव, ता अणुपुव्वसयमेव, ता
अणुपुव्वसहस्समेव, ता अणुपुव्वसयसहस्समेव, ता अणुपलिओवममेव, ता अणुपलि-
ओवमसयमेव, ता अणुपलिओवमसहस्समेव, ता अणुपलिओवमसयसहस्समेव, ता
अणुसागरोवममेव, ता अणुसागरोवमसयमेव, ता अणुसागरोवमसहस्समेव, ता
अणुसागरोवमसयसहस्समेव, एगे पुण एवमाहंसु—ता अणुउस्सत्पिणिओसत्पिणिमेव
सूरियस्स ओया अण्णा उप्पजइ अण्णा अवेइ, एगे एवमाहंसु २५ । वयं पुण एवं
वयामो—ता तीसं २ मुहुत्ते सूरियस्स ओया अवट्ठिया भवइ, तेण परं सूरियस्स ओया
अणवट्ठिया भवइ, छम्मासे सूरिए ओयं णिवुट्ठेइ छम्मासे सूरिए ओयं अणिवुट्ठेइ,
णिक्वममाणे सूरिए देसं णिवुट्ठेइ पविसमाणे सूरिए देसं अणिवुट्ठेइ, क्वको देउ०ति
वएजा ? ता अयणं जम्बुदीवे २ सव्वदीवसमु० जाव परिकखेवेणं०, ता जया णं

सूरिए सव्वभ्मंतरं मंडलं उवसंकमित्ता चारं चरइ तथा णं उच्चमकड्डपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरइ, ता जया णं सूरिए अब्भितराणंतरं मंडलं उवसंकमित्ता चारं चरइ तथा णं एगेणं राइंदिएणं एगं भागं ओयाए दिवसखेत्तस्स णिवुद्धित्ता रयणिलेत्तस्स अभिवुद्धित्ता चारं चरइ मंडलं अट्टारसहिं तीसेहिं सएहिं छेत्ता, तथा णं अट्टारसमुहुत्ते दिवसे भवइ दोहिं एगड्डिभागमुहुत्तेहिं ऊणे, दुवालसमुहुत्ता राई भवइ दोहिं एगड्डिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरतच्चं मंडलं उवसंकमित्ता चारं चरइ, ता जया णं सूरिए अब्भितरतच्चं मंडलं उवसंकमित्ता चारं चरइ तथा णं दोहिं राइंदिएहिं दो भागे ओयाए दिवसखेत्तस्स णिवुद्धित्ता रयणिलेत्तस्स अभिवुद्धित्ता चारं चरइ मंडलं अट्टारसतीसेहिं सएहिं छेत्ता, तथा णं अट्टारसमुहुत्ते दिवसे भवइ चउहिं एगड्डिभागमुहुत्तेहिं ऊणे, दुवालसमुहुत्ता राई भवइ चउहिं एगड्डिभागमुहुत्तेहिं अहिया, एवं खल्ल एएणवाएणं णिक्खममाणे सूरिए तयाणंतराओ तयाणंतरं मंडलाओ मंडलं संकममाणे २ एगमेणे मंडले एगमेणेणं राइंदिएणं एगमेणं भागं ओयाए दिवसखेत्तस्स णिवुद्धेमाणे २ रयणिलेत्तस्स अभिवुद्धेमाणे २ सव्वबाहिरं मंडलं उवसंकमित्ता चारं चरइ, ता जया णं सूरिए सव्वभ्मंतराओ मंडलाओ सव्वबाहिरं मंडलं उवसंकमित्ता चारं चरइ तथा णं सव्वभ्मंतरं मंडलं पणिहाय एगेणं तेसीएणं राइंदियसएणं एगं तेसीयं भागसयं ओयाए दिवसखेत्तस्स णिवुद्धित्ता रयणिलेत्तस्स अभिवुद्धित्ता चारं चरइ मंडलं अट्टारसहिं तीसेहिं छेत्ता, तथा णं उच्चमकड्डपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, एस णं पढमउम्मासे, एस णं पढमस्स उम्मासस्स पज्जवत्ताणे, से पविसमाणे सूरिए दोच्चं उम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरइ, ता जया णं सूरिए बाहिराणंतरं मंडलं उवसंकमित्ता चारं चरइ तथा णं एगेणं राइंदिएणं एगं भागं ओयाए रयणिलेत्तस्स णिवुद्धित्ता दिवसखेत्तस्स अभिवुद्धित्ता चारं चरइ मंडलं अट्टारसहिं तीसेहिं छेत्ता, तथा णं अट्टारसमुहुत्ता राई भवइ दोहिं एगड्डिभागमुहुत्तेहिं ऊणा, दुवालसमुहुत्ते दिवसे भवइ दोहिं एगड्डिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरइ, ता जया णं सूरिए बाहिरतच्चं

मंडलं उवसंकमिक्ता चारं चरइ तथा णं दोहिं राइंदिएहिं दो भाए ओयाए रयणि-
खेत्तस्स णिवुद्धेत्ता दिवसखेत्तस्स अभिवुद्धेत्ता चारं चरइ मंडलं अट्टारसहिं तीसेहिं०
छेत्ता, तथा णं अट्टारसमुहुत्ता राई भवइ चउहिं एगट्ठिभागमुहुत्तेहिं ऊणा, दुवालस-
मुहुत्ते दिवसे भवइ चउहिं एगट्ठिभागमुहुत्तेहिं अहिए, एवं खलु एएणुवाएणं पवि-
समाणे सूरिए तथाणंतराओ तथाणंतरं मंडलाओ मंडलं संकममाणे २ एगमेगेणं
राइंदिएणं एगमेगं भागं ओयाए रयणिखेत्तस्स णिवुद्धेमाणे २ दिवसखेत्तस्स अभि-
वुद्धेमाणे २ सव्वभंतंरं मंडलं उवसंकमिक्ता चारं चरइ, ता जया णं सूरिए सव्व-
वाहिराओ मंडलाओ सव्वभंतंरं मंडलं उवसंकमिक्ता चारं चरइ तथा णं सव्ववाहिरं
मंडलं पणिहाय एगेणं तेसीएणं राइंदियसएणं एगं तेसीयं भागसयं ओयाए रयणि-
खेत्तस्स णिवुद्धेत्ता दिवसखेत्तस्स अभिवुद्धेत्ता चारं चरइ मंडलं अट्टारसतीसेहिं
सएहिं छेत्ता, तथा णं उत्तमकडुपत्ते उक्कोसए अट्टारसमुहुत्ते दिवसे भवइ, जहणिया
दुवालसमुहुत्ता राई भवइ, एस णं दोच्चे छम्मासे, एस णं दोच्चस्स छम्मासस्स
पजवसाणे, एस णं आइच्चे संबच्छरे, एस णं आइच्चस्स संबच्छरस्स पजवसाणे । २५।

छट्ठं पाहुडं समत्तं ॥६॥

सत्तमं पाहुडं

ता किं ते सूरियं वरंति आहितेति वएजा ? तत्थ खलु इमाओ वीसं पडि-
वत्तीओ पण्णत्ताओ, तं०—तत्थेगे एवमाइंसु—ता मंदरे णं पव्वए सूरियं वरयइ
आहितेति वएजा एगे एवमाइंसु १, एगे पुण एवमाइंसु—ता मेरु णं पव्वए सूरियं
वरइ आहितेति वएजा० २, एवं एएणं अभिलाषेणं णेयइवं जाव पव्वयराए
णं पव्वए सूरियं वरयइ आहितेति वएजा एगे एवमाइंसु २०, वयं पुण एवं
वयामो—ता मंदरेवि ववुच्चइ त्थेव जाव पव्वयराएवि ववुच्चइ, ता जे णं वोग्गला
सूरियस्स लेइं पु.इंति ते णं वोग्गला सूरियं वरयंति, अबिक्कावि णं वोग्गला
सूरियं वरयंति, चरमलेस्संतरगयावि णं वोग्गला सूरियं वरयंति० ॥२६॥ **सत्तमं
पाहुडं समत्तं ॥ ७ ॥**

अट्ठमं पाहुडं

ता कइं ते उदयसंठिई आहितेति वएजा ? तत्थ खलु इमाओ तिण्णि पडि-
वत्तीओ पण्णत्ताओ, तं०—तत्थेगे एवमाइंसु—ता जया णं जंबुदीवे २ दाहिणद्धे

अट्टारसमुहुत्ते दिवसे भवइ तथा णं उत्तरहेवि अट्टारसमुहुत्ते दिवसे भवइ, जया णं उत्तरहे अट्टारसमुहुत्ते दिवसे भवइ तथा णं दाहिणहेवि अट्टारसमुहुत्ते दिवसे भवइ, जया णं जंबुदीवे २ दाहिणहे सत्तरसमुहुत्ते दिवसे भवइ तथा णं उत्तरहेवि सत्तरसमुहुत्ते दिवसे भवइ, जया णं उत्तरहे सत्तरसमुहुत्ते दिवसे भवइ तथा णं दाहिणहेवि सत्तरसमुहुत्ते दिवसे भवइ, एवं (एएणं अभिलावेणं)परिहावेयव्वं, सोल्लसमुहुत्ते दिवसे पण्णरसमुहुत्ते दिवसे चउद्दसमुहुत्ते दिवसे तेरसमुहुत्ते दिवसे जाव जया णं जंबुदीवे २ दाहिणहे बारसमुहुत्ते दिवसे० तथा णं उत्तरहेवि बारसमुहुत्ते दिवसे भवइ, जया णं उत्तरहे बारसमुहुत्ते दिवसे भवइ तथा णं दाहिणहेवि बारसमुहुत्ते दिवसे भवइ, जया णं दाहिणहे बारसमुहुत्ते दिवसे भवइ तथा णं जंबुदीवे २ मंदरस्स पव्वयस्स पुरत्थिमपच्चत्थिमेणं सया पण्णरसमुहुत्ते दिवसे भवइ, सया पण्णरसमुहुत्ता राई भवइ, अणवाट्टिया णं तत्थ राईदिया पण्णत्ता समणाउसो ! एगे एवमाहंसु १, एगे पुण एवमाहंसु—ता जया णं जंबुदीवे २ दाहिणहे अट्टारसमुहुत्ताणंतरे दिवसे भवइ तथा णं उत्तरहेवि अट्टारसमुहुत्ताणंतरे दिवसे भवइ, जया णं उत्तरहे अट्टारसमुहुत्ताणंतरे दिवसे भवइ तथा णं दाहिणहेवि अट्टारसमुहुत्ताणंतरे दिवसे भवइ, एवं परिहावेयव्वं, सत्तरसमुहुत्ताणंतरे दिवसे भवइ सोल्लसमुहुत्ताणंतरे०, पण्णरसमुहुत्ताणंतरे दिवसे भवइ चोद्दसमुहुत्ताणंतरे०, तेरसमुहुत्ताणंतरे०, ता जया णं जंबुदीवे २ दाहिणहे बारसमुहुत्ताणंतरे दिवसे भवइ तथा णं उत्तरहेवि बारसमुहुत्ताणंतरे दिवसे०, जया णं उत्तरहे बारसमुहुत्ताणंतरे दिवसे भवइ तथा णं दाहिणहेवि बारसमुहुत्ताणंतरे दिवसे भवइ, तथा णं जंबुदीवे २ मंदरस्स पव्वयस्स पुरत्थिमपच्चत्थिमेणं गो सया पण्णरसमुहुत्ते दिवसे भवइ, जो सया पण्णरसमुहुत्ता राई भवइ, अणवाट्टिया णं तत्थ राईदिया प० समणाउसो ! एगे एवमाहंसु २, एगे पुण एवमाहंसु—ता जया णं जंबुदीवे २ दाहिणहे अट्टारसमुहुत्ते दिवसे भवइ तथा णं उत्तरहे दुवाल्लसमुहुत्ता राई भवइ, जया णं उत्तरहे अट्टारसमुहुत्ते दिवसे भवइ तथा णं दाहिणहे बारसमुहुत्ता राई भवइ, जया णं दाहिणहे अट्टारसमुहुत्ताणंतरे दिवसे भवइ तथा णं उत्तरहे बारसमुहुत्ता राई भवइ, जया णं उत्तरहे अट्टारसमुहुत्ताणंतरे दिवसे भवइ तथा णं दाहिणहे बारसमुहुत्ता राई भवइ, एवं पेयव्वं सगलेहि य अणंतरेहि य एककेक्के दो दो आलावगा सव्वेहि दुवाल्लसमुहुत्ता राई भवइ जाव ता जया णं जंबुदीवे २ दाहिणहे बारसमुहुत्ताणंतरे दिवसे भवइ तथा णं उत्तरहे दुवाल्लसमुहुत्ता राई भवइ, जया णं उत्तरहे दुवाल्लस-

मुहुत्ताणंतरे दिवसे भवइ तथा णं दाहिणङ्के दुवाल्समुहुत्ता राई भवइ, तथा णं जंबुद्दीवे
 २ मंदरस्स पव्वयस्स पुरत्थिमपच्चत्थिमेणं णेवत्थि पण्णरसमुहुत्ते दिवसे भवइ णेवत्थि
 पण्णरसमुहुत्ता राई भवइ, वोच्छिण्णा णं तत्थ राइंदिया प० समणाउत्तो ! एगे एवमा-
 हंसु ३ । वयं पुण एवंबयाप्पो—ता जंबुद्दीवे २ सूरिया उदीणपाईणमुग्गच्छंति पाईण-
 दाहिणमागच्छंति पाईणदाहिणमुग्गच्छंति दाहिणपडीणमागच्छंति दाहिणपडीणमुग्ग-
 च्छंति पडीणउदीणमागच्छंति पडीणउदीणमुग्गच्छंति उदीणपाईणमागच्छंति, ता
 जया णं जंबुद्दीवे २ दाहिणङ्के दिवसे भवइ तथा णं उत्तरङ्के० दिवसे भवइ, जया णं
 उत्तरङ्के० तथा णं जंबुद्दीवे २ मंदरस्स पव्वयस्स पुरत्थिमपच्चत्थिमेणं राई भवइ,
 ता जया णं जंबुद्दीवे २ मंदरस्स पव्वयस्स पुरत्थिमेणं दिवसे भवइ तथा णं पच्च-
 त्थिमेणवि दिवसे भवइ, जया णं पच्चत्थिमेणं दिवसे भवइ तथा णं जंबुद्दीवे २ मंद-
 रस्स पव्वयस्स उत्तरदाहिणेणं राई भवइ, ता जया णं० दाहिणङ्के उक्कोसए अट्टा-
 रसमुहुत्ते दिवसे भवइ तथा णं उत्तरङ्केवि उक्कोसए अट्टारसमुहुत्ते दिवसे भवइ, जया
 णं उत्तरङ्के० तथा णं जंबुद्दीवे २ मंदरस्स पव्वयस्स पुरत्थिमपच्चत्थिमेणं जहणिया
 दुवाल्समुहुत्ता राई भवइ, ता जया णं जंबुद्दीवे २ मंदरस्स पव्वयस्स पुरत्थिमेणं
 उक्कोसए अट्टारसमुहुत्ते दिवसे भवइ तथा णं पच्चत्थिमेणवि उक्कोसए अट्टारसमुहुत्ते
 दिवसे भवइ, जया णं पच्चत्थिमेणं उक्कोसए अट्टारसमुहुत्ते दिवसे भवइ तथा णं
 जंबुद्दीवे २ मंदरस्स पव्वयस्स उत्तरदाहिणेणं जहणिया दुवाल्समुहुत्ता राई भवइ,
 एवं एवमेणं गमेणं णेयव्वं, अट्टारसमुहुत्ताणंतरे दिवसे भवइ, साइरेगदुवाल्समुहुत्ता
 राई भवइ, सत्तरसमुहुत्ते दिवसे तेरसमुहुत्ता राई, सत्तरसमुहुत्ताणंतरे दिवसे भवइ,
 साइरेगतेरसमुहुत्ता राई भवइ, सोलसमुहुत्ते दिवसे भवइ, चोइसमुहुत्ता राई भवइ,
 सोलसमुहुत्ताणंतरे दिवसे भवइ, साइरेगचोइसमुहुत्ता राई भवइ, पण्णरसमुहुत्ते दिवसे
 पण्णरसमुहुत्ता राई, पण्णरसमुहुत्ताणंतरे दिवसे० साइरेगपण्णरसमुहुत्ता राई भवइ,
 चोइसमुहुत्ते दिवसे सोलसमुहुत्ता राई, चोइसमुहुत्ताणंतरे दिवसे साइरेगसोलस-
 मुहुत्ता राई, तेरसमुहुत्ते दिवसे सत्तरसमुहुत्ता राई, तेरसमुहुत्ताणंतरे दिवसे साइरेग-
 सत्तरसमुहुत्ता राई, ता जया णं जंबुद्दीवे दीवे दाहिणङ्के जहणिए दुवाल्समुहुत्ताए
 दिवसे भवइ तथा णं उत्तरङ्के० जहणिए दुवाल्समुहुत्ते दिवसे भवइ, ता जया णं
 उत्तरङ्के जहणिए दुवाल्समुहुत्ते दिवसे भवइ तथा णं जंबुद्दीवे २ मंदरस्स पव्वयस्स
 पुरत्थिमपच्चत्थिमेणं उक्कोसिया अट्टारसमुहुत्ता राई भवइ, ता जया णं जंबुद्दीवे २

मंदरस्स पव्वयस्स पुरान्थिमेणं जहण्णए दुवाल्समुहुत्ते दिवसे भवइ तथा णं पच्चत्थि-
मेणवि जहण्णए दुवाल्समुहुत्ते दिवसे भवइ, जया णं पच्चत्थिमेणं जहण्णए दुवाल्स-
मुहुत्ते दिवसे भवइ तथा णं जम्बुद्दीवे २ मंदरस्स० उत्तरदाहिणेणं उवकोसिया अट्टा-
रसमुहुत्ता राई भवइ, ता जया णं जम्बुद्दीवे २ दाहिण्णहे वासाणं पटमे समए पडिवज्जइ
तया णं उत्तरहेवि वासाणं पटमे समए पडिवज्जइ, जया णं उत्तरहे वासाणं पटमे
समए पडिवज्जइ तथा णं जम्बुद्दीवे २ मंदरस्स पव्वयस्स पुरत्थिमपच्चत्थिमेणं अणं-
तरपुरक्खडकाल्समयंसि वासाणं पटमे समए पडिवज्जइ, ता जया णं जम्बुद्दीवे २
मंदरस्स पव्वयस्स पुरत्थिमेणं वासाणं पटमे समए पडिवज्जइ तथा णं पच्चत्थिमेणवि
वासाणं पटमे समए पडिवज्जइ, जया णं पच्चत्थिमेणं वासाणं पटमे समए पडिवज्जइ
तया णं जम्बुद्दीवे २ मंदरउत्तरदाहिणेणं अणंतरपच्छाकडकाल्सयं सि वासाणं पटमे
समए पडिवण्णे भवइ, जहा समओ एवं आवलिया आणापाणू थोवे लवे मुहुत्ते
अहोरत्ते पक्खे मासे ऊऊ, एवं दस आलावगा जहा वासाणं एवं हेमंताणं गिम्हाणं
च भाणियव्वा, ता जया णं जम्बुद्दीवे २ दाहिण्णहे पटमे अयणे पडिवज्जइ तथा णं
उत्तरहेवि पटमे अयणे पडिवज्जइ, जया णं उत्तरहे पटमे अयणे पडिवज्जइ तथा णं
दाहिण्णहेवि पटमे अयणे पडिवज्जइ, जया णं उत्तरहे पटमे अयणे पडिवज्जइ तथा णं
जम्बुद्दीवे २ मंदरस्स पव्वयस्स पुरत्थिमपच्चत्थिमेणं अणंतरपुरक्खडकाल्समयंसि
पटमे अयणे पडिवज्जइ, ता जया णं जम्बुद्दीवे २ मंदरस्स पव्वयस्स पुरत्थिमेणं
पटमे अयणे पडिवज्जइ, तथा णं पच्चत्थिमेणवि पटमे अयणे पडिवज्जइ, जया णं
पच्चत्थिमेणं पटमे अयणे पडिवज्जइ तथा णं जम्बुद्दीवे २ मंदरस्स पव्वयस्स उत्तर-
दाहिणेणं अणंतरपच्छाकडकाल्समयंसि पटमे अयणे पडिवण्णे भवइ, जहा अयणे
तहा संवच्छरे जुगे वाससए, एवं वाससहस्से वाससयसहस्से पुव्वंगे पुव्वे एवं जाव
सीसपहेलिया पलिओवमे सागरोवमे, ता जया णं जम्बुद्दीवे २ दाहिण्णहे उस्सप्पिणी
पडिवज्जइ तथा णं उत्तरहेवि उस्सप्पिणी पडिवज्जइ, जया णं उत्तरहे उस्सप्पिणी
पडिवज्जइ तथा णं जम्बुद्दीवे २ मंदरस्स पव्वयस्स पुरत्थिमपच्चत्थिमेणं णेवत्थि
उस्सप्पिणी णेव अत्थि ओसप्पिणी अवट्ठिए णं तत्थ काले पण्णत्ते समणाउसो !०
एवं ओस्सप्पिणीवि । ता जया णं लवणे समुहे दाहिण्णहे दिवसे भवइ तथा णं
लवणसमुहे उत्तरहे० दिवसे भवइ, जया णं उत्तरहे दिवसे भवइ तथा णं लवणसमुहे
पुरत्थिमपच्चत्थिमेणं राई भवइ, जहा जम्बुद्दीवे २ तहेव जाव उस्सप्पिणी०, तथा
धायइसंडे णं दीवे सूरिया उदीण० तहेव, ता जया णं धायइसंडे दीवे दाहिण्णहे

दिवसे भवइ तथा णं उत्तरहेवि दिवसे भवइ, जया णं उत्तरहे दिवसे भवइ तथा णं धायइसंडे दीवे मंदराणं पव्वयाणं पुरत्थिमपच्चत्थिमेणं राई भवइ, एवं जम्बुदीवे २ जहा तहेव जाव उस्सप्पिणी०, काल्हेए णं जहा लवणे समुद्दे तहेव, ता अब्भंतर-पुक्खरद्धे णं सूरिया उदीणपाईणमुमाच्छ तहेव, ता जया णं अब्भंतरपुक्खरद्धे णं दाहिणहे दिवसे भवइ तथा णं उत्तरहेवि दिवसे भवइ, जया णं उत्तरहे दिवसे भवइ तथा णं अब्भंतरपुक्खरद्धे मंदराणं पव्वयाणं पुरत्थिमपच्चत्थिमेणं राई भवइ, सेसं जहा जम्बुदीवे २ तहेव जाव उस्सप्पिणीओसप्पिणीओ ॥२७॥ अट्टमं पाहुडं समत्तं ॥८॥

णवमं पाहुडं

ता कइकट्टं ते सूरिए पोरिसिच्छायं णिव्वत्तेइ आहितेति वएज्जा ? तत्थ खलु इमाओ तिण्णि पडिवत्तीओ पण्णत्ताओ, तं०-तत्थेगे एवमाहंसु-ता जे णं पोग्गला सूरियस्स लेसं फुसंति ते णं पोग्गला संतप्पंति, ते णं पोग्गला संतप्पमाणा तयणं-तराहं बाहिराहं पोग्गलाहं संतावेंतीति एस णं से समिए तावक्खेत्ते एगे एवमाहंसु १, एगे पुण एवमाहंसु-ता जे णं पोग्गला सूरियस्स लेसं फुसंति ते णं पोग्गला णो संतप्पंति, ते णं पोग्गला असंतप्पमाणा तयणंतराहं बाहिराहं पोग्गलाहं णो संता-वेंतीति एस णं से समिए तावक्खेत्ते एगे एवमाहंसु २, एगे पुण एवमाहंसु-ता जे णं पोग्गला सूरियस्स लेसं फुसंति ते णं पोग्गला अत्थेगइया संतप्पंति अत्थेगइया णो संतप्पंति, तत्थ अत्थेगइया संतप्पमाणा तयणंतराहं बाहिराहं पोग्गलाहं संतावेंति अत्थेगइया असंतप्पमाणा तयणंतराहं बाहिराहं पोग्गलाहं णो संतावेंति, एस णं से समिए तावक्खेत्ते एगे एवमाहंसु ३ । वयं पुण एवं वयामो-ता जाओ इमाओ चंदिमसूरियाणं देवाणं विमाणेहितो लेसाओ बहिया [उच्छूढा] अभिणिसट्ठाओ पतावेंति, एयासि णं लेसाणं अंतरेसु अण्णयरीओ छिण्णलेसाओ संमुच्छंति, तए णं ताओ छिण्णलेसाओ संमुच्छियाओ समाणीओ तयणंतराहं बाहिराहं पोग्गलाहं संतावेंति इइ एस णं से समिए तावक्खेत्ते ॥२८॥ ता कइकट्टे ते सूरिए पोरिसि-च्छायं णिव्वत्तेइ आहितेति वएज्जा ? तत्थ खलु इमाओ ण्णवीसं पडिवत्तीओ पण्णत्ताओ, तं०-तत्थेगे एवमाहंसु-ता अणुसमयमेव सूरिए पोरिसिच्छायं णिव्वत्तेइ आहितेति वएज्जा एगे एवमाहंसु १, एगे पुण एवमाहंसु-ता अणुमुहुत्तमेव सूरिए

पोरिसिच्छायं णिव्वत्तेइ आहितेति वएजा०, एवं एएणं अभिलावेणं णेयव्वं, ता जाओ चेव ओयसंठिईए पणवीसं पडिवत्तीओ ताओ चेव णेयव्वाओ जाव अणु-उस्सण्णिणी०मेव सूरिए पोरिसिच्छायं णिव्वत्तेइ आहिताति वएजा, एगे एवमाहंसु २५ । वयं पुण एवं वयामो—ता सूरियस्स णं उच्चत्तं च लेसं च पडुच्च छाउद्देसे उच्चत्तं च छायं च पडुच्च लेसुद्देसे लेसं च छायं च पडुच्च उच्चत्तुद्देसे, तत्थ खलु इमाओ दु । पडिवत्तीओ पणत्ताओ. तं०—तत्थेगे एवमाहंसु—ता अत्थि णं से दिवसे जंसि च णं दिवसंसि सूरिए चउपोरिसिच्छायं णिव्वत्तेइ, अत्थि णं से दिवसे जंसि च णं दिवसंसि सूरिए दुपोरिसिच्छायं णिव्वत्तेइ० एगे एवमाहंसु १, एगे पुण एवमाहंसु—ता अत्थि णं से दिवसे जंसि च णं दिवसंसि सूरिए दुपोरिसिच्छायं णिव्वत्तेइ, अत्थि णं से दिवसे जंसि० दिवसंसि सूरिए णो किंचि पोरिसिच्छायं णिव्वत्तेइ०२, तत्थ जे ते एवमाहंसु—ता अत्थि णं से दिवसे जंसि च णं दिवसंसि सूरिए चउपोरिसियं छायं णिव्वत्तेइ, अत्थि णं से दिवसे जंसि च णं दिवसंसि सूरिए दुपोरिसियं छायं णिव्वत्तेइ, ते एवमाहंसु—ता जया णं सूरिए सव्वब्भंतरं मंडलं उवसंकमित्ता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, तंसि च णं दिवसंसि सूरिए चउपोरिसियं छायं णिव्वत्तेइ, तं०—उग्गमणमुहुत्तंसि य अत्थमणमुहुत्तंसि य, लेसं अभिवट्ठेमाणे णो चेव णं णिवुट्ठेमाणे, ता जया णं सूरिए सव्वबाहिरं मंडलं उवसंकमित्ता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ, जहणए दुवालसमुहुत्ते दिवसे भवइ, तंसि च णं दिवसंसि सूरिए दुपोरिसियं छायं णिव्वत्तेइ, तं०—उग्गमणमुहुत्तंसि य अत्थमणमुहुत्तंसि य, लेसं अभिवट्ठेमाणे णो चेव णं णिवुट्ठेमाणे० १, तत्थ णं जे ते एवमाहंसु—ता अत्थि णं से दिवसे जंसि च णं दिवसंसि सूरिए दुपोरिसियं छायं णिव्वत्तेइ, अत्थि णं से दिवसे जंसि च णं दिवसंसि सूरिए णो किंचि पोरिसियं छायं णिव्वत्तेइ, ते एवमाहंसु—ता जया णं सूरिए सव्वब्भंतरं मंडलं उवसंकमित्ता चारं चरइ तथा णं उत्तमकट्टपत्ते उक्कोसए अट्टारसमुहुत्ते दिवसे भवइ, जहणिया दुवालसमुहुत्ता राई भवइ, तंसि च णं दिवसंसि सूरिए दुपोरिसियं छायं णिव्वत्तेइ, तं०—उग्गमणमुहुत्तंसि य अत्थमणमुहुत्तंसि य, लेसं अभिवट्ठेमाणे णो चेव णं णिवुट्ठेमाणे०, ता जया णं सूरिए सव्वबाहिरं मंडलं उवसंकमित्ता चारं चरइ तथा णं उत्तमकट्टपत्ता उक्कोसिया अट्टारसमुहुत्ता राई भवइ,

जहण्णए दुवाल्समुहुत्ते दिवसे भवइ, तंसि च णं दिवसंसि सूरिए णो किंचि पोरि-
सिच्छायं णिव्वत्तेइ, तं०—उगमणमुहुत्तंसि य अत्थमणमुहुत्तंसि य, णो चेव णं लेसं
अभिवुद्धेमाणे वा णिवुद्धेमाणे वा०२, ता कइकइं ते सूरिए पोरिसिच्छायं णिव्वत्तेइ
आहिताति बएजा ? तत्थ खलु इमाओ छण्णउई पडिबत्तीओ पणत्ताओ, तं०—तत्थेगे
एवमाहंसु—ता अत्थि णं से देसे जंसि च णं देसंसि सूरिए एगपोरिसियं छांयं णिव्व-
त्तेइ० एगे एवमाहंसु, एगे पुण एवमाहंसु—ता अत्थि णं से देसे जंसि च णं देसंसि
सूरिए दुपोरिसियं छांयं णिव्वत्तेइ०, एवं एएणं अभिलावेणं णेयव्वं जाव छण्णउई
पोरिसिच्छायं णिव्वत्तेइ, तत्थ जे ते एवमाहंसु—ता अत्थि णं से देसे जंसि च णं देसंसि
सूरिए एगपोरिसियं छांयं णिव्वत्तेइ, ते एवमाहंसु—ता सूरियस्स णं सव्वहेट्ठिमाओ
सूरप्पडिहीओ बहिया अभिणिसट्ठाहिं लेसाहिं ताडिज्जमाणीहिं इमीसे रयणप्पभाए
पुढवीए बहुसमरमणिजाओ भूमिभागाओ जावइयं सूरिए उट्ठं उच्चत्तेणं एवइयाए
एगाई अद्दाए एगेणं छायाणुमाणप्पमाणेणं उमाए तत्थ से सूरिए एगपोरिसियं
छायं णिव्वत्तेइ, तत्थ जे ते एवमाहंसु—ता अत्थि णं से देसे जंसि च णं देसंसि
सूरिए दुपोरिसियं छांयं णिव्वत्तेइ, ते एवमाहंसु—ता सूरियस्स णं सव्वहेट्ठिमाओ
सूरियप्पडिहीओ बहिया अभिणिसट्ठियाहिं लेसाहिं ताडिज्जमाणीहिं इमीसे रयणप्प-
भाए पुढवीए बहुसमरमणिजाओ भूमिभागाओ जावइयं सूरिए उट्ठं उच्चत्तेणं एवइ-
याहिं दोहिं अद्दाहिं दोहिं छायाणुमाणप्पमाणेहिं उमाए एत्थ णं से सूरिए दुपोरिसियं
छायं णिव्वत्तेइ, एवं णेयव्वं जाव तत्थ जे ते एवमाहंसु—ता अत्थि णं से देसे जंसि च
णं देसंसि सूरिए छण्णउई पोरिसियं छांयं णिव्वत्तेइ, ते एवमाहंसु—ता सूरियस्स णं
सव्वहेट्ठिमाओ सूरप्पडिहीओ बहिया अभिणिसट्ठाहिं लेसाहिं ताडिज्जमाणीहिं इमीसे
रयणप्पभाए पुढवीए बहुसमरमणिजाओ भूमिभागाओ जावइयं सूरिए उट्ठं उच्चत्तेणं
एवइयाहिं छण्णवईए छायाणुमाणप्पमाणाहिं उमाए एत्थ णं से सूरिए छण्णउई
पोरिसियं छांयं णिव्वत्तेइ एगे एवमाहंसु, वयं पुण एवं वयामो—ता साइरेगअउणट्ठि-
पोरिसीणं सूरिए पोरिसिच्छायं णिव्वत्तेइ०, ता अवड्ढपोरिसी णं छाया दिवसस्स किं
गए वा सेसे वा ? ता तिभागे गए वा सेसे वा, ता पोरिसी णं छाया दिवसस्स किं
गए वा सेसे वा ? ता चउब्भागे गए वा सेसे वा, ता दिवड्ढपोरिसी णं छाया
दिवसस्स किं गए वा सेसे वा ? ता पंचमभागे गए वा सेसे वा, एवं अद्दपोरिसिं
छोटुं पुच्छा दिवसस्स भागं जेटुं वागरणं जाव ता अद्दअउणासट्ठिपोरिसीछाया

दिवसस्स किं गए वा सेसे वा ? ता एगूणवीससयभागे गए वा सेसे वा, ता अउणा-
सट्टिपोरिसी णं छाया दिवसस्स किं गए वा सेसे वा ? ता बार्वाससहस्सभागे गए
वा सेसे वा, ता साइरेगअउणासट्टिपोरिसी णं छाया दिवसस्स किं गए वा सेसे वा ?
ता णत्थि किंचि गए वा सेसे वा, तत्थ खलु इमा पणवीसणिविद्धा छाया ५०, तं०-
खंमच्छाया रज्जुच्छाया पागारच्छाया पासायच्छाया उवगच्छाया उच्चत्तच्छाया
अणुलोमच्छाया आरुभिया समा पडिहया खीलच्छाया पक्खच्छाया पुरओउदया
पुरिमकंठमाउवगया पच्छिमकंठमाउवगया छायाणुवाइणी किट्ठाणुवाइणीछाया छाय-
छाया १७गोलछाया, तत्थ णं गोलच्छाया अट्टविहा पणत्ता, तंजहा-गोलच्छाया अवट्ट-
गोलच्छाया गाढलगोलच्छाया अवट्टगाढलगोलच्छाया गोलवल्लिच्छाया अवट्टगोला-
वल्लिच्छाया गोलपुंजच्छाया अवट्टगोलपुंजच्छाया २५ ॥ २९ ॥ णवमं पाहुडं
समत्तं । ६ ॥

दसमं पाहुडं

ता जोगेति वत्थुस्स आवलियाणिवाए आहितेति वएजा, ता क्हं ते जोगेति
वत्थुस्स आवलियाणिवाए आहितेति वएजा ? तत्थ खलु इमाओ पंच पडिवत्तीओ
पणत्ताओ, तं०-तत्थेगे एवमाहंसु-ता सव्वेवि णं णक्खत्ता कत्तियाइया भरणिपज्जव-
साणा ५० एगे एवमाहंसु १, एगे पुण एवमाहंसु-ता सव्वेवि णं णक्खत्ता महाइया
अस्सेसपज्जवसाणा पणत्ता एगे एवमाहंसु २, एगे पुण एवमाहंसु-ता सव्वेवि णं
णक्खत्ता घणिट्ठाइया सवणपज्जवसाणा पणत्ता एगे एवमाहंसु ३, एगे पुण एवमाहंसु-
ता सव्वेवि णं णक्खत्ता अस्सिणीआइया रेवइपज्जवसाणा ५० एगे एवमाहंसु ४,
एगे पुण एवमाहंसु-ता सव्वेवि णं णक्खत्ता भरणीआइया अस्सिणीपज्जवसाणा ०
एगे एवमाहंसु ५, वयं पुण एवं वयामो-ता सव्वेवि णं णक्खत्ता अभिईआइया
उत्तरासाढापज्जवसाणा पणत्ता, तंजहा-अभिई सवणो जाव उत्तरासाढा ॥ ३० ॥

दसमस्स पाहुडस्स पढमं पाहुडपाहुडं समत्तं ॥ १०-१॥

ता क्हं ते मुहुत्ता आहितेति वएजा ? ता एएसि णं अट्टावीसाए णक्खत्ताणं
अत्थि णक्खत्ते जे णं णव मुहुत्ते सत्तावीसं च सत्तट्टिभागे मुहुत्तस्स चंदेण सद्धि
जोयं जोएइ, अत्थि णक्खत्ता जे णं पण्णरस मुहुत्ते चंदेण सद्धि जोयं जोएंति,
अत्थि णक्खत्ता जे णं तीसं मुहुत्ते चंदेण सद्धि जोयं जोएंति, अत्थि णक्खत्ता जे

णं पणयालीसे मुहुत्ते चंदेण सद्धिं जोयं जोएंति, ता एएसि णं अट्टावीसाए णक्खत्ताणं कयरे णक्खत्ते जे णं णवमुहुत्ते सत्तावीसं च सत्तट्ठिभाए मुहुत्तस्स चंदेण सद्धिं जोयं जोएइ, कयरे णक्खत्ता जे णं पण्णरसमुहुत्ते चंदेण सद्धिं जोयं जोएंति, कयरे णक्खत्ता जे णं तीसं मुहुत्ते चंदेण सद्धिं जोयं जोएंति, कयरे णक्खत्ता जे णं पणयालीसं मुहुत्ते चंदेण सद्धिं जायं जोएंति ? ता एएसि णं अट्टावीसाए णक्खत्ताणं तत्थ जे से णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण सद्धिं जायं जोएइ से णं एगे अभीई, तत्थ जे ते णक्खत्ता जे णं पण्णरसमुहुत्ते चंदेण सद्धिं जोयं जोएंति ते णं छ, तं०-सयमित्तया भरणी अहा अस्सेसा साई जेट्टा, तत्थ जे ते णक्खत्ता जे णं तीसं मुहुत्तं चंदेण सद्धिं जोयं जोएंति ते णं पण्णरस, तं०-सवणे धणिट्ठा पुव्वाभह्वया रेवई अस्सिणी कत्तिया मिगसिरपुस्सा महा पुव्वाफगुणी हत्थो चित्ता अणुराहा मूले पुव्वासाढा, तत्थ जे ते णक्खत्ता जे णं पणयालीसं मुहुत्ते चंदेण सद्धिं जोयं जोएंति ते णं छ, तंजहा-उत्तराभह्वया रोहिणी पुणव्वसू उत्तराफगुणी विसाहा उत्तरासाढा ॥ ३१ ॥ ता एएसि णं अट्टावीसाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएइ, अत्थि णक्खत्ता जे णं छ अहोरत्ते एकवीसं च मुहुत्ते सूरिएण सद्धिं जोयं जोएंति, अत्थि णक्खत्ता जे णं तेरस अहोरत्ते बारस य मुहुत्ते सूरिएण सद्धिं जोयं जोएंति, अत्थि णक्खत्ता जे णं वीसं अहोरत्ते तिण्णि य मुहुत्ते सूरिएण सद्धिं जोयं जोएंति, ता एएसि णं अट्टावीसाए णक्खत्ताणं कयरे णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएइ, कयरे णक्खत्ता जे णं छ अहोरत्ते एकवीस-मुहुत्ते सूरिएण सद्धिं जोयं जोएंति, कयरे णक्खत्ता जे णं तेरस अहोरत्ते बारस मुहुत्ते सूरिएण सद्धिं जोयं जोएंति, कयरे णक्खत्ता जे णं वीसं अहोरत्ते तिण्णि य मुहुत्ते सूरिएण सद्धिं जोयं जोएंति, ता एएसि णं अट्टावीसाए णक्खत्ताणं तत्थ जे से णक्खत्ते जे णं चत्तारि अहोरत्ते छच्च मुहुत्ते सूरिएण सद्धिं जोयं जोएइ से णं एगे अभीई, तत्थ जे ते णक्खत्ता जे णं छ अहोरत्ते एकवीसं च मुहुत्ते सूरिएण सद्धिं जोयं जोएंति ते णं छ, तंजहा-सयमित्तया भरणी अहा अस्सेसा साई जेट्टा, तत्थ जे ते तेरस अहोरत्ते दुवालस य मुहुत्ते सूरिएण सद्धिं जोयं जोएंति ते णं पण्णरस, तंजहा-सवणो धणिट्ठा पुव्वाभह्वया रेवई अस्सिणी कत्तिया मिगसिरं पूसो महा पुव्वाफगुणी हत्थो चित्ता अणुराहा मूले पुव्वासाढा, तत्थ जे ते णक्खत्ता जे णं वीसं

अहोरत्ते तिण्णि य मुहुत्ते सूरेण सद्धिं जोयं जोएंति ते णं छ, तंजहा—उत्तराभइवया रोहिणी पुणव्वसू उत्तराफग्गुणी विसाहा उत्तरासाढा ॥ ३२ ॥ **दसमस्स पाहुडस्स विइयं पाहुडपाहुडं समत्तं ॥ १०-२ ॥**

ता कहं ते एवंभागा आहिताति वएजा ! ता एएसि णं अट्ठावीसाए णक्खत्ताणं अत्थि णक्खत्ता पुव्वंभागा समक्खेत्ता तीसइमुहुत्ता प०, अत्थि णक्खत्ता पच्छंभागा समक्खेत्ता तीसइमुहुत्ता प०, अत्थि णक्खत्ता णत्तंभागा अवड्ढक्खेत्ता पण्णरसमुहुत्ता प०, अत्थि णक्खत्ता उभयंभागा दिवड्ढक्खेत्ता पणयालीसं मुहुत्ता प०, ता एएसि णं अट्ठावीसाए णक्खत्ताणं कयरे णक्खत्ता० पुव्वंभागा समक्खेत्ता तीसइमुहुत्ता प० जाव कयरे णक्खत्ता० उभयंभागा दिवड्ढक्खेत्ता पणयालीसइमुहुत्ता प० ? ता एएसि णं अट्ठावीसाए णक्खत्ताणं तत्थ जे ते णक्खत्ता पुव्वंभागा समक्खेत्ता तीसइमुहुत्ता प० ते णं छ, तंजहा—पुव्वापोडवया कत्तिया महा पुव्वाफग्गुणी मूलो पुव्वासाढा, तत्थ जे ते णक्खत्ता० पच्छंभागा समक्खेत्ता तीसइमुहुत्ता प० ते णं दस, तंजहा—अभिई सवणो धणिट्ठा रेवई अस्सिणी मिगसिरं पूसो इत्थो चित्ता अणुराहा, तत्थ जे ते णक्खत्ता० णत्तंभागा अवड्ढक्खेत्ता पण्णरसमुहुत्ता प० ते णं छ, तंजहा—सयभिसया भरणी अहा अस्सेसा साई जेट्ठा, तत्थ जे ते णक्खत्ता० उभयंभागा दिवड्ढक्खेत्ता पणयालीसं मुहुत्ता प० ते णं छ, तंजहा—उत्तरापोडवया रोहिणी पुणव्वसू उत्तराफग्गुणी विसाहा उत्तरासाढा ॥ ३३ ॥ **दसमस्स पाहुडस्स तइयं पाहुडपाहुडं समत्तं ॥ १०-३ ॥**

ता कहं ते जोगस्स आई आहिताति वएजा ! ता अभीईसवणा खलु दुवे णक्खत्ता पच्छंभागा समक्खेत्ता साइरेगऊयालीसइमुहुत्ता तप्पटमयाए सायं चंदेण सद्धिं जोयं जोएंति, तओ पच्छा अवरं साइरेयं दिवसं, एवं खलु अभीईसवणा दुवे णक्खत्ता एगराहं एगं च साइरेगं दिवसं चंदेण सद्धिं जोयं जोएंति जोयं जोएत्ता जोयं अणुपरियट्ठंति जोयं अणुपरियट्ठित्ता सायं चंदं धणिट्ठाणं समप्पेति, ता धणिट्ठा खलु णक्खत्ते पच्छंभागे समक्खेत्ते तीसइमुहुत्ते तप्पटमयाए सायं चंदेण सद्धिं जोयं जोएइ २ ता तओ पच्छा राहं अवरं च दिवसं, एवं खलु धणिट्ठा णक्खत्ते एगं च राहं एगं च दिवसं चंदेण सद्धिं जोयं जोएइ जोएत्ता जोयं अणुपरियट्ठइ जोयं अणुपरियट्ठित्ता सायं चंदं सयभिसयाणं समप्पेइ, ता सयभिसया खलु णक्खत्ते णत्तंभागे अवड्ढक्खेत्ते पण्णरसमुहुत्ते तप्पटमयाए सायं चंदेण सद्धिं जोयं जोएइ णो लभइ

अवरं दिवसं, एवं खलु सयभिसया णक्खत्ते एगं राइं चंदेण सद्धिं जोयं जोएइ जोयं जोएत्ता जोयं अणुपरियइइ जोयं अणुपरियट्टित्ता पाओ चंदं पुव्वाणं पोड्ववयाणं समप्पेइ, ता पुव्वापोड्ववया खलु णक्खत्ते पुव्वंभागे समक्खत्ते तीसइमुहुत्ते तप्पटमयाए पाओ चंदेण सद्धिं जोयं जोएइ, तओ पच्छा अवरराइं, एवं खलु पुव्वापोड्ववया णक्खत्ते एगं च दिवसं एगं च राइं चंदेण सद्धिं जोयं जोएइ २ ता जोयं अणुपरियइइ २ ता पाओ चंदं उत्तरापोड्ववयाणं समप्पेइ, ता उत्तरापोड्ववया खलु णक्खत्ते उभयंभागे दिवइक्खत्ते पणयालीसइमुहुत्ते तप्पटमयाए पाओ चंदेण सद्धिं जोयं जोएइ अवरं च राइं तओ पच्छा अवरं दिवसं, एवं खलु उत्तरापोड्ववया णक्खत्ते दो दिवसे एगं च राइं चंदेण सद्धिं जोयं जोएइ जोएत्ता जोयं अणुपरियइइ २ ता सायं चंदं रेवेईणं समप्पेइ, ता रेवईं खलु णक्खत्ते पच्छंभागे समक्खत्ते तीसइमुहुत्ते तप्पटमयाए सायं चंदेण सद्धिं जोयं जोएइ, तओ पच्छा अवरं दिवसं, एवं खलु रेवईं णक्खत्ते एगं राइं एगं च दिवसं चंदेण सद्धिं जोयं जोएइ २ ता जोयं अणुपरियइइ २ ता सायं चंदं अस्सिणीणं समप्पेइ, ता अस्सिणी खलु णक्खत्ते पच्छंभागे समक्खत्ते तीसइमुहुत्ते तप्पटमयाए सायं चंदेण सद्धिं जोयं जोएइ, तओ पच्छा अवरं दिवसं, एवं खलु अस्सिणी णक्खत्ते एगं च राइं एगं च दिवसं चंदेण सद्धिं जोयं जोएइ २ ता जोयं अणुपरियइइ २ ता सायं चंदं भरणीणं समप्पेइ, ता भरणी खलु णक्खत्ते णत्तंभागे अवइक्खत्ते पण्णरसमुहुत्ते तप्पटमयाए सायं चंदेण सद्धिं जोयं जोएइ, णो लभइ अवरं दिवसं, एवं खलु भरणी णक्खत्ते एगं राइं चंदेण सद्धिं जोयं जोएइ २ ता जोयं अणुपरियइइ २ ता पाओ चंदं कत्तियाणं समप्पेइ, ता कत्तिया खलु णक्खत्ते पुव्वंभागे समक्खत्ते तीसइमुहुत्ते तप्पटमयाए पाओ चंदेण सद्धिं जोयं जोएइ, तओ पच्छा राइं, एवं खलु कत्तिया णक्खत्ते एगं च दिवसं एगं च राइं चंदेण सद्धिं जोयं जोएइ २ ता जोयं अणुपरियइइ २ ता पाओ चंदं रोहिणीणं समप्पेइ, रोहिणी जहा उत्तराभहवया मिगसिरं जहा धणिट्ठा अहा जहा सयभिसया पुणव्वसू जहा उत्तराभहवया पुस्तो जहा धणिट्ठा अस्सेसा जहा सयभिसया महा जहा पुव्वाफग्गुणी पुव्वाफग्गुणी जहा पुव्वाभहवया उत्तराफग्गुणी जहा उत्तराभहवया इत्थो चित्ता य जहा धणिट्ठा साई जहा सयभिसया विसाहा जहा उत्तराभहवया अणुसाहा जहा धणिट्ठा सयभिसया मूला पुव्वासाहा य जहा पुव्वाभहवया उत्तरासाहा जहा उत्तराभहवया ॥ ३४ ॥

दसमस्स पाहुडस्स चउत्थं पाहुडपाहुडं समत्तं ॥ १०-४॥

ता कंहं ते कुला उवकुला कुलोवकुला आहिताति वएजा ? तत्थ खलु इमे बारस कुला बारस उवकुला चत्तारि कुलोवकुला प०, बारस कुला०, तंजहा-धणिट्टाकुलं उत्तराभद्वयाकुलं अस्सिणीकुलं कत्तियाकुलं संठाणाकुलं पुस्साकुलं महाकुलं उत्तरा-फग्गुणीकुलं चित्ताकुलं विसाहाकुलं मूलाकुलं उत्तरासाढाकुलं, बारस उवकुला०, तंजहा-सवणो उवकुलं पुव्वापुट्टवयाउवकुलं रेवईउवकुलं भरणीउवकुलं रोहिणीउव-कुलं पुणव्वसूउवकुलं अस्सेसाउवकुलं पुव्वाफग्गुणीउवकुलं हत्थाउवकुलं साईउवकुलं जेट्टाउवकुलं पुव्वासाढाउवकुलं, चत्तारि कुलोवकुला०, तंजहा-अभीईकुलोवकुलं सयभिसयाकुलोवकुलं अद्दाकुलोवकुलं अणुराहाकुलोवकुलं ॥ ३५ ॥ दसमस्स पाहुडस्स पंचमं पाहुडपाहुडं समत्तं ॥ १०-५ ॥

ता कंहं ते पुण्णिमासिणी आहितेति वएजा ? तत्थ खलु इमाओ बारस पुण्णि-मासिणीओ बारस अमावासाओ पण्णत्ताओ, तंजहा-साविट्ठी पोडुवई आसोया कत्तिया मग्गसिरी पोसी माही फग्गुणी चेत्ती वेसाही जेट्टामूली आसाढी, ता साविट्ठिण्णं पुण्णिमासिं कइ णक्खत्ता जोएति ? ता तिण्णि णक्खत्ता जोएति, तंजहा-अभिई सवणो धणिट्टा, पुडुवइण्णं पुण्णिमं कइ णक्खत्ता जोएति ? ता तिण्णि णक्खत्ता जोएति, तंजहा-सयभिसया पुव्वापोडुवया उत्तरापोडुवया, ता आसोइण्णं पुण्णिमं कइ णक्खत्ता जोएति ? ता दोण्णि णक्खत्ता जोएति, तंजहा-रेवई य अस्सिणी य, ता कत्तियण्णं पुण्णिमं कइ णक्खत्ता जोएति ? ता दोण्णि णक्खत्ता जोएति, तंजहा-भरणी कत्तिया य, ता मग्गसिरीपुण्णिमं कइ णक्खत्ता जोएति ? ता दोण्णि णक्खत्ता जोएति, तंजहा-रोहिणी भिगसिरो य, ता पोसिण्णं पुण्णिमं कइ णक्खत्ता जोएति ? ता तिण्णि णक्खत्ता जोएति, तंजहा-अद्दा पुण-व्वसू पुस्सो, ता माहिण्णं पुण्णिमं कइ णक्खत्ता जोएति ? ता दोण्णि णक्खत्ता जोएति, तं०-अस्सेसा महा य, ता फग्गुणिण्णं पुण्णिमं कइ णक्खत्ता जोएति ? ता कुण्णि णक्खत्ता जोएति, तं०-पुव्वाफग्गुणी उत्तराफग्गुणी य, ता चैत्तिण्णं पुण्णिमं कइ णक्खत्ता जोएति ? ता दोण्णि०, तं०-हत्थो विसा य, ता वेसाहिण्णं पुण्णिमं कइ णक्खत्ता जोएति ? ता दोण्णि णक्खत्ता जोएति, तं०-साई विसाहा य, ता जेट्टामूलिण्णं पुण्णिमासिणिं कइ णक्खत्ता जोएति ? ता तिण्णि णक्खत्ता जोएति, तं०-अणुराहा जेट्टा मूलो, ता आसाढिण्णं पुण्णिमं कइ णक्खत्ता जोएति ? ता दो णक्खत्ता जोएति, तंजहा-पुव्वासाढा उत्तरासाढा ॥ ३६ ॥ [णाउमिह अमावासं जइ

इच्छसि कम्मि होइ रिक्खम्मि । अवहारं ठाविज्जा तत्तियरुवेहि संगुणए ॥ १ ॥
छावट्टी य मुहुत्ता विसट्टिभागा य पंच पडिपुण्णा । वासट्टिभागसत्तट्टिगो य इवको
इवइ भागो ॥२॥ एयमवहाररासिं इच्छअमावाससंगुणं कुज्जा । णक्खत्ताणं एत्तो
सोहणगविहिं णिसामेह ॥३॥ वावीसं च मुहुत्ता छायालीसं विसट्टिभागा य । एयं
पुणव्वसुस्स य सोहयव्वं इवइ बुच्छं ॥४॥ वावत्तरं सयं फग्गुणीणं वाणउइय वे
विसाहासु । चत्तारि य वायाला सोज्जा उ उत्तरासाढा ॥ ५ ॥ एयं पुणव्वसुस्स य
विसट्टिभागसहियं तु सोहणगं । इत्तो अभिईआइं विइयं बुच्छामि सोहणगं ॥ ६ ॥
अमिइस्स णव मुहुत्ता विसट्टिभागा य हुंति चउवीसं । छावट्टी असमत्ता भागा
सत्तट्टेयकया ॥७॥ उगुणट्ठं पोड्ववयाइसु चेव णवोत्तरं च रोहिणिया । तिसु णव-
णवएसु भवे पुणव्वसू फग्गुणीओ य ॥८॥ पंचेव उगुणपण्णं सयाइ उगुणुत्तराईं
छच्चेव । सोज्जाणि विसाहासुं मूले सत्तेव चोयाला ॥ ९ ॥ अट्ठसय उगुणवीसा
सोहणगं उत्तराण साढाणं । चउवीसं खल्ल भागा छावट्टी चुण्णियाओ य ॥ १० ॥
एयइ सोइइत्ता जं सेसं तं हवेइ णक्खत्तं । इत्थं करेइ उइइइइ सुरेण समं अमा-
वासं ॥११॥ इच्छापुण्णिमग्गुणिओ अवहारो सोत्थं होइ कायव्वो । तं चेव य सोहणगं
अभिईआइं तु कायव्वं ॥ १२ ॥ सुद्धमि य सोहणगे जं सेसं तं भविज्ज णक्खत्तं ।
तत्थ य करेइ उइइइइ पडिपुण्णो पुण्णिम विउलं ॥१३॥] ता साविट्ठिण्णं पुण्णिमासिणि
किं कुलं जोएइ उवकुलं जोएइ कुलोवकुलं जोएइ ? ता कुलं वा जोएइ उवकुलं वा
जोएइ कुलोवकुलं वा जोएइ, कुलं जोएमाणे धणिट्ठा णक्खत्ते० उवकुलं जोएमाणे
सवणे णक्खत्ते जोएइ, कुलोवकुलं जोएमाणे अभिई णक्खत्ते जोएइ, ता साविट्ठि०
पुण्णिमं कुलं वा जोएइ उवकुलं वा जोएइ कुलोवकुलं वा जोएइ, कुलेण वा जुत्ता
उवकुलेण वा जुत्ता कुलोवकुलेण वा जुत्ता साविट्ठी पुण्णिमा जुत्ताति वत्तव्वं सिया,
ता पोड्ववइण्णं पुण्णिमं किं कुलं जोएइ उवकुलं जोएइ कुलोवकुलं वा जोएइ ? ता
कुलं वा जोएइ उवकुलं वा जोएइ कुलोवकुलं वा जोएइ, कुलं जोएमाणे उत्तरा-
पोड्ववया णक्खत्ते जोएइ, उवकुलं जोएमाणे पुब्बापुड्ववया णक्खत्ते जोएइ, कुलोव-
कुलं जोएमाणे सयभिसया णक्खत्ते जोएइ, पोड्ववइण्णं पुण्णिमासिणि कुलं वा जोएइ
उवकुलं वा जोएइ कुलोवकुलं वा जोएइ, कुलेण वा जुत्ता ३ पुड्ववया पुण्णिमा
जुत्ताति वत्तव्वं सिया, ता आसोइं णं पुण्णिमासिणि किं कुलं जोएइ उवकुलं जोएइ
कुलोवकुलं जोएइ ? ता कुलंपि जोएइ उवकुलंपि जोएइ णो लब्भइ कुलोवकुलं,

कुलं जोएमाणे अस्सिणी णक्खत्ते जोएइ, उवकुलं जोएमाणे रेवई णक्खत्ते जोएइ, आसोई णं पुण्णिमं कुलं वा जोएइ उवकुलं वा जोएइ, कुलेण वा जुत्ता उवकुलेण वा जुत्ता अस्सोई णं पुण्णिमा जुत्ताति वत्तव्वं सिया, एवं णेयव्वाउ, पोसं पुण्णिमं जेड्डामूलं पुण्णिमं च कुलोवकुलंपि जोएइ, अवसेसासु णत्थि कुलोवकुलं जाव आसाढी पुण्णिमा जुत्ताति वत्तव्वं सिया । ता साविट्ठिं णं अमावासं कइ णक्खत्ता जोएंति ? ता दुण्णि णक्खत्ता जोएंति, तंजहा—अस्सेसा य महा य, एवं एएणं अभिलावेणं णेयव्वं, पांडवयं दो णक्खत्ता जोएंति, तंजहा—पुव्वाफग्गुणी उत्तराफग्गुणी, अस्सोई दो० हत्थो चित्ता य कत्तियं० साई विसाहा य, मग्गसिरं० अणुराहा जेड्डा मूले, पोसिं० पुव्वासाढा उत्तरासाढा, माहिं० अभीई सवणो धणिट्ठा, फग्गुणिं० सयभिसया पुव्वापोडवया उत्तरापोडवया, चेत्तिं० रेवई अस्सिणी य, विसाहिं० भरणी कत्तिया य, जेड्डामूलं० रोहिणी मिगसिरं च ता आसाढिं णं अमावासिं कइ णक्खत्ता जोएंति ? ता तिण्णि णक्खत्ता जोएंति, तं०—अद्दा पुणव्वसू पुस्सो, ता साविट्ठिं णं अमावासं किं कुलं जोएइ उवकुलं जोएइ कुलोवकुलं जोएइ ? ता कुलं वा जोएइ उवकुलं वा जोएइ णो लब्भइ कुलोवकुलं, कुलं जोएमाणे महा णक्खत्ते जोएइ, उवकुलं जोएमाणे असिलेसा० जोएइ, कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तव्वं सिया, एवं णेयव्वं, णवरं मग्गसिराए माहीए फग्गुणीए आसाढीए य अमावासाए कुलोवकुलंपि जोएइ, सेसेसु णत्थि जाव आसाढी अमावासा जुत्ताति वत्तव्वं सिया ॥३७॥ **दसमस्स पाहुडस्स छट्ठं पाहुडपाहुडं समत्तं ॥१०-६॥**

ता कइं ते सण्णिवाए आहिएति वएज्जा ? ता जया णं साविट्ठी पुण्णिमा भवइ तया णं माही अमावासा भवइ, जया णं माही पुण्णिमा भवइ तया णं साविट्ठी अमावासा भवइ, जया णं पुड्डवई पुण्णिमा भवइ तया णं फग्गुणी अमावासा भवइ, जया णं फग्गुणी पुण्णिमा भवइ तया णं पुड्डवई अमावासा भवइ, जया णं आसोई पुण्णिमा भवइ तया णं चेत्ती अमावासा भवइ, जया णं चेत्ती पुण्णिमा भवइ तया णं आसोई अमावासा भवइ, जया णं कत्तिई पुण्णिमा भवइ तया णं वेसाही अमावासा भवइ, जया णं वेसाही पुण्णिमा भवइ तया णं कत्तिया अमावासा भवइ, जया णं मग्गसिरी पुण्णिमा भवइ तया णं जेड्डामूली अमावासा भवइ, जया णं जेड्डामूली पुण्णिमा भवइ तया णं मग्गसिरी अमावासा भवइ, जया णं पोसी पुण्णिमा भवइ

तया णं आसादी अमावासा भवइ, जया णं आसादी पुणिमा भवइ तया णं पोसी
अमावासा भवइ ॥ ३८ ॥ **दसमस्स पाहुडस्स सत्तमं पाहुडपाहुडं
समत्तं ॥१०-७॥**

ता कहं ते णक्खत्तसंठिई आहितेति वएजा ? ता एएसि णं अट्ठावीसाए
णक्खत्ताणं अभीईणक्खत्ते किंसंठिए पण्णत्ते ? ता गोसीसावलिसंठिए पण्णत्ते, ता
सवणे णक्खत्ते किंसंठिए पण्णत्ते ? ता काहारसंठिए प०, धणिट्ठाणक्खत्ते सउणि-
पलीणगसंठिए, सयभिसयाणक्खत्ते पुप्फोवयारसंठिए, पुव्वापोट्टवयाणक्खत्ते अवट्ट-
वाविसंठिए, एवं उत्तरावि, रेवईणक्खत्ते णावासंठिए, अस्सिणीणक्खत्ते आसक्खं-
संठिए, भरणीणक्खत्ते भगसंठिए, कत्तियाणक्खत्ते छुरधरगसंठिए, रोहिणीणक्खत्ते
सगडुद्धिसंठिए, मिगसिराणक्खत्ते मिगसीसावलिसंठिए, अट्ठाणक्खत्ते रुहिरविंदु-
संठिए, पुणव्वसूणक्खत्ते तुलासंठिए, पुप्फे णक्खत्ते वट्टमाणसंठिए, अस्सेसाणक्खत्ते
पट्टाणक्खत्ते, महाणक्खत्ते माणसंठिए, पुव्वाफगुणीणक्खत्ते अट्टपल्लियंकसंठिए,
एवं उत्तरावि, हत्थे णक्खत्ते हत्थसंठिए, चित्ताणक्खत्ते मुहफुल्लसंठिए, साईणक्खत्ते
खीळ्यासंठिए, विसाहाणक्खत्ते दामणिसंठिए, अणुराहाणक्खत्ते एगावलिसंठिए,
जेट्टाणक्खत्ते मूलेसंठिए, मूले णक्खत्ते विञ्चुयल्लोलसंठिए, पुव्वासादाणक्खत्ते
गयविक्रमसंठिए, उत्तरासादाणक्खत्ते साइसंठिए प० ॥३९॥ **दसमस्स पाहु-
डस्साच्चट्टमं पाहुडपाहुडं समत्तं ॥१०-८॥**

ता कहं ते तारग्गे आहितेति वएजा ? ता एएसि णं अट्ठावीसाए णक्खत्ताणं
अभीईणक्खत्ते कइतारे प० ? ता तितारे पण्णत्ते, सवणे णक्खत्ते तितारे धणिट्ठा-
णक्खत्ते पणतारे, सयभिसयाणक्खत्ते सयतारे पुव्वापोट्टवयाणक्खत्ते दुतारे, एवं उत्त-
रावि, रेवई० वत्तीसइतारे, अस्सिणीणक्खत्ते तितारे, भरणी तितारे, कत्तिया छत्तारे,
रोहिणी पंचतारे, मिगसिरे तितारे, अट्ठा एगतारे, पुणव्वसू पंचतारे, पुस्से तितारे,
अस्सेसा छत्तारे, महा सत्ततारे, पुव्वाफगुणी दुतारे, एवं उत्तरावि, हत्थे पंचतारे,
चित्ता एगतारे, साई एगतारे, ^{ता आभतए मडल्लवयाए वाहर} विसाहा पंचतारे, ^{मडल्लवया एस ण अट्ठा कइतारे} अणुराहा चउतारे, जेट्टा तितारे,
मूले एगतारे, पुव्वासादा चउतारे, ^{अट्टाणक्खत्ते} उत्तरासादा चउतारे ॥ ४० ॥ **दसमस्स
पाहुडस्स णवमं पाहुडपाहुडं समत्तं ॥१०-९॥**

ता क्वं ते गेया आहितेति वएजा ? ता वासाणं पदमं मासं क्व णक्खत्ता
 णेति ? ता चत्तारि णक्खत्ता णेति, तंजहा—उत्तरासाटा अभिई सवणा धणिट्ठा,
 उत्तरासाटा चोद्दस अहोरत्ते णेइ, अभिई सत्त अहोरत्ते णेइ, सवणे अट्ठ अहोरत्ते
 णेइ, धणिट्ठा एगं अहोरत्तं णेइ, तंसि च णं मासंसि चउरंगुलयोरिसीए छायाए
 सूरिए अणुपरियट्ठइ, तस्स णं मासस्स चरिमे दिवसे दो पयाइं चत्तारि य अंगु-
 लाइं पोरिसी भवइ, ता वासाणं दोच्चं मासं क्व णक्खत्ता णेति ? ता चत्तारि
 णक्खत्ता णेति, तंजहा—धणिट्ठा सयभिसया पुव्वापोट्ठवया उत्तरापोट्ठवया धणिट्ठा चोद्दस
 अहोरत्ते णेइ, सयभिसया सत्त अहोरत्ते णेइ, पुव्वापोट्ठवया अट्ठ अहोरत्ते णेइ,
 उत्तरापोट्ठवया एगं अहोरत्तं णेइ, तंसि च णं मासंसि अट्ठंगुलयोरिसीए छायाए
 सूरिए अणुपरियट्ठइ, तस्स णं मासस्स चरिमे दिवसे दो पयाइं अट्ठ य अंगुलाइं
 पोरिसी भवइ, ता वासाणं तइयं मासं क्व णक्खत्ता णेति ? ता तिण्णि णक्खत्ता
 णेति, तं०—उत्तरापोट्ठवया रेवई अस्सिणी, उत्तरापोट्ठवया चोद्दस अहोरत्ते णेइ, रेवई
 पण्णरस अहोरत्ते णेइ, अस्सिणी एगं अहोरत्तं णेइ, तंसि च णं मासंसि दुवाल्सं-
 गुलाए पोरिसीए छायाए सूरिए अणुपरियट्ठइ, तस्स णं मासस्स चरिमादिवसे लेह-
 ट्ठाइं तिण्णि पयाइं पोरिसी भवइ, ता वासाणं चउत्थं मासं क्व णक्खत्ता णेति ?
 ता तिण्णि णक्खत्ता णेति, तं०—अस्सिणी भरणी कत्तिया, अस्सिणी चउद्दस अहोरत्ते
 णेइ, भरणी पण्णरस अहोरत्ते णेइ, कत्तिया एगं अहोरत्तं णेइ, तंसि च णं मासंसि
 सोल्लसंगुलाए पोरिसिच्छायाए सूरिए अणुपरियट्ठइ, तस्स णं मासस्स चरिमे दिवसे
 तिण्णि पयाइं चत्तारि य अंगुलाइं पोरिसी भवइ। ता हेमंताणं पदमं मासं क्व णक्खत्ता
 णेति ? ता तिण्णि णक्खत्ता णेति, तं०—कत्तिया रोहिणी संटाणा, कत्तिया चोद्दस
 अहोरत्ते णेइ, रोहिणी पण्णरस अहोरत्ते णेइ, संटाणा एगं अहोरत्तं णेइ, तंसि च णं
 मासंसि वीसंगुलयोरिसीए छायाए सूरिए अणुपरियट्ठइ, तस्स णं मासस्स चरिमे
 दिवसे तिण्णि पयाइं अट्ठ य अंगुलाइं पोरिसी भवइ, ता हेमंताणं दोच्चं मासं क्व
 णक्खत्ता णेति ? ता चत्तारि णक्खत्ता णेति, तं०—संटाणा अट्ठा पुणव्वसू पुस्से,
 संटाणा चोद्दस अहोरत्ते णेइ, अट्ठा सत्त अहोरत्ते णेइ, पुणव्वसू अट्ठ अहोरत्ते णेइ,
 पुस्से एगं अहोरत्तं णेइ, तंसि च णं मासंसि चउवीसंगुलयोरिसीए छायाए सूरिए
 अणुपरियट्ठइ, तस्स णं मासस्स चरिमे दिवसे लेहट्ठाइं चत्तारि पयाइं पोरिसी भवइ,
 ता हेमंताणं तइयं मासं क्व णक्खत्ता णेति ? ता तिण्णि णक्खत्ता णेति, तं०—पुस्से
 अस्सेसा महा, पुस्से चोद्दस अहोरत्ते णेइ, अस्सेसा पंचदस अहोरत्ते णेइ, महा एगं

अहोरत्तं णेइ, तंसि च णं मासंसि वीसंगुलाए पोरिसीए छायाए सूरिए अणुपरियट्टइ, तस्स णं मासस्स चरिमे दिवसे तिण्णि पयाइं अट्टंगुलाइं पोरिसी भवइ, ता हेमंताणं चउत्थं मासं कइ णक्खत्ता णेति ? ता तिण्णि णक्खत्ता णेति, तं०—महा पुव्वाफग्गुणी उत्तराफग्गुणी, महा चोइस अहोरत्ते णेइ, पुव्वाफग्गुणी पण्णरस अहोरत्ते णेइ, उत्तराफग्गुणी एगं अहोरत्तं णेइ, तंसि च णं मासंसि सोल्लसअंगुलाए पोरिसीए छायाए सूरिए अणुपरियट्टइ, तस्स णं मासस्स चरिमे दिवसे तिण्णि पयाइं चत्तारि य अंगुलाइं पोरिसी भवइ । ता गिम्हाणं पढमं मासं कइ णक्खत्ता णेति ? ता तिण्णि णक्खत्ता णेति, तं०—उत्तराफग्गुणी हत्थो चित्ता, उत्तराफग्गुणी चोइस अहोरत्ते णेइ, हत्थो पण्णरस अहोरत्ते णेइ, चित्ता एगं अहोरत्तं णेइ, तंसि च णं मासंसि दुवालसंगुलोपोरिसीए छायाए सूरिए अणुपरियट्टइ, तस्स णं मासस्स चरिमे दिवसे लेहट्टाइं तिण्णि पयाइं पोरिसी भवइ, ता गिम्हाणं बिइयं मासं कइ णक्खत्ता णेति ? ता तिण्णि णक्खत्ता णेति, तं०—चित्ता साई विसाहा, चित्ता चोइस अहोरत्ते णेइ, साई पण्णरस अहोरत्ते णेइ, विसाहा एगं अहोरत्तं णेइ, तंसि च णं मासंसि अट्टंगुलाए पोरिसीए छायाए सूरिए अणुपरियट्टइ, तस्स णं मासस्स चरिमे दिवसे दो पयाइं अट्ट य अंगुलाइं पोरिसी भवइ, ता गिम्हाणं तइयं मासं कइ णक्खत्ता णेति ? ता ति णक्खत्ता णेति, तं०—विसाहा अणुराहा जेट्टामूलो, विसाहा चोइस अहोरत्ते णेइ, अणुराहा पण्णरस०, जेट्टामूलो एगं अहोरत्तं णेइ, तंसि च णं मासंसि चउरंगुलोपोरिसीए छायाए सूरिए अणुपरियट्टइ, तस्स णं मासस्स चरिमे दिवसे दो पयाणि य चत्तारि अंगुलाणि पोरिसी भवइ, ता गिम्हाणं चउत्थं मासं कइ णक्खत्ता णेति ? ता तिण्णि णक्खत्ता णेति, तं०—मूलो पुव्वासाढा उत्तरासाढा, मूलो चोइस अहोरत्ते णेइ, पुव्वासाढा पण्णरस अहोरत्ते णेइ, उत्तरासाढा एगं अहोरत्तं णेइ, तंसि च णं मासंसि वट्टाए समचउरंससंठियाए णग्गोहपरिमंडलाए सकायमणुरंगिणीए छायाए सूरिए अणुपरियट्टइ, तस्स णं मासस्स चरिमे दिवसे लेहट्टाइं दो पयाइं पोरिसी भवइ ॥४१॥

दसमस्स पाहुडस्स दसमं पाहुडपाहुडं समत्तं ॥१०-१०॥

ता कइं ते चंदमग्गा आहितेति वएजा ? ता एएसि णं अट्टावीसाए णक्खत्ताणं अरिथि णक्खत्ता जे णं सया चंदस्स दाहिणेणं जोयं जोएंति, अरिथि णक्खत्ता जे णं सया चंदस्स उत्तरेणं जोयं जोएंति, अरिथि णक्खत्ता जे णं चंदस्स दाहिणेणवि उत्तरेणवि पमहंपि जोयं जोएंति, अरिथि णक्खत्ता जे णं चंदस्स दाहिणेणवि पमहंपि

जोयं जोएति, अत्थि णक्खत्ते जे णं सया चंदस्स पमद्दं जोयं जोएइ, ता एएसि णं अट्ठावीसाए णक्खत्ताणं कयरे णक्खत्ता जे णं सया चंदस्स दाहिणेणं जोयं जोएति तदेव जाव कयरे णक्खत्ते जे णं सया चंदस्स पमद्दं जोयं जोएइ ? ता एएसि णं अट्ठावीसाए णक्खत्ताणं जे णं णक्खत्ता सया चंदस्स दाहिणेणं जोयं जोएति ते णं छ, तं०-संटाणा अद्दा पुस्सो अस्सेसा हत्थो मूलो, तत्थ जे ते णक्खत्ता जे णं सया चंदस्स उत्तरेणं जोयं जोएति ते णं वारस, तंजहा-अभिई सवणो धणिट्ठा सयमिसया पुव्वाभद्वया उत्तरापोट्टवया रेवई अरिसणी भरणी पुव्वापग्गुणी उत्तराफग्गुणी साई १२, तत्थ जे ते णक्खत्ता जे णं चंदस्स दाहिणेणं वि उत्तरेणं वि पमद्दं पि जोयं जोएति ते णं सत्त, तंजहा-कत्तिया रोहिणी पुणव्वसू महा चित्ता विसाहा अणुराहा, तत्थ जे ते णक्खत्ता जे णं चंदस्स दाहिणेणं वि पमद्दं पि जोयं जोएति ताओ णं दो आसाटाओ सव्वबाहरे मंडले जोयं जोएसु दा जोएति वा जोएस्संति वा, तत्थ जे से णक्खत्ते जे णं सया चंदस्स पमद्दं जोयं जोएइ सा णं एगा जेडा ॥ ४२ ॥ ता कह ते चंदमंडला पण्णत्ता ? ता पण्णरस चंदमंडला पण्णत्ता, ता एएसि णं पण्णरसण्हं चंदमंडलाणं अत्थि चंदमंडला जे णं सया णक्खत्तेहिं अविरहिया०, अत्थि चंदमंडला जे णं रविससिणक्खत्ताणं सामण्णा भवंति, अत्थि चंदमंडला जे णं सया आइच्चेहिं विरहिया, ता एएसि णं पण्णरसण्हं चंदमंडलाणं कयरे चंदमंडला जे णं सया णक्खत्तेहिं अविरहिया जाव कयरे चंदमंडला जे णं सया आइच्चेविरहिया ? ता एएसि णं पण्णरसण्हं चंदमंडलाणं तत्थ जे ते चंदमंडला जे णं सया णक्खत्तेहिं अविरहिया ते णं अट्ठ, तंजहा-पट्ठमे चंदमंडले तइए चंदमंडले छट्ठे चंदमंडले सत्तमे चंदमंडले अट्ठमे चंदमंडले दसमे चंदमंडले एक्कारसमे चंदमंडले पण्णरसमे चंदमंडले, तत्थ जे ते चंदमंडला जे णं सया णक्खत्तेहिं विरहिया ते णं सत्त, तंजहा-विइए चंदमंडले चउत्थे चंदमंडले पंचमे चंदमंडले णवमे चंदमंडले वारसमे चंदमंडले तेरसमे चंदमंडले चउहसमे चंदमंडले, तत्थ जे ते चंदमंडला जे णं रविससिणक्खत्ताणं सामण्णा भवंति ते णं चत्तारि, तंजहा-पट्ठमे चंदमंडले बीए चंदमंडले जे चउत्थे चंदमंडले पंचमे चंदमंडले, तत्थ जे ते चंदमंडला जे णं सया णक्खत्तेहिं विरहिया ते णं सत्त, तंजहा-विइए चंदमंडले चउत्थे चंदमंडले पंचमे चंदमंडले णवमे चंदमंडले वारसमे चंदमंडले तेरसमे चंदमंडले चउहसमे चंदमंडले, तत्थ जे ते चंदमंडला जे णं रविससिणक्खत्ताणं सामण्णा भवंति ते णं चत्तारि, तंजहा-पट्ठमे चंदमंडले बीए चंदमंडले जे चउत्थे चंदमंडले पंचमे चंदमंडले, तत्थ जे ते चंदमंडला जे णं सया णक्खत्तेहिं विरहिया ते णं सत्त, तंजहा-विइए चंदमंडले चउत्थे चंदमंडले पंचमे चंदमंडले णवमे चंदमंडले वारसमे चंदमंडले तेरसमे चंदमंडले चउहसमे चंदमंडले ॥ ४३ ॥ इसमस्स पाहुडस्स एक्कारसमं पाहुडपाहुड समत्तं ॥ १०-११ ॥

ता कहं ते देवयाणं अज्झयणा आहिताति वएजा ? ता एएसि णं अट्ठावीसाए णक्खत्ताणं अभिईणक्खत्ते किं देवयाए पण्णत्ते ? ता नंभदेवयाए पण्णत्ते, सवणे० विण्हु० घणिट्ठाणक्खत्ते वसुदेवयाए०, सयभिसयाणक्खत्ते वरुण०, पुव्वापोट्ठ० अयदे०, उत्तरापोट्ठवयाणक्खत्ते अभिवट्ठि०, एवं सव्वेवि पुच्छिज्जंति, रेवई पुस्सदेवया०, अस्सिणी अस्सदेवया०, भरणी जमदेवया०, कत्तिया अग्निदेवया० रेहिणी पयावइदेवया०, संठाणा सोमदेवयाए०, अहा रुद्धदेवयाए०, पुणव्वसू अदिति०, पुस्सो बहस्सइ०, अस्सेसा सप्प०, महा पिइ०, पुव्वाफग्गुणी भग०, उत्तराफग्गुणी अज्जम०, हत्थे सविया०, चित्ता तट्ठ०, साई वाउ०, विसाहा इंदग्गी०, अणुराहा मित्त०, जेट्ठा इंद०, मूले णिरइ०, पुव्वासाढा आउ०, उत्तरासाढा० विस्सदेवयाए पण्णत्ते ॥४४॥

दसमस्स पाहुडस्स बारसमं पाहुडपाहुड समत्तं ॥ १०-१२॥

ता कहं ते मुहुत्ताणं णामधेजा आहिताति वएजा ? ता एग्गेगस्स णं अहोरत्तस्स तीसं मुहुत्ता प०, तंजहा-द्वे सेए मित्ते वाउ सुगी(पी)ए तइव अभिचंदे । माहिंद बल्लव वंभे बहुसच्चे चेव ईसाणे ॥ १ ॥ तट्ठे य भावियप्पा वेसमणे वारुणे य आणंदे । विजए य वेससणे पयावई चेव उवसामे ॥ २ ॥ गंधव्व अग्निवेसे सयरिसहे आयवं च अममे य । अणवं भोमे रिसहे सव्वट्ठे रक्खसे चेव ॥ ३ ॥ ४५ ॥

दसमस्स पाहुडस्स तेरसमं पाहुडपाहुडं समत्तं ॥ १०-१३॥

ता कहं ते दिवसा आहिताति वएजा ? ता एग्गेगस्स णं पक्खस्स पण्णरस दिवसा पण्णत्ता, तं०-पडिवादिघसे विइवादिघसे जाव पण्णरसीदिघसे, ता एएसि णं पण्णरसणं दिवसाणं पण्णरस णामधेजा प०, तं०-पुव्वदंभे सिद्धमणोरमे य तत्तो मणोरहे(हरे)चेव । जसभदे य जसोधर य सत्वकामसदिद्वे ॥ १ ॥ इंदमुद्धाभिसित्ते य सोमणस धणंजए य बोद्धव्वे । अत्थसिद्धे अभिजाए अचसणे सयंजए चेव ॥ २ ॥ अग्निवेसे उवसमे दिवसाणं णामधेजाइं । ता कहं ते राईओ आहिताति वएजा ? ता एग्गेगस्स णं पक्खस्स पण्णरस राईओ पण्णत्ताओ, तंजहा-पडिवाराई विइयाराई जाव पण्णरसीराई, ता एयासि णं पण्णरसणं राईणं पण्णरस णामधेजा पण्णत्ता, तं०-उत्तमा य सुणक्खत्ता, एलावच्चा जसोधरा । सोमणसा चेव तहा सिरिसंभूया य बोद्धव्वा ॥ १ ॥ विजया य वेजयंति जयंति अपराजिया य इच्छा य । समाहारा चेव तहा तेया य तहा य अइतेया ॥ १ ॥ देवाणंदा णिरई रयणीणं णामधेजाइं ॥ ४६ ॥ **दसमस्स पाहुडस्स चउहसमं पाहुडपाहुडं समत्तं ॥ १०-१४ ॥**

ता कंहं ते तिही आहितेति वएजा ? तत्थ खलु इमा दुविहा तिही पणत्ता, तंजहा—दिवसतिही य, राईतिही य, ता कंहं ते दिवसतिही आहितेति वएजा ? ता एगमेगस्स णं पक्खस्स पण्णरस २ दिवसतिही पणत्ता, तं०—णंदे भद्दे जए तुच्छे पुण्णे पक्खस्स पंचमी पुणरवि णंदे भद्दे जए तुच्छे पुण्णे पक्खस्स दसमी पुणरवि णंदे भद्दे जए तुच्छे पुण्णे पक्खस्स पण्णरसी, एवं ते तिगुणा तिहीओ सव्वेसिं दिवसाणं, ता कंहं ते राईतिही आहितेति वएजा ? ता एगमेगस्स णं पक्खस्स पण्णरस राईतिही प०, तं०—उग्गवई भोगवई जसवई सव्वसिद्धा सुहणामा पुणरवि उग्गवई भोगवई जसवई सव्वसिद्धा सुहणामा पुणरवि उग्गवई भोगवई जसवई सव्वसिद्धा सुहणामा, एए तिगुणा तिहीओ सव्वसिं राईणं ॥ ४७ ॥ **दसमस्स पाहुडस्स पण्णरसमं पाहुडपाहुडं समत्तं ॥ १०-१५ ॥**

ता कंहं ते गोत्ता आहिताति वएजा ? ता एएसि णं अट्ठावीसाए णवखत्ताणं अभिईणक्खत्ते किंगोत्ते प० ? ता मोग्गल्लायणसगोत्ते पणत्ते, सवणे० संखायण०, धणिट्ठा० अग्गितावस०, सयभिसया० कण्णिलायणसगोत्ते, पुव्वापोट्टवया० जोउकण्णियसगोत्ते, उत्तरापोट्टवया० धणंजयसगोत्ते, रेवईणवखत्ते पुस्सायणसगोत्ते, अस्सिणीणक्खत्ते अस्सायणसगोत्ते, भरणीणक्खत्ते भग्गवेससगोत्ते, कत्तियाणक्खत्ते अग्गि-वेससगोत्ते, रोहिणीणक्खत्ते गोयम०, संठाणाणक्खत्ते भारद्वायसगोत्ते, अट्ठाणक्खत्ते लोहिच्चायणसगोत्ते, पुणव्वसूणक्खत्ते वासिट्ठसगोत्ते, पुस्से० उमजायणसगोत्ते, अस्सेसाणक्खत्ते मंडव्वायणसगोत्ते, महाणक्खत्ते पिंगायणसगोत्ते, पुव्वाफग्गुणीणवखत्ते गोवल्लायणसगोत्ते, उत्तराफग्गुणीणक्खत्ते कासव०, हत्थे० कोसिय०, चित्ताणक्खत्ते दमियाणस्सगोत्ते, साईणक्खत्ते चामरच्छायणसगोत्ते, विसाहाणक्खत्ते सुगायणसगोत्ते अणुराहाणक्खत्ते गोलव्वायणसगोत्ते, जेट्ठाणक्खत्ते तिगिच्छायणसगोत्ते, मूले णक्खत्ते कच्चायणसगोत्ते, पुव्वासाटाणक्खत्ते वज्झियायणसगोत्ते, उत्तरासाटाणक्खत्ते वग्घावच्चसगोत्ते ॥ ४८ ॥ **दसमस्स पाहुडस्स सोलसमं पाहुडपाहुडं समत्तं ॥ १०-१६ ॥**

ता कंहं ते भोयणा आहिताति वएजा ? ता एएसि णं अट्ठावीसाए णक्खत्ताणं कत्तियाहिं दधिणा भोच्चा कज्जं साधेति, रोहिणीहिं वसभमंसं+ भोच्चा कज्जं साधेति, संठाणाहिं मिगमंसं भोच्चा कज्जं साधेति, अट्ठाहिं णवणीएणं भोच्चा कज्जं साधेति, पुणव्वसुणा घएणं भोच्चा कज्जं साधेति, पुस्सेणं खीरेणं भोच्चा कज्जं साधेति, अस्से-

साए दीगवमंसं भोच्चा कज्जं सार्धेति, महाहिं कसोतिं भोच्चा कज्जं सार्धेति, पुव्वाहिं फग्गुणीहिं मेदगमंसं भोच्चा कज्जं सार्धेति, उत्तराहिं फग्गुणीहिं णक्खीमंसं भोच्चा कज्जं सार्धेति, हत्येणं वत्थाणीयपणेणं भोच्चा कज्जं सार्धेति, चित्ताहिं मुग्गसूवेणं भोच्चा कज्जं सार्धेति, साइगा फलाइं भोच्चा कज्जं सार्धेति, विसाहाहिं आसित्तियाओ भोच्चा कज्जं सार्धेति, अणुराहाहिं मिस्साकूरं भोच्चा कज्जं सार्धेति, जेट्टाहिं कोलट्ठ-एणं भोच्चा कज्जं सार्धेति, मूलेणं मूलगसागेणं भोच्चा कज्जं सार्धेति, पुव्वाहिं आसा-टाहिं आमलगसरीरेणं भोच्चा कज्जं सार्धेति, उत्तराहिं आसाटाहिं बिल्हेहिं भोच्चा कज्जं सार्धेति, अभीइणा पुप्फेहिं भोच्चा कज्जं सार्धेति, सन्नणेणं खीरेणं भोच्चा कज्जं सार्धेति, घणिट्टाहिं जूसेणं भोच्चा कज्जं सार्धेति, सयभिसयाए तुवरीओ भोच्चा कज्जं सार्धेति, पुव्वाहिं पुट्टववाहिं कारिल्लएहिं भोच्चा कज्जं सार्धेति, उत्तराहिं पुट्टवयाहिं वराहमंसं भोच्चा कज्जं सार्धेति, रेवईहिं चत्थरमंसं भोच्चा कज्जं सार्धेति, अस्सिणीहिं तित्तिरमंसं भोच्चा कज्जं सार्धेति, भरणीहिं तिळ्ळंतुल्लं भोच्चा कज्जं सार्धेति ॥४९॥

दसमस्स पाहुडस्स सत्तरसमं पाहुडपाहुडं समत्तं ॥१०-१७॥

ता कहं ते चारा आहिताति वएजा ? तत्थ खलु इमे दुविहा चारा पण्णत्ता, तं०-आइच्चारा य चंदचारा य, ता कहं ते चंदचारा आहिताति वएजा ? ता पंच संवच्छरिए णं जुगे अभीइणक्खत्ते सत्तसट्ठिचारे चंदेण सद्धिं जोयं जोएइ, सवणे णक्खत्ते सत्तसट्ठिचारे चंदेण सद्धिं जोयं जोएइ, एवं जाव उत्तरासाढाणक्खत्ते सत्तसट्ठिचारे चंदेण सद्धिं जोयं जोएइ । ता कहं ते आइच्चारा आहितेति वएजा ? ता पंच संवच्छरिए णं जुगे अभीइणक्खत्ते पंचचारे सुरेण सद्धिं जोयं जोएइ, एवं जाव उत्तरासाढाणक्खत्ते पंचचारे सुरेण सद्धिं जोयं जोएइ ॥ ५० ॥ **दसमस्स पाहुडस्स अट्टारसमं पाहुडपाहुडं समत्तं ॥१०-१८॥**

ता कहं ते मासा आहिताति वएजा ? ता एगमेगस्स णं संवच्छरस्स वारस्स मासा पण्णत्ता, तैसिं च दुविहा णामधेजा पण्णत्ता, तं०-ल्लोइया य ल्लोउत्तरिया य, तत्थ ल्लोइया णाम्मा०, तं०-सावणे भद्दवए आसोए जाव आसाढे, ल्लोउत्तरिया णाम्मा०, तं०-अमिण्णे पइट्ठे य, विजए पीइवद्धणे । सेज्जसे य सिवे यावि, सिस्सिरेवि य हेमबं ॥१॥ णवमे वसंतमासे, दसमे कुसुमसंभवे । एक्कारसमे णिदाहो, वणविरोही य वारसे ॥२॥५॥ **दसमस्स पाहुडस्स एगुणवीसइमं पाहुडपाहुडं समत्तं ॥१०-१९॥**

ता कंह ते संवच्छरा आहिताति वएजा ? ता पंच संवच्छरा आहिताति वएजा,
 तं०—णक्खत्तसंवच्छरे जुगसंवच्छरे पमाणसंवच्छरे लक्खणसंवच्छरे सणिच्छरसंवच्छरे
 ॥५२॥ ता णक्खत्तसंवच्छरे ण कइविहे प० ? ता णक्खत्तसंवच्छरे ण दुवालसविहे
 पण्णत्ते, तं०—सावणे भइवए जाव आसाढे, जं वा बहस्सइमहग्गहे दुवालसहिं
 संवच्छरेहिं सव्वं णक्खत्तमंडलं समाणेइ ॥ ५३ ॥ ता जुगसंवच्छरे णं पंचविहे
 पण्णत्ते, तंजहा—चंदे चंदे अभिवद्धिए चंदे अभिवद्धिए चेव, ता पढमस्स णं चंद-
 संवच्छरस्स चउवीसं पव्वा प०, दोच्चस्स णं चंदसंवच्छरस्स चउवीसं पव्वा प०,
 तच्चस्स णं अभिवद्धियसंवच्छरस्स छुव्वीसं पव्वा प०, चउत्थस्स णं चंदसंवच्छरस्स
 चउवीसं पव्वा प०, पंचमस्स णं अभिवद्धियसंवच्छरस्स छुव्वीसं पव्वा पण्णत्ता, एवा-
 मेव सपुव्वावरेणं पंचसंवच्छरिए जुगे एगे चउवीसे पव्वसए भवतीति मवखायं
 ॥५४॥ ता पमाणसंवच्छरे णं पंचविहे प०, तंजहा—णक्खत्ते चंदे उड्डु आइच्चे
 अभिवद्धिए ॥ ५५ ॥ ता लक्खणसंवच्छरे णं पंचविहे प०, तं०—समगं णक्खत्ता
 जोयं जोएति समगं उऊ परिणमति । णञ्जुण्ह णाइसीए बहुउदए होइ णक्खत्ते ॥ १ ॥
 सस्सि उण्णमा सुण्णमासि जाइता विसमंकारिणक्खत्ता । कडुओ बहूदओ य तमाहु
 संवच्छरं चंदं ॥ २ ॥ विसमं पवालिणो परिणमंति अणुउत्तु दिति पुप्फपलं । वासं ण
 सम्म वासइ तमाहु संवच्छरं कम्मं ॥ ३ ॥ पुढविदगाणं च रसं पुप्फपलाणं च देइ
 आइच्चे । अप्पेणवि वासेणं सम्मं णिप्पज्जए सरसं ॥ ४ ॥ आइच्चेतयतविया खणलव-
 दिवसा उऊ परिणमंति । पूरेइ णिण्णथलए तमाहु अभिवद्धियं जाण ॥ ५ ॥ ता
 सणिच्छरसंवच्छरे णं अट्टावीसइविहे प०, तं०—अभीई सवणे जाव उत्तरासाढा, जं
 वा सणिच्छरे महग्गहे तीसाए संवच्छरोहिं सव्वं णक्खत्तमंडलं समाणेइ ॥ ५६ ॥
दसमस्स पाहुडस्स वीसइमं पाहुडपाहुडं समत्तं ॥ १०-२० ॥

ता कंह ते जोइसस्स दारा आहिताति वएजा ? कइयत्तए इमाओ मंच पडि-
 वत्तीओ पण्णत्ताओ, तं०—तत्थेगे एवमाहंसु—ता कत्तिथाइया णं सत्त णक्खत्ता पुव्व-
 दारिया पण्णत्ता एगे एवमाहंसु १, एगे पुण एवमाहंसु—ता महाइया णं सत्त णक्खत्ता
 पुव्वदारिया पण्णत्ता एगे एवमाहंसु २, एगे पुण एवमाहंसु—ता धण्णिइया णं सत्त
 णक्खत्ता पुव्वदारिया पण्णत्ता एगे एवमाहंसु ३, एगे पुण एवमाहंसु—ता अस्सिणी-
 आइया णं सत्त णक्खत्ता पुव्वदारिया पण्णत्ता एगे एवमाहंसु ४, एगे पुण एव-
 माहंसु—ता भरणीआइया णं सत्त णक्खत्ता पुव्वदारिया पण्णत्ता ० ५ । तत्थ जे ते

एवमाहंसु—ता कत्तियाइया णं सत्त णक्खत्ता पुव्वदारिया पण्णत्ता, ते एवमाहंसु—तं०—
 कत्तिया रोहिणी संठाणा अहा पुणव्वसू पुस्सो अस्सेसा, महाइया णं सत्त णक्खत्ता
 दाहिणदारिया पण्णत्ता, तंजहा—महा पुव्वाफग्गुणी उत्तराफग्गुणी हत्थो चित्ता
 साई विसाहा, अणुराहाइया णं सत्त णक्खत्ता पच्छिमदारिया पण्णत्ता, तंजहा—
 अणुराहा जेट्ठा मूले पुव्वासाढा उत्तरासाढा अभिई सवणो, धणिट्ठाइया णं सत्त
 णक्खत्ता उत्तरदारिया पण्णत्ता, तंजहा—धणिट्ठा सयभिसया पुव्वापोट्टवया उत्तरा-
 पोट्टवया रेवई अस्सिणी भरणी । तत्थ जे ते एवमाहंसु—ता महाइया णं सत्त
 णक्खत्ता पुव्वदारिया पण्णत्ता, ते एवमाहंसु—तंजहा—महा पुव्वाफग्गुणी हत्थो
 चित्ता साई विसाहा, अणुराहाइया णं सत्त णक्खत्ता दाहिणदारिया पण्णत्ता,
 तंजहा—अणुराहा जेट्ठा मूले पुव्वासाढा उत्तरासाढा अभिई सवणे, धणिट्ठाइया णं
 सत्त णक्खत्ता पच्छिमदारिया पण्णत्ता, तंजहा—धणिट्ठा सयभिसया पुव्वापोट्टवया
 उत्तरापोट्टवया रेवई अस्सिणी भरणी, कत्तियाइया णं सत्त णक्खत्ता उत्तरदारिया
 पण्णत्ता, तंजहा—कत्तिया रोहिणी संठाणा अहा पुणव्वसू पुस्सो अस्सेसा । तत्थ जे
 ते एवमाहंसु—ता धणिट्ठाइया णं सत्त णक्खत्ता पुव्वदारिया पण्णत्ता, ते एवमाहंसु—
 तंजहा—धणिट्ठा सयभिसया पुव्वाभह्वया उत्तराभह्वया रेवई अस्सिणी भरणी,
 कत्तियाइया णं सत्त णक्खत्ता दाहिणदारिया पण्णत्ता, तंजहा—कत्तिया रोहिणी
 संठाणा अहा पुणव्वसू पुस्सो अस्सेसा, महाइया णं सत्त णक्खत्ता पच्छिमदारिया
 पण्णत्ता, तंजहा—महा पुव्वाफग्गुणी उत्तराफग्गुणी हत्थो चित्ता साई विसाहा,
 अणुराहाइया णं सत्त णक्खत्ता उत्तरदारिया पण्णत्ता, तंजहा—अणुराहा जेट्ठा
 मूले पुव्वासाढा उत्तरासाढा अभीई सवणो । तत्थ जे ते एवमाहंसु—ता अस्सिणी-
 आइया णं सत्त णक्खत्ता पुव्वदारिया पण्णत्ता ते एवमाहंसु—तंजहा—अस्सिणी
 भरणी कत्तिया रोहिणी संठाणा अहा पुणव्वसू, पुस्साइया णं सत्त णक्खत्ता
 दाहिणदारिया पण्णत्ता, तंजहा—पुस्सा अस्सेसा महा पुव्वाफग्गुणी उत्तराफग्गुणी
 हत्थो चित्ता, साईआइया णं सत्त णक्खत्ता पच्छिमदारिया पण्णत्ता, तंजहा—साई
 विसाहा अणुराहा जेट्ठा मूले पुव्वासाढा उत्तरासाढा अभीईआइया णं सत्त
 णक्खत्ता उत्तरदारिया पण्णत्ता, तंजहा—अभिई सवणो धणिट्ठा सयभिसया पुव्वा-
 भह्वया उत्तराभह्वया रेवई । तत्थ जे ते एवमाहंसु—ता भरणीआइया णं सत्त
 णक्खत्ता पुव्वदारिया पण्णत्ता, ते एवमाहंसु—तंजहा—भरणी कत्तिया रोहिणी संठाणा
 अहा पुणव्वसू पुस्सो, अस्सेसाइया णं सत्त णक्खत्ता दाहिणदारिया पण्णत्ता,

तंजहा-अस्सेसा महा पुव्वाफग्गुणी उत्तराफग्गुणी हत्थो चित्ता साई, विसाहाइया
 णं सत्त णक्खत्ता पच्छिमदारिया पण्णत्ता, तं०-विसाहा अणुराहा जेडा मूले
 पुव्वासादा उत्तरासादा अभिई, सवणाइया णं सत्त णक्खत्ता उत्तरदारिया पण्णत्ता,
 तं०-सवणो धणिद्धा सयभिसया पुव्वापोट्टवया उत्तरापोट्टवया रेवई अस्सिणी, एए
 एवमाहंसु, वयं पुण एवं वयामो-ता अभिईआइया णं सत्त णक्खत्ता पुव्वदारिया
 प०, तंजहा-अभिई सवणो धणिद्धा सयभिसया पुव्वापोट्टवया उत्तरापोट्टवया रेवई,
 अस्सिणीआइया णं सत्त णक्खत्ता दाहिणदारिया पण्णत्ता, तं०-अस्सिणी भरणी
 कत्तिया रोहिणी संठाणा अहा पुणव्वसू, पुस्साइया णं सत्त णक्खत्ता पच्छिम-
 दारिया पण्णत्ता, तं०-पुस्तो अस्सेसा महा पुव्वाफग्गुणी उत्तराफग्गुणी हत्थो
 चित्ता, साईआइया णं सत्त णक्खत्ता उत्तरदारिया पण्णत्ता, तं०-साई विसाहा
 अणुराहा जेडा मूले पुव्वासादा उत्तरासादा ॥ ५७ ॥ **दसमस्स पाहुडस्स
 एवकवीसइमं पाहुडपाहुड समत्तं ॥ १०-२१ ॥**

ता कंहं ते णक्खत्ताविजए आहिएति वएजा ? ता अयण्णं जंबुद्दीवे २ जाव
 परिकखेवेणं०, ता जंबुद्दीवे णं दीवे दो चंदा पभासेंसु वा पभासेंति वा पभासिस्संति
 वा, दो सूरिया तर्धिसु वा तर्वेति वा तविस्संति वा, छप्पण्णं णक्खत्ता जोयं
 जोएंसु वा ३, तंजहा-दो अभीई दो सवणा दो धणिद्धा दो सयभिसया दो पुव्वा-
 पोट्टवया दो उत्तरापोट्टवया दो रेवई दो अस्सिणी दो भरणी दो कत्तिया दो रोहिणी
 दो संठाणा दो अहा दो पुणव्वसू दो पुस्सा दो अस्सेसाओ दो महा दो पुव्वा-
 फग्गुणी दो उत्तराफग्गुणी दो हत्था दो चित्ता दो साई दो विसाहा दो अणुराहा
 दो जेडा दो मूला दो पुव्वासादा दो उत्तरासादा, ता एएसि णं छप्पण्णाए णक्ख-
 त्ताणं अत्थि णक्खत्ता जे णं णव मुहुत्ते सत्तावीसं च सत्ताट्ठिभागे मुहुत्तस्स चंदेण
 सद्धिं जोयं जोएंति, अत्थि णक्खत्ता जे णं पण्णरस मुहुत्ते चंदेण सद्धिं जोयं
 जोएंति, अत्थि णक्खत्ता जे णं तीसमुहुत्ते चंदेण सद्धिं जोयं जोएंति, अत्थि
 णक्खत्ता जे णं पणयालीसं मुहुत्ते चंदेण सद्धिं जोयं जोएंति, ता एएसि णं छप्प-
 ण्णाए णक्खत्ताणं कयरे णक्खत्ता जे णं णव मुहुत्ते सत्तावीसं च सत्ताट्ठिभागे
 मुहुत्तस्स चंदेण सद्धिं जोयं जोएंति, कयरे णक्खत्ता जे णं पण्णरसमुहुत्ते चंदेण
 सद्धिं जोयं जोएंति, कयरे णक्खत्ता जे णं तीसं मुहुत्ते चंदेण सद्धिं जोयं जोएंति,
 कयरे णक्खत्ता जे णं पणयालीसं मुहुत्ते चंदेण सद्धिं जोयं जोएंति ? ता एएसि णं

छप्पण्णाए णक्खत्ताणं तत्थ जे ते णक्खत्ता जे णं णव मुहुत्ते सत्तावीसं च सत्तद्धि-
 भागे मुहुत्तस्स चंदेण सद्धिं जोयं जोएंति ते णं दो अभीई, तत्थ जे ते णक्खत्ता
 जे णं पण्णरस मुहुत्ते चंदेण सद्धिं जोयं जोएंति ते णं बारस, तंजहा—दो सयमि-
 सया दो भरणी दो अहा दो अस्सेसा दो साई दो जेडा, तत्थ जे ते णक्खत्ता
 जे णं तीसं मुहुत्ते चंदेण सद्धिं जोयं जोएंति ते णं तीसं, तंजहा—दो सवणा दो
 धणिडा दो पुव्वाभद्वया दो रेवई दो अस्सिणी दो कत्तिया दो संठाणा दो पुस्सा
 दो महा दो पुव्वाफग्गुणी दो हत्था दो चित्ता दो अणुराहा दो मूला दो पुव्वासाढा,
 तत्थ जे ते णक्खत्ता जे णं पणयालीसं मुहुत्ते चंदेण सद्धिं जोयं जोएंति ते णं बारस,
 तंजहा—दो उत्तरापोड्वया दो रोहिणी दो पुणव्वसू दो उत्तराफग्गुणी दो विसाहा दो
 उत्तरासाढा, ता एएसि णं छप्पण्णाए णक्खत्ताणं अत्थि णक्खत्ता जे णं चत्तारि
 अहोरत्ते छच्च मुहुत्ते सूरिएण सद्धिं जोयं जोएंति, अत्थि णक्खत्ता जे णं छ अहोरत्ते
 एकवीसं च मुहुत्ते सूरेंण सद्धिं जोयं जोएंति, अत्थि णक्खत्ता जे णं तेरस अहोरत्ते
 बारसमुहुत्ते सूरेंण सद्धिं जोयं जोएंति, अत्थि णक्खत्ता जे णं वीसं अहोरत्ते तिण्णि
 य मुहुत्ते सूरेंण सद्धिं जोयं जोएंति, ता एएसि णं छप्पण्णाए णक्खत्ताणं कयरे
 णक्खत्ता जे णं तं चैव उच्चारैयव्वं, ता एएसि णं छप्पण्णाए णक्खत्ताणं तत्थ जे ते
 णक्खत्ता जे णं चत्तारि अहोरत्ते छच्च मुहुत्ते सूरेंण सद्धिं जोयं जोएंति ते णं दो
 अभीई, तत्थ जे ते णक्खत्ता जे णं छ अहोरत्ते एकवीसं च मुहुत्ते सूरेंण सद्धिं
 जोयं जोएंति ते णं बारस, तंजहा—दो सयमिसया दो अहा दो अस्सेसा दो साई दो
 विसाहा दो जेडा, तत्थ जे ते णक्खत्ता जे णं तेरस अहोरत्ते बारसमुहुत्ते सूरेंण सद्धिं
 जोयं जोएंति ते णं तीसं, तंजहा—दो सवणा जाव दो पुव्वासाढा, तत्थ जे ते णक्खत्ता
 जे णं वीसं अहोरत्ते तिण्णि य मुहुत्ते सूरेंण सद्धिं जोयं जोएंति ते णं बारस, तंजहा—
 दो उत्तरापोड्वया जाव दो उत्तरासाढा ॥५८॥ ता कइं ते सीमाविकखंभे आहिप्रति
 वएजा ? ता एएसि णं छप्पण्णाए णक्खत्ताणं अत्थि णक्खत्ता जेसि णं छ सया तीसा
 सत्तद्धिभागतीसइभागाणं सीमाविकखंभो, अत्थि णक्खत्ता जेसि णं सहस्सं चोत्तरं
 सत्तद्धिभागतीसइभागाणं सीमाविकखंभो, अत्थि णक्खत्ता जेसि णं दो सत्ता दसु-
 त्तरा सत्तद्धिभागतीसइभागाणं सीमाविकखंभो, अत्थि णक्खत्ता जेसि णं तिसहस्सं पंच-
 दसुत्तरं सत्तद्धिभागतीसइभागाणं सीमाविकखंभो, ता एएसि णं छप्पण्णाए णक्ख-
 ताणं कयरे णक्खत्ता जेसि णं छ सया तीसा तं चैव उच्चारैयव्वं जाव कयरे णक्खत्ता

जेसि णं तिसहस्सं पंचदसुत्तरं सत्तट्ठिभागतीसइभागाणं सीमाविक्खंभो ? ता एएसि णं छप्पणाए णक्खत्ताणं तत्थ जे ते णक्खत्ता जेसि णं छ सया तीसा सत्तट्ठिभागतीसइभागाणं सीमाविक्खंभो ते णं दो अभीई, तत्थ जे ते णक्खत्ता जेसि णं सहस्सं पंचुत्तरं सत्तट्ठिभागतीसइभागाणं सीमाविक्खंभो ते णं बारस, तंजहा—दो सयभिसया जाव दो जेद्धा, तत्थ जे ते णक्खत्ता जेसि णं दो सहस्सा दसुत्तरा सत्तट्ठिभागतीसइभागाणं सीमाविक्खंभो ते णं तीसं, तंजहा—दो सवणा जाव दो पुच्चासाटा, तत्थ जे ते णक्खत्ता जेसि णं तिण्णि सहस्सा पण्णरसुत्तरा सत्तट्ठिभागतीसइभागाणं सीमाविक्खंभो ते णं बारस, तं०—दो उत्तरापोट्टदया जाव दो उत्तरासाटा ॥ ५९ ॥

ता एएसि णं छप्पणाए णक्खत्ताणं किं सया पाओ चंदेण सद्धिं जोयं जोएंति, किं सया सायं चंदेण सद्धिं जायं जोएंति, किं सया दुहओ पविसिय २ चंदेण सद्धिं जोयं जोएंति ? ता एएसि णं छप्पणाए णक्खत्ताणं ण किमवि तं जं सया पाओ चंदेण सद्धिं जायं जोएंति, णो सया सायं चंदेण सद्धिं जोयं जोएंति, णो सया दुहओ पविसित्ता २ चंदेण सद्धिं जायं जोएंति, णत्थि राइंदियाणं बुद्धोत्तुहीए मुहुत्ताणं च चओवचएणं णण्णत्थ दोहिं अभीईहिं, ता एएणं दो अभीई पायंच्चिय पायंच्चिय चोत्तालीसं २ अमावासं जोएंति, णो चेव णं पुण्णिमासिणि ॥ ६० ॥ तत्थ खल्ल इमाओ वावाट्ठि पुण्णिमासिणीओ वावाट्ठि अमावासाओ पण्णत्ताओ, ता एएसि णं पंचण्हं संवच्छराणं पटमं पुण्णिमासिणिं चंदे कंसि देसंसि जोएइ ? ता जंसि णं देसंसि चंदे चरिमं वावाट्ठि पुण्णिमासिणिं जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दुव्वत्तीसं भागे उवाइणावेत्ता एत्थ णं से चंदे पटमं पुण्णिमासिणिं जोएइ, ता एएसि णं पंचण्हं संवच्छराणं दोच्चं पुण्णिमासिणिं चंदे कंसि देसंसि जोएइ ? ता जंसि णं देसंसि चंदे पटमं पुण्णिमासिणिं जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दुव्वत्तीसं भागे उवाइणावेत्ता एत्थ णं से चंदे दोच्चं पुण्णिमासिणिं जोएइ, ता एएसि णं पंचण्हं संवच्छराणं तच्चं पुण्णिमासिणिं चंदे कंसि देसंसि जोएइ ? ता जंसि णं देसंसि चंदो दोच्चं पुण्णिमासिणिं जोएइ ताओ पुण्णिमासिणिट्ठाणाओ मंडलं चउव्वीसेणं सएणं छेत्ता दुव्वत्तीसं भागे उवाइणावेत्ता एत्थ णं से चंदे तच्चं पुण्णिमासिणिं जोएइ, ता एएसि णं पंचण्हं संवच्छराणं दुवाल्लसमं पुण्णिमासिणिं चंदे कंसि देसंसि जोएइ ? ता जंसि णं देसंसि चंदे तच्चं पुण्णिमासिणिं जोएइ ताओ पुण्णिमा-

सिणिङ्गाणाओ मंडलं चउव्वीसेणं सएणं छेत्ता दोण्णि अट्ठारसए भागसए उवाइणावेत्ता एत्थ णं से चंदे दुवालसमं पुण्णिमासिणिं जोएइ, एवं खलु एएणुवाएणं ताओ २ पुण्णिमासिणिङ्गाणाओ मंडलं चउव्वीसेणं सएणं छेत्ता दुवत्तीसं भागे उवाइणावेत्ता तंसि २ देसंसि तं तं पुण्णिमासिणिं चंदे जोएइ, ता एएसि णं पंचण्हं संवच्छराणं चरिमं वावट्ठिं पुण्णिमासिणिं चंदे कंसि देसंसि जोएइ ? ता जंबुद्दीवस्स णं० पाईणपडीणाययाए उदीणदाहिणाययाए जीवाए मंडलं चउव्वीसेणं सएणं छेत्ता दाहिणिल्लंसि चउभागमंडलंसि सत्तावीसं चउभागे उवाइणावेत्ता अट्ठावीसइभागे वीसहा छेत्ता अट्ठारसभागे उवाइणावेत्ता तिहिं भागेहिं दोहि य कलाहिं पच्चत्थिमिल्लं चउभागमंडलं असंपत्ते एत्थ णं से चंदे चरिमं वावट्ठिं पुण्णिमासिणिं जोएइ॥६१॥ ता एएसि णं पंचण्हं संवच्छराणं पढमं पुण्णिमासिणिं सूरे कंसि देसंसि जोएइ ? ता जंसि णं देसंसि सूरे चरिमं वावट्ठिं पुण्णिमासिणिं जोएइ ताओ पुण्णिमासिणिङ्गाणाओ मंडलं चउव्वीसेणं सएणं छेत्ता चउणवइं भागे उवाइणावेत्ता एत्थ णं से सूरे पढमं पुण्णिमासिणिं जोएइ, ता एएसि णं पंचण्हं संवच्छराणं दोच्चं पुण्णिमासिणिं सूरे कंसि देसंसि जोएइ ? ता जंसि णं देसंसि सूरे पढमं पुण्णिमासिणिं जोएइ ताओ पुण्णिमासिणिङ्गाणाओ मंडलं चउव्वीसेणं सएणं छेत्ता चउणवइं भागे उवाइणावेत्ता एत्थ णं से सूरे दोच्चं पुण्णिमासिणिं जोएइ, ता एएसि णं पंचण्हं संवच्छराणं तच्चं पुण्णिमासिणिं सूरे कंसि देसंसि जोएइ ? ता जंसि णं देसंसि सूरे दोच्चं पुण्णिमासिणिं जोएइ ताओ पुण्णिमासिणिङ्गाणाओ मंडलं चउव्वीसेणं सएणं छेत्ता चउणवइं भागे उवाइणावेत्ता एत्थ णं से सूरे तच्चं पुण्णिमासिणिं जोएइ, ता एएसि णं पंचण्हं संवच्छराणं दुवालसमं पुण्णिमासिणिं सूरे कंसि देसंसि जोएइ ? ता जंसि णं देसंसि सूरे तच्चं पुण्णिमासिणिं जोएइ ताओ पुण्णिमासिणिङ्गाणाओ मंडलं चउव्वीसेणं सएणं छेत्ता अट्ठ छत्ताले भागसए उवाइणावेत्ता एत्थ णं से सूरे दुवालसमं पुण्णिमासिणिं जोएइ, एवं खलु एएणुवाएणं ताओ २ पुण्णिमासिणिङ्गाणाओ मंडलं चउव्वीसेणं सएणं छेत्ता चउणवइं २ भागे उवाइणावेत्ता तंसि २ देसंसि तं तं पुण्णिमासिणिं सूरे जोएइ, ता एएसि णं पंचण्हं संवच्छराणं चरिमं वावट्ठिं पुण्णिमासिणिं सूरे कंसि देसंसि जोएइ ? ता जंबुद्दीवस्स णं० पाईणपडीणाययाए उदीणदाहिणाययाए जीवाए मंडलं चउव्वीसेणं सएणं छेत्ता पुरत्थिमिल्लंसि चउभागमंडलंसि सत्तावीसं भागे उवाइणावेत्ता अट्ठावीसइं भागं वीसहा छेत्ता अट्ठारसभागे उवाइणावेत्ता तिहिं

भागोहि दोहि य कलाहि दाहिणिल्लं चउभागमंडलं असंपत्ते एत्थ णं सूरे चरिमं
 बावट्ठिं पुण्णिमं जोएइ ॥ ६२ ॥ ता एएसि णं पंचण्हं संवच्छराणं पटमं अमावासं
 चंदे कंसि देसंसि जोएइ ? ता जंसि णं देसंसि चंदे चरिमबावट्ठिं अमावासं जोएइ
 ताओ अमावासट्ठाणाओ मंडलं चउव्वीसेणं सएणं छेत्ता दुवत्तीसं भागे उवाइणावेत्ता
 एत्थ णं से चंदे पटमं अमावासं जोएइ, एवं जेणेव अमिलावेणं चंदस्स पुण्णि-
 मासिणीओ० तेणेव अमिलावेणं अमावासाओवि भाणियव्वाओ-विइया तइया
 दुवाल्लसमी, एवं खलु एणुवाएणं ताओ २ अमावासट्ठाणाओ मंडलं चउव्वीसेणं
 सएणं छेत्ता दुवत्तीसं २ भागे उवाइणावेत्ता तंसि २ देसंसि तं तं अमावासं० चंदे
 जोएइ, ता एएसि णं पंचण्हं संवच्छराणं चरिमं बावट्ठिं अमावासं चंदे कंसि देसंसि
 जोएइ ? ता जंसि णं देसंसि चंदे चरिमं बावट्ठिं पुण्णिमासिणिं जोएइ ताओ
 पुण्णिमासिणिट्ठाणाओ मंडलं चउव्वीसेणं सएणं छेत्ता सोलसभागे उक्कोवइत्ता एत्थ
 णं से चंदे चरिमं बावट्ठिं अमावासं जोएइ ॥६३॥ ता एएसि णं पंचण्हं संवच्छ-
 राणं पटमं अमावासं सूरे कंसि देसंसि जोएइ ? ता जंसि णं देसंसि सूरे चरिमं
 बावट्ठिं अमावासं जोएइ ताओ अमावासट्ठाणाओ मंडलं चउव्वीसेणं सएणं छेत्ता
 चउणउइभागे उवाइणावेत्ता एत्थ णं से सूरे पटमं अमावासं जोएइ, एवं जेणेव अमि-
 लावेणं सूरियस्स पुण्णिमासिणीओ० तेणेव अमिलावेणं अमावासाओवि०, तंजहा-
 विइया तइया दुवाल्लसमी, एवं खलु एणुवाएणं ताओ अमावासट्ठाणाओ मंडलं चउव्वी-
 सेणं सएणं छेत्ता चउणउइ २ भागे उवाइणावेत्ता तंसि २ देसंसि तं २ अमावासं० सूरे
 जोएइ, ता एएसि णं पंचण्हं संवच्छराणं चरिमं बावट्ठिं अमावासं पुच्छा, ता जंसि
 णं देसंसि सूरे चरिमं बावट्ठिं पुण्णिमासिणिं जोएइ ताओ पुण्णिमासिणिट्ठाणाओ
 मंडलं चउव्वीसेणं सएणं छेत्ता सत्तालीसं भागे उक्कोवइत्ता एत्थ णं से सूरे चरिमं
 बावट्ठिं अमावासं जोएइ ॥६४॥ ता एएसि णं पंचण्हं संवच्छराणं पटमं पुण्णिमासिणिं
 चंदे केणं णक्खत्तेणं(जोयं)जोएइ ? ता धणिट्ठाहिं, धणिट्ठाणं तिण्णि मुहुत्ता एग्गुणवीसं
 च बावट्ठिभागा मुहुत्तस्स बावट्ठिभागं च सत्तट्ठिहा छेत्ता पण्णाट्ठिं चुण्णियाभागा सेसा,
 तं समयं च णं सूरिए केणं णक्खत्तेणं जोएइ ? ता पुव्वाफग्गुणीहिं, पुव्वाफग्गुणीणं
 अट्ठावीसं मुहुत्ता अट्ठतीसं च बावट्ठिभागा मुहुत्तस्स बावट्ठिभागं च सत्तट्ठिहा छेत्ता
 दुवत्तीसं चुण्णियाभागा सेसा, ता एएसि णं पंचण्हं संवच्छराणं दोच्चं पुण्णिमासिणिं चंदे
 केणं णक्खत्तेणं जोएइ ? ता उत्तराहिं पोड्वयाहिं, उत्तराणं पोड्वयाणं सत्तावीसं मुहुत्ता

चोदस य बावट्टिभागे मुहुत्तस्स बावट्टिभागं च सत्तट्टिहा छेत्ता बावट्टिं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता उत्तराहिं फग्गुणीहिं, उत्तरा-
 फग्गुणीणं सत्त मुहुत्ता तेत्तीसं च बावट्टिभागा मुहुत्तस्स बावट्टिभागं च सत्तट्टिहा छेत्ता
 एकवीसं चुण्णियाभागा सेसा, ता एएसि णं पंचण्हं संवच्छराणं तच्चं पुण्णिमासिणिं चंदे
 केणं णक्खत्तेणं जोएइ ? ता अस्सिणीहिं, अस्सिणीणं एकवीसं मुहुत्ता णव य एगट्टि-
 भागा मुहुत्तस्स बावट्टिभागं च सत्तट्टिहा छेत्ता तेवाट्टिं चुण्णियाभागा सेसा, तं समयं
 च णं सूरे केणं णक्खत्तेणं जोएइ, ? ता चित्ताहिं, चित्ताणं एकको मुहुत्तो अट्ठावीसं च
 बावट्टिभागा मुहुत्तस्स बावट्टिभागं च सत्तट्टिहा छेत्ता तीसं चुण्णियाभागा सेसा, ता
 एएसि णं पंचण्हं संवच्छराणं दुवालसमं पुण्णिमासिणिं चंदे केणं णक्खत्तेणं जोएइ ?
 ता उत्तराहिं आसादाहिं, उत्तराणं आसादाणं छदुवीसं मुहुत्ता छदुवीसं च बावट्टि-
 भागा मुहुत्तस्स बावट्टिभागं च सत्तट्टिहा छेत्ता चउप्पणं चुण्णियाभागा सेसा,
 तं समयं च णं सूरे केणं णक्खत्तेणं जोएइ ? ता पुणव्वसुणा, पुणव्वसुस्स सोलस-
 मुहुत्ता अट्ठ य बावट्टिभागा मुहुत्तस्स बावट्टिभागं च सत्तट्टिहा छेत्ता वीसं चुण्णिया-
 भागा सेसा, ता एएसि णं पंचण्हं संवच्छराणं चरिमं बावट्टिं पुण्णिमासिणिं चंदे केणं
 णक्खत्तेणं जोएइ ? ता उत्तराहिं आसादाहिं, उत्तराणं आसादाणं चरमसमए, तं
 समयं च णं सूरे केणं णक्खत्तेणं जोएइ ? ता पुस्सेणं, पुस्सस्स एग्गुणीसं मुहुत्ता
 तेयालीसं च बावट्टिभागा मुहुत्तस्स बावट्टिभागं च सत्तट्टिहा छेत्ता तेत्तीसं चुण्णिया-
 भागा सेसा ॥६५॥ ता एएसि णं पंचण्हं संवच्छराणं पटमं अमावासं चंदे केणं
 णक्खत्तेणं जोएइ ? ता अस्सेसाहिं, अस्सेसाणं एकके मुहुत्ते चत्तालीसं च बावट्टि-
 भागा मुहुत्तस्स बावट्टिभागं च सत्तट्टिहा छेत्ता छावाट्टिं चुण्णियाभागा सेसा, तं
 समयं च णं सूरे केणं णक्खत्तेणं जोएइ ? ता अस्सेसाहिं चैव, अस्सेसाणं एकको
 मुहुत्तो चत्तालीसं च बावट्टिभागा मुहुत्तस्स बावट्टिभागं च सत्तट्टिहा छेत्ता छावाट्टिं
 चुण्णियाभागा सेसा, ता एएसि णं पंचण्हं संवच्छराणं दोच्चं अमावासं चंदे केणं
 णक्खत्तेणं जोएइ ? ता उत्तराहिं फग्गुणीहिं, उत्तराणं फग्गुणीणं चत्तालीसं मुहुत्ता
 पण्णतीसं बावट्टिभागा मुहुत्तस्स बावट्टिभागं च सत्तट्टिहा छेत्ता पण्णट्टिं चुण्णियाभागा
 सेसा, तं समयं च णं सूरे केणं णक्खत्तेणं जोएइ ? ता उत्तराहिं चैव फग्गुणीहिं,
 उत्तराणं फग्गुणीणं जहेव चंदस्स । ता एएसि णं पंचण्हं संवच्छराणं तच्चं अमावासं
 चंदे केणं णक्खत्तेणं जोएइ ? ता हत्थेणं, हत्थस्स चत्तारि मुहुत्ता तीसं च बावट्टि-

भागा मुहुत्तस्स वावट्ठिभागं च सत्तट्ठिहा छेत्ता वावट्ठिं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता हत्थेणं चेव, हत्थस्स जहा चंदस्स, ता एएसि णं पंचण्हं संवच्छराणं दुवाल्समं अमावासं चंदे केणं णक्खत्तेणं जोएइ ? ता अद्दाहिं, अद्दाणं चत्तारि मुहुत्ता दस य वावट्ठिभागा मुहुत्तस्स वावट्ठिभागं च सत्तट्ठिहा छेत्ता चउप्पणं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता अद्दाहिं चेव, अद्दाणं जहा चंदस्स । ता एएसि णं पंचण्हं संवच्छराणं चरिमं वावट्ठि अमावासं चंदे केणं णक्खत्तेणं जोएइ ? ता पुणव्वसुणा, पुणव्वसुस्स बावीसं मुहुत्ता बायालीसं च वासट्ठिभागा मुहुत्तस्स सेसा, तं समयं च णं सूरे केणं णक्खत्तेणं जोएइ ? ता पुणव्वसुणा चेव, पुणव्वसुस्स णं जहा चंदस्स ॥ ६६ ॥ ता जेणं अज्जणक्खत्तेणं चंदे जोयं जोएइ जंसि देसंसि से णं इमाइं अद्दुत्तसयाइं चउवीसं च वावट्ठिभागे मुहुत्तस्स वावट्ठिभागं च सत्तट्ठिहा छेत्ता वावट्ठिं चुण्णियाभागे उवाइणावेत्ता पुणरवि से चंदे अण्णेणं सरिसएणं चेव णक्खत्तेणं जोयं जोएइ अण्णंसि देसंसि, ता जेणं अज्जणक्खत्तेणं चंदे जोयं जोएइ जंसि देसंसि से णं इमाइं सोलस अद्दुत्तीसे मुहुत्तसयाइं अउणापणं च वावट्ठिभागे मुहुत्तस्स वावट्ठिभागं च सत्तट्ठिहा छेत्ता पण्णट्ठिं चुण्णियाभागे उवाइणावेत्ता पुणरवि से णं चंदे तेणं चेव णक्खत्तेणं जोयं जोएइ अण्णंसि देसंसि, ता जेणं अज्जणक्खत्तेणं चंदे जोयं जोएइ जंसि देसंसि से णं इमाइं चउप्पणमुहुत्तसहस्साइं णव य मुहुत्तसयाइं उवाइणावेत्ता पुणरवि से चंदे अण्णेणं तारिसएणं चेव० जोयं जोएइ तंसि देसंसि, ता जेणं अज्जणक्खत्तेणं चंदे जोयं जोएइ जंसि देसंसि से णं इमाइं एणं लक्खं णव य सहस्से अद्दुत्तसयाइं उवाइणावेत्ता पुणरवि से चंदे तेणं चेव णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं जोएइ जंसि देसंसि से णं इमाइं तिण्णि छावट्ठाइं राइंदियसयाइं उवाइणावेत्ता पुणरवि से सूरे अण्णेणं तारिसएणं चेव णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं जोएइ तंसि देसंसि से णं इमाइं सत्तदुवीसं राइंदियसयाइं उवाइणावेत्ता पुणरवि से सूरे तेणं चेव णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं जोएइ जंसि देसंसि से णं इमाइं अद्दुत्तस तीससं राइंदियसयाइं उवाइणावेत्ता पुणरवि से सूरे अण्णेणं तारिसएणं चेव णक्खत्तेणं जोयं जोएइ तंसि देसंसि, ता जेणं अज्जणक्खत्तेणं सूरे जोयं जोएइ जंसि देसंसि तेणं इमाइं छत्तीसं सट्ठाइं राइंदियसयाइं उवाइणावेत्ता पुणरवि

से सूरै तेणं चैव णक्खत्तेणं जोयं जोएइ तंसि देसंसि ॥ ६७ ॥ ता जया णं इमे चंदे गइसमावण्णए भवइ तथा णं इयरेवि चंदे गइसमावण्णए भवइ, जया णं इयरे चंदे गइसमावण्णए भवइ तथा णं इमेवि चंदे गइसमावण्णए भवइ, ता जया णं इमे सूरिए गइसमावण्णे भवइ तथा णं इयरेवि सूरिए गइसमावण्णे भवइ, जया णं इयरे सूरिए गइसमावण्णे भवइ तथा णं इमेवि सूरिए गइसमावण्णे भवइ एवं गहेवि णक्खत्तेवि, ता जया णं इमे चंदे जुत्ते जोगेणं भवइ तथा णं इयरेवि चंदे जुत्ते जोगेणं भवइ, जया णं इयरे चंदे जुत्ते जोगेणं भवइ तथा णं इमेवि चंदे जुत्ते जोगेणं भवइ, एवं सूरैवि गहेवि णक्खत्तेवि, सयावि णं चंदा जुत्ता जोगेहिं सयावि णं सूरा जुत्ता जोगेहिं सयावि णं गहा जुत्ता जोगेहिं सयावि णं णक्खत्ता जुत्ता जोगेहिं दुहओवि णं चंदा जुत्ता जोगेहिं दुहओवि णं सूरा जुत्ता जोगेहिं दुहओवि णं गहा जुत्ता जोगेहिं दुहओवि णं णक्खत्ता जुत्ता जोगेहिं, मंडलं सय-सहस्सेणं अट्टाणउयाए सएहिं छेत्ता । इच्चेस णक्खत्ते खेत्तपरिभागे णक्खत्तविजए पाहुड्ढेति आहिएत्ति-वेमि ॥ ६८ ॥ दसमस्स पाहुडस्स बावीसइमं पाहुडपाहुडं समत्तं ॥ १०-२२ ॥ दसमं पाहुडं समत्तं ॥ १० ॥

एककारसमं पाहुडं

ता कहं ते संवच्छराणाई आहिएति वएज्जा ? तत्थ खलु इमे पंच संवच्छरा पण्णत्ता, तंजहा-चंदे २ अभिवद्धिए चंदे अभिवद्धिए, ता एएसि णं पंचण्हं संवच्छराणं पढमस्स चंदसंवच्छरस्स के आई आहिएति वएज्जा ? ता जे णं पंचमस्स अभिवद्धियसंवच्छरस्स पज्जवसाणे से णं पढमस्स चंदसंवच्छरस्स आई अणंतर-पुरक्खडे समए, ता से णं किं पज्जवसिए आहिएति वएज्जा ? ता जे णं दोच्चस्स चंदसंवच्छरस्स आई से णं पढमस्स चंदसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं (जोगं) जोएइ ? ता उत्तराहिं आसा-टाहिं, उत्तराणं आसाटाणं छदुवीसं मुहुत्ता छदुवीसं च बावट्टिभागा मुहुत्तस्स बावट्टि-भागं च सत्तट्टिहा छेत्ता चउप्पणं चुण्णियाभागा सेसा, तं समयं च णं सूरै केणं णक्खत्तेणं जोएइ ? ता पुणव्वसुणा, पुणव्वसुस्स सोल्लस्स मुहुत्ता अट्ट य बावट्टिभागा मुहुत्तस्स बावट्टिभागं च सत्तट्टिहा छेत्ता वीसं चुण्णियाभागा सेसा । ता एएसि णं पंचण्हं संवच्छराणं दोच्चस्स चंदसंवच्छरस्स के आई आहिएति वएज्जा ? ता जे णं पढमस्स चंदसंवच्छरस्स पज्जवसाणे से णं दोच्चस्स चंदसंवच्छरस्स आई अणंतर-

पुरक्खडे समए, ता से णं किं पज्जवसिए आहिएति वएजा ? ता जे णं तच्चस्स अभिवद्धियसंवच्छरस्स आई से णं दोच्चस्स चंदसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता पुव्वाहिं आसाढाहिं, पुव्वाणं आसाढाणं सत्त मुहुत्ता तेवणं च बावट्टिभागा मुहुत्तस्स बावट्टिभागं च सत्तट्टिहा छेत्ता इगतालीसं चुण्णियाभागा सेसा, तं समयं च णं सूरे केणं णक्खत्तेणं [जोयं] जोएइ ? ता पुणव्वसुणा, पुणव्वसुस्स णं बायालीसं मुहुत्ता पणतीसं च बावट्टिभागा मुहुत्तस्स बावट्टिभागं च सत्तट्टिहा छेत्ता सत्त चुण्णियाभागा सेसा । ता एएसि णं पंचण्हं संवच्छराणं तच्चस्स अभिवद्धियसंवच्छरस्स के आई आहिएति वएजा ? ता जे णं दोच्चस्स चंदसंवच्छरस्स पज्जवसाणे से णं तच्चस्स अभिवद्धियसंवच्छरस्स आई अणंतरपुरक्खडे समए, ता से णं किं पज्जवसिए आहिएति वएजा ? ता जे णं चउत्थस्स चंदसंवच्छरस्स आई से णं तच्चस्स अभिवद्धियसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं तेस्स मुहुत्ता तेस्स य बावट्टिभागा मुहुत्तस्स बावट्टिभागं च सत्तट्टिहा छेत्ता सत्तावीसं च चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पुणव्वसुणा, पुणव्वसुस्स दो मुहुत्ता छप्पणं च बावट्टिभागा मुहुत्तस्स बावट्टिभागं च सत्तट्टिहा छेत्ता सट्ठी चुण्णियाभागा सेसा । ता एएसि णं पंचण्हं संवच्छराणं चउत्थस्स चंदसंवच्छरस्स के आई आहिएति वएजा ? ता जे णं तच्चस्स अभिवद्धियसंवच्छरस्स पज्जवसाणे से णं चउत्थस्स चंदसंवच्छरस्स आई अणंतरपुरक्खडे समए, ता से णं किं पज्जवसिए आहिएति वएजा ? ता जे णं चरिमस्स अभिवद्धियसंवच्छरस्स आई से णं चउत्थस्स चंदसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चत्तालीसं मुहुत्ता चत्तालीसं च दासट्टिभागा मुहुत्तस्स बावट्टिभागं च सत्तट्टिहा छेत्ता चउसट्ठी चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पुणव्वसुणा, पुणव्वसुस्स अउणतीसं मुहुत्ता एकवीसं बावट्टिभागा मुहुत्तस्स बावट्टिभागं च सत्तट्टिहा छेत्ता सीयालीसं चुण्णियाभागा सेसा । ता एएसि णं पंचण्हं संवच्छराणं पंचमस्स अभिवद्धियसंवच्छरस्स के आई आहिएति वएजा ? ता जे णं चउत्थस्स चंदसंवच्छरस्स पज्जवसाणे से णं पंचमस्स अभिवद्धियसंवच्छरस्स आई अणंतरपुरक्खडे समए, ता से णं किं पज्जवसिए आहिएति वएजा ? ता जे णं पढमस्स चंदसंवच्छर-

स्स आई से णं पंचमस्स अभिवद्धियसंवच्छरस्स पज्जवसाणे अणंतरपच्छाकडे समए, तं समयं च णं चंदे केणं णक्खत्तेणं जोएइ ? ता उत्तराहिं आसाटाहिं, उत्तराणं० चरमसमए, तं समयं च णं सूरे केणं णक्खत्तेणं जोएइ ? ता पुस्सेणं, पुस्सस्स णं एक्कवीसं मुहुत्ता तेयालीसं च बावट्टिभागे मुहुत्तस्स बावट्टिभागं च सत्तट्टिहा छेत्ता तेत्तीसं चुण्णिगयाभागा सेसा ॥६९॥ एवकारसमं पाहुडं समत्तं ॥११॥

वारसमं पाहुडं

ता कहं णं संवच्छरा आहिताति वएज्जा ? तत्थ खलु इमे पंच संवच्छरा पण्णत्ता, तंजहा-णक्खत्ते चंदे उड्ड आइच्चे अभिवद्धिए, ता एएसि णं पंचण्हं संवच्छराणं पढमस्स णक्खत्तसंवच्छरस्स णक्खत्तमासे तीसइमुहुत्तेणं अहोरत्तेणं गणिज्जमाणे केवइए राइंदियग्गेणं आहिएति वएज्जा ? ता सत्तावीसं राइंदियाइं एक्कवीसं च सत्तट्टिभागा राइंदियस्स राइंदियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ? ता अट्टसए एगूणवीसे मुहुत्ताणं सत्तावीसं सत्तट्टिभागे मुहुत्तस्स मुहुत्तग्गेणं आहिएति वएज्जा, ता एस णं अट्टा दुवालसक्खुत्तकडा णक्खत्ते संवच्छरे, ता से णं केवइए राइंदियग्गेणं आहिएति वएज्जा ? ता तिण्णि सत्तावीसे राइंदियसए एक्कावण्णं च सत्तट्टिभागे राइंदियस्स राइंदियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ? ता णव मुहुत्तसहस्सा अट्ट य बत्तीसे मुहुत्तसए छप्पणं च सत्तट्टिभागे मुहुत्तस्स मुहुत्तग्गेणं आहिएति वएज्जा । ता एएसि णं पंचण्हं संवच्छराणं दोच्चस्स चंदसंवच्छरस्स चंदे मासे तीसइमुहुत्तेणं अहोरत्तेणं गणिज्जमाणे केवइए राइंदियग्गेणं आहिएति वएज्जा ? ता एगूणतीसं राइंदियाइं बत्तीसं बावट्टिभागा राइंदियस्स राइंदियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ? ता अट्टपंचासए मुहुत्ते तेत्तीसं च छावट्टिभागे मुहुत्तग्गेणं आहिएति वएज्जा, ता एस णं अट्टा दुवालसक्खुत्तकडा चंदे संवच्छरे, ता से णं केवइए राइंदियग्गेणं आहिएति वएज्जा ? ता तिण्णि चउप्पण्णे राइंदियसए दुवालस य बावट्टिभागा राइंदियग्गेणं आहिएति वएज्जा, ता से णं केवइए मुहुत्तग्गेणं आहिएति वएज्जा ? ता दस मुहुत्तसहस्साइं छच्च पणवीसे मुहुत्तसए पण्णासं च बावट्टिभागे मुहुत्तग्गेणं आहिएति वएज्जा । ता एएसि णं पंचण्हं संवच्छराणं तच्चस्स उडुसंवच्छरस्स उडुमासे तीसइमुहुत्तेणं० गणिज्जमाणे केवइए राइंदियग्गेणं आहिएति वएज्जा ? ता तीसं राइंदियाणं राइंदियग्गेणं आहिएति वएज्जा, ता से णं केवइए मुहुत्तग्गेणं आहि-

एति वएजा ? ता णव मुहुत्तसयाइं मुहुत्तग्गेणं आहिएति वएजा, ता एस णं अद्धा दुवालसक्खुत्तकडा उद्ध संवच्छरे, ता से णं केवइए राइंदियग्गेणं आहिएति वएजा ? ता तिण्णि सट्ठे राइंदियसए राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ? ता दस मुहुत्तसहस्साइं अद्ध य सयाइं मुहुत्तग्गेणं आहिएति वएजा । ता एएसि णं पंचण्हं संवच्छराणं चउत्थस्स आइच्चसंवच्छरस्स आइच्चे मासे तीसइमुहुत्तेणं अहोरत्तेणं गणिज्जमाणे केवइए राइंदियग्गेणं आहिएति वएजा ? ता तीसं राइंदियाइं अवद्धभागं च राइंदियस्स राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ? ता णव पण्णरस मुहुत्तसए मुहुत्तग्गेणं आहिएति वएजा, ता एस णं अद्धा दुवालसक्खुत्तकडा आइच्चे संवच्छरे, ता से णं केवइए राइंदियग्गेणं आहिएति वएजा ? ता तिण्णि छावट्ठे राइंदियसए राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ? ता दस मुहुत्तस्स सहस्साइं णव असीए मुहुत्तसए मुहुत्तग्गेणं आहिएति वएजा । ता एएसि णं पंचण्हं संवच्छराणं पंचमस्स अभिवद्धियसंवच्छरस्स अभिवद्धिए मासे तीसइमुहुत्तेणं गणिज्जमाणे केवइए राइंदियग्गेणं आहिएति वएजा ? ता एक्कत्तंसं राइंदियाइं एगूणतीसं च मुहुत्ता सत्तरस बावट्ठिभागे मुहुत्तस्स राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ? ता णव एगूणसट्ठे मुहुत्तसए सत्तरस बावट्ठिभागे मुहुत्तस्स मुहुत्तग्गेणं आहिएति वएजा, ता एस णं अद्धा दुवालसक्खुत्तकडा अभिवद्धियसंवच्छरे, ता से णं केवइए राइंदियग्गेणं आहिएति वएजा ? ता तिण्णि तेसीए राइंदियसए एक्कवीसं च मुहुत्ता अट्टारस बावट्ठिभागे मुहुत्तस्स राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ? ता एक्कारस मुहुत्तसहस्साइं पंच य एक्कारस मुहुत्तसए अट्टारस बावट्ठिभागे मुहुत्तस्स मुहुत्तग्गेणं आहिएति वएजा ॥७०॥ ता केवइयं ते णोजुगे राइंदियग्गेणं आहिएति वएजा ? ता सत्तरस एक्काणउए राइंदियसए एगूणवीसं च मुहुत्तं सत्तावण्णे बावट्ठिभागे मुहुत्तस्स बावट्ठिभागं च सत्तट्ठिहा छेत्ता पणपणं चुण्णियाभागे राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ? ता तेपण्णमुहुत्तसहस्साइं सत्त य अउणापण्णे मुहुत्तसए सत्तावण्णं बावट्ठिभागे मुहुत्तस्स बावट्ठिभागं च सत्तट्ठिहा छेत्ता पणपणं चुण्णियाभागा मुहुत्तग्गेणं आहिएति वएजा, ता केवइए णं ते जुगप्पत्ते राइंदियग्गेणं आहिएति वएजा ? ता अद्धतीसं राइंदियाइं दस य

मुहुत्ता चत्तारि य वावट्टिभागे मुहुत्तस्स वावट्टिभागं च सत्तट्टिहा छेत्ता दुवालस चुण्णिया-
भागे राइंदियग्गेणं आहिएति वएजा, ता से णं केवइए मुहुत्तग्गेणं आहिएति वएजा ?
ता एक्कारस पण्णासे मुहुत्तसए चत्तारि य वावट्टिभागे मुहुत्तस्स वावट्टिभागं च सत्तट्टिहा
छेत्ता दुवालस चुण्णियाभागे मुहुत्तग्गेणं आहिएति वएजा, ता केवइयं जुगे राइंदिय-
ग्गेणं आहिएति वएजा ? ता अट्टारसतीसे राइंदियसए राइंदियग्गेणं आहिएति वएजा,
ता से णं केवइए मुहुत्तग्गेणं आहिएति वएजा ? ता चउप्पणं मुहुत्तसहस्साइं णव
य मुहुत्तसयाइं मुहुत्तग्गेणं आहिएति वएजा, ता से णं केवइए वावट्टिभागमुहुत्तग्गेणं
आहिएति वएजा ? ता चउत्तीसं सयसहस्साइं अट्टतीसं च वावट्टिभागमुहुत्तसए
वावट्टिभागमुहुत्तग्गेणं आहिएति वएजा ॥ ७१ ॥ ता कया णं एए आइच्चचंद-
संवच्छरा समाइया समपजवसिया आहितेति वएजा ? ता सट्टि एए आइच्चमासा
वावट्टि एए चंदमासा, एस णं अट्टा छक्खुत्तकडा दुवालसभइया तीसं एए आइच्च-
संवच्छरा एकतीसं एए चंदसंवच्छरा, तया णं एए आइच्चचंदसंवच्छरा समाइया
समपजवसिया आहिताति वएजा । ता कया णं एए आइच्चउडुचंदणक्खत्ता
संवच्छरा समाइया समपजवसिया आहितेति वएजा ? ता सट्टि एए आइच्चमासा
एगट्टि एए उडुमासा वावट्टि एए चंदमासा सत्तट्टि एए णक्खत्तमासा, एस णं अट्टा
दुवालसक्खुत्तकडा दुवालसभइया सट्टि एए आइच्चा संवच्छरा एगट्टि एए उडुसंवच्छरा
वावट्टि एए चंदा संवच्छरा सत्तट्टि एए णक्खत्ता संवच्छरा, तया णं एए आइच्च-
उडुचंदणक्खत्ता संवच्छरा समाइया समपजवसिया आहितेति वएजा । ता कया णं
एए अमिबद्धियआइच्चउडुचंदणक्खत्ता संवच्छरा समाइया समपजवसिया आहितेति
वएजा ? ता सत्तावणं मासा सत्त य अहोरत्ता एक्कारस य मुहुत्ता तेवीसं वावट्टिभागा
मुहुत्तस्स एए अमिबद्धिया मासा सट्टि एए आइच्चमासा एगट्टि एए उडुमासा
वावट्टी एए चंदमासा सत्तट्टि एए णक्खत्तमासा, एस णं अट्टा छप्पणसयक्खुत्तकडा
दुवालसभइया सत्त सया चोत्ताला एए णं अमिबद्धिया संवच्छरा, सत्त सया असीया
एए णं आइच्चा संवच्छरा, सत्त सया तेणउया एए णं उडुसंवच्छरा अट्टसया छलुत्तरा
एए णं चंदा संवच्छरा, एकसत्तरी अट्टसया एए णं णक्खत्ता संवच्छरा तया णं
एए अमिबद्धिया आइच्चउडुचंदणक्खत्ता संवच्छरा समाइया समपजवसिया आहितेति
वएजा, ता णयट्टयाए णं चंदे संवच्छरे तिण्णि चउप्पण्णे राइंदियसए दुवालस य
वावट्टिभागे राइंदियस्स आहिएति वएजा, ता अहात्तच्चेणं चंदे संवच्छरे तिण्णि

चउप्पण्णे राइंदियसए पंच य मुहुत्ते पण्णासं च बावट्टिभागे मुहुत्तस्स आहिएति वएज्जा ॥७२॥ तत्थ खलु इमे छ उड्ड पण्णत्ता, तंजहा-पाउसे वरिसारत्ते सरए हेमंते वसंते गिम्हे, ता सव्वेवि णं एए चंदउड्ड दुवे २ मासाइ चउप्पण्णेणं २ आयाणेणं गणिज्जमाणा साइरेगाइं एगूणसट्ठि २ राइंदियाइं राइंदियगेणं आहितेति वएज्जा, तत्थ खलु इमे छ ओमरत्ता पण्णत्ता, तंजहा-तइए पव्वे सत्तमे पव्वे एक्का-रसमे पव्वे पण्णरसमे पव्वे एगूणवीसइमे पव्वे तेवीसइमे पव्वे, तत्थ खलु इमे छ अइरत्ता प०, तं०-चउत्थे पव्वे अट्टमे पव्वे बारसमे पव्वे सोल्लसमे पव्वे वीसइमे पव्वे चउवीसइमे पव्वे । छच्चेव य अइरत्ता आइच्चाओ हवंति माणाइं । छच्चेव ओमरत्ता चंदाहि हवंति माणाहिं ॥१॥७३॥ तत्थ खलु इमाओ पंच वासिक्कीओ पंच हेमंताओ आउट्टीओ पण्णत्ताओ, ता एएसि णं पंचण्हं संवच्छराणं पढमं वासिक्किं आउट्टिं चंदे केणं णक्खत्तेणं जोएइ ? ता अभीइणा, अभीइस्स पढमसमएणं, तं समयं च णं सूरे केणं णक्खत्तेणं जोएइ ? ता पूसेणं, पूसस्स एगूणवीसं मुहुत्ता तेत्तालीसं च बावट्टिभागा मुहुत्तस्स बावट्टिभागं च सत्तट्टिहा छेत्ता तेत्तीसं चुण्णिया-भागा सेसा, ता एएसि णं पंचण्हं संवच्छराणं दोच्चं वासिक्किं आउट्टिं चंदे केणं णक्खत्तेणं जोएइ ? ता संठाणाहिं, संठाणाणं एक्कारसमुहुत्ते ऊयार्लिसं च बावट्टिभागा मुहुत्तस्स बावट्टिभागं च सत्तट्टिहा छेत्ता तेपण्णं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पूसेणं, पूसस्स णं तं चेव जं पढमाए, ता एएसि णं पंचण्हं संवच्छराणं तच्चं वासिक्किं आउट्टिं चंदे केणं णक्खत्तेणं जोएइ ? ता विसाहाहिं, विसाहाणं तेरस मुहुत्ता चउप्पण्णं च बावट्टिभागा मुहुत्तस्स बावट्टिभागं च सत्तट्टिहा छेत्ता चत्तालीसं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पूसेणं, पूसस्स तं चेव, ता एएसि णं पंचण्हं संवच्छराणं चउत्थं वासिक्किं आउट्टिं चंदे केणं णक्खत्तेणं जोएइ ? ता रेवईहिं, रेवईणं पणवीसं मुहुत्ता बासट्टिभागा मुहुत्तस्स बावट्टिभागं च सत्तट्टिहा छेत्ता वत्तीसं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पूसेणं, पूसस्स तं चेव, ता एएसि णं पंचण्हं संवच्छराणं पंचमं वासिक्किं आउट्टिं चंदे केणं णक्खत्तेणं जोएइ ? ता पुव्वाहिं फग्गुणीहिं, पुव्वाफग्गुणीणं बारस मुहुत्ता सत्तालीसं च बावट्टिभागा मुहुत्तस्स बावट्टिभागं च सत्तट्टिहा छेत्ता तेरस चुण्णियाभागा सेसा, तं समयं च णं सूरे केणं णक्खत्तेणं जोएइ ? ता पूसेणं, पूसस्स तं चेव ॥७४॥ ता एएसि णं पंचण्हं संवच्छ-

राणं पदमं हेमंतिं आउट्टिं चंदे केणं णक्खत्तेणं जोएइ ? ता हत्थेणं, हत्थस्स णं पंच मुहुत्ता पण्णासं च बावट्टिभागा मुहुत्तस्स बावट्टिभागं च सत्तट्टिहा छेत्ता सट्टिं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं दोच्चं हेमंतिं आउट्टिं चंदे केणं णक्खत्तेणं जोएइ ? ता सयभिसयाहिं, सयभिसयाणं दुण्णि मुहुत्ता अट्टावीसं च बावट्टिभागा मुहुत्तस्स बावट्टिभागं च सत्तट्टिहा छेत्ता छत्तालीसं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं तच्चं हेमंतिं आउट्टिं चंदे केणं णक्खत्तेणं जोएइ ? ता पूसेणं, पूसरस्स एगूणवीसं मुहुत्ता तेयालीसं च बावट्टिभागा मुहुत्तस्स बावट्टिभागं च सत्तट्टिहा छेत्ता तेत्तीसं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं चउत्थिं हेमंतिं आउट्टिं चंदे केणं णक्खत्तेणं जोएइ ? ता मूलेणं, मूलस्स छ मुहुत्ता अट्टावणं च बावट्टिभागा मुहुत्तस्स बावट्टिभागं च सत्तट्टिहा छेत्ता वीसं चुण्णियाभागा सेसा, तं समयं च णं सूरे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए, ता एएसि णं पंचण्हं संवच्छराणं पंचमं हेमंतिं आउट्टिं चंदे केणं णक्खत्तेणं जोएइ ? ता कत्तियाहिं, कत्तियाणं अट्टारस्स मुहुत्ता छत्तीसं च बावट्टिभागा मुहुत्तस्स बावट्टिभागं च सत्तट्टिहा छेत्ता छ चुण्णियाभागा सेसा, तं समयं च णं सूरे केणं णक्खत्तेणं जोएइ ? ता उत्तराहिं आसाढाहिं, उत्तराणं आसाढाणं चरिमसमए ॥७५॥ तत्थ खलु इमे दसविहे जोए पण्णत्ते, तंजहा-वसभाणु-जोए वेणुयाणुजोए मंचे मंचाइमंचे छत्ते छत्ताइछत्ते जुयणद्धे धणसंमहे पीणिए मंडगण्णुत्ते णामं दसमे, ता एएसि णं पंचण्हं सं वच्छराणं छत्ताइच्छत्तं जोयं चंदे कंसि देसंसि जोएइ ? ता जंबुद्धीवस्स २ पाईणपडीणाययाए उदीणदाहिणाययाए जीवाए मंडलं चउव्वीसेणं सएणं छेत्ता दाहिणपुरत्थिमिल्लंसि चउभागमंडलंसि सत्तावीसं भागे उवाइणावेत्ता अट्टावीसइभागं वीसहा छेत्ता अट्टारसभागे उवाइणावेत्ता तिहिं भागेहिं दोहिं कलाहिं दाहिणपुरत्थिमिल्लं चउभागमंडलं असंपत्ते एत्थ णं से चंदे छत्ताइच्छत्तं जोयं जोएइ, उप्पिं चंदो मज्झे णक्खत्ते हेट्ठा आइच्चे, तं समयं च णं चंदे केणं णक्खत्तेणं जोएइ ? ता चित्ताहिं०, चरिमसमए ॥ ७६ ॥

वारसमं पाहुडं समत्तं ॥१२॥

ता कंहं ते चंद्रमसो बद्धोवद्धी आहितेति वएजा ? ता अट्ट पंचासीए मुहुत्तसए तीसं च बावट्टिभागे मुहुत्तस्स, ता दोसिणापक्खाओ अंधयारपक्खमयमाणे चंदे चत्तारि बायालसए छत्तालीसं च बावट्टिभागे मुहुत्तस्स जाइं चंदे रज्जइ, तंजहा-पटमाए पटमं भागं बिइयाए बिइयं भागं जाव पण्णरसीए पण्णरसमं भागं, चरिम-समए चंदे रत्ते भवइ, अवसेसे समए चंदे रत्ते य विरत्ते य भवइ, इयण्णं अमा-वासा, एत्थ णं पटमे पव्वे अमावासा, ता अंधयारपक्खो, तो णं दोसिणापक्खं अयमाणे चंदे चत्तारे बायाले मुहुत्तसए छयालीसं च बावट्टिभागा मुहुत्तस्स जाइं चंदे विरज्जइ, तं०-पटमाए पटमं भागं बिइयाए बिइयं भागं जाव पण्णरसीए पण्णरसमं भागं, चरिमे समए चंदे विरत्ते भवइ, अवसेससमए चंदे रत्ते य विरत्ते य भवइ, इयण्णं पुण्णिमासिणी, एत्थ णं दोच्चे पव्वे पुण्णिमासिणी ॥७७॥ तत्थ खलु इमाओ बावट्टि पुण्णिमासिणीओ बावट्टि अमावासाओ पण्णत्ताओ, बावट्टि एए कसिणा रागा, बावट्टि एए कसिणा विरागा, एए चउव्वीसे पव्वसए, एए चउव्वीसे कसिणारागविरागसए, जावइया णं पंचण्हं संवच्छराणं समया एगेणं चउव्वीसेणं समयसएणूणगा एवइया परित्ता असंखेजा देसरागविरागसया भवंतीति मक्खाया, ता अमावासाओ णं पुण्णिमासिणी चत्तारि बायाले मुहुत्तसए छत्तालीसं च बावट्टि-भागे मुहुत्तस्स आहितेति वएजा, ता पुण्णिमासिणीओ णं अमावासा चत्तारि बायाले मुहुत्तसए छत्तालीसं च बावट्टिभागे मुहुत्तस्स आहितेति वएजा, ता अमा-वासाओ णं अमावासा अट्टपंचासीए मुहुत्तसए तिसं च बावट्टिभागे मुहुत्तस्स आहितेति वएजा, ता पुण्णिमासिणीओ णं पुण्णिमासिणी अट्टपंचासीए मुहुत्तसए तीसं च बावट्टिभागे मुहुत्तस्स आहितेति वएजा, एस णं एवइए चंदे मासे एस णं एवइए सगले जुगे ॥ ७८ ॥ ता चंदेणं अट्टमासेणं चंदे कइ मंडलाइं चरइ ? ता चोइस चउव्वभागमंडलाइं चरइ, एणं च चउव्वीससयभागं मंडलस्स, ता आइच्चेणं अट्टमासेणं चंदे कइ मंडलाइं चरइ ? ता १४ वइं मंडलाइं चरइ, ता णवखत्तेणं अट्टमासेणं चंदे कइ मंडलाइं चरइ ? ता तेरस मंडलाइं चरइ, तेरस सत्तट्टिभागं मंडलस्स, तथा अवराइं खलु दुवे अट्टगाइं जाइं चंदे केणइ असामण्णगाइं सयमेव पविट्टित्ता २ चारं चरइ, कयराइं खलु ताइं दुवे अट्टगाइं जाइं चंदे केणइ असा-मण्णगाइं सयमेव पविट्टित्ता २ चारं चरइ ? ता इमाइं खलु ते वे अट्टगाइं जाइं चंदे केणइ असामण्णगाइं सयमेव पविट्टित्ता २ चारं चरइ, तंजहा-णिक्खममाणे

चेव अमावासंतेण पविसमाणे चेव पुण्णिमासितेण, एयाइं खलु दुवे अट्टगाइं जाइं चंदे केणइ असामण्णागाइं सयमेव पविट्ठित्ता २ चारं चरइ, ता पट्मायणगए चंदे दाहिणाए भागाए पविसमाणे सत्त अट्टमंडलाइं जाइं चंदे दाहिणाए भागाए पविसमाणे चारं चरइ, कयराइं खलु ताइं सत्त अट्टमंडलाइं जाइं चंदे दाहिणाए भागाए पविसमाणे चारं चरइ ! इमाइं खलु ताइं सत्त अट्टमंडलाइं जाइं चंदे दाहिणाए भागाए पविसमाणे चारं चरइ, तंजहा-विइए अट्टमंडले चउत्थे अट्टमंडले छट्ठे अट्टमंडले अट्टमे अट्टमंडले दसमे अट्टमंडले वारसमे अट्टमंडले चउदसमे अट्टमंडले, एयाइं खलु ताइं सत्त अट्टमंडलाइं जाइं चंदे दाहिणाए भागाए पविसमाणे चारं चरइ, ता पट्मायणगए चंदे उत्तराए भागाए पविसमाणे छ अट्टमंडलाइं तेरस य सत्तट्ठिभागाइं अट्टमंडलस्स जाइं चंदे उत्तराए भागाए पविसमाणे चारं चरइ, कयराइं खलु ताइं छ अट्टमंडलाइं तेरस य सत्तट्ठिभागाइं अट्टमंडलस्स जाइं चंदे उत्तराए भागाए पविसमाणे चारं चरइ ! इमाइं खलु ताइं छ अट्टमंडलाइं तेरस य सत्तट्ठिभागाइं अट्टमंडलस्स जाइं चंदे उत्तराए भागाए पविसमाणे चारं चरइ, तंजहा-तइए अट्टमंडले पंचमे अट्टमंडले सत्तमे अट्टमंडले णवमे अट्टमंडले एक्कारसमे अट्टमंडले तेरसमे अट्टमंडले पण्णरसमस्स अट्टमंडलस्स तेरस सत्तट्ठिभागाइं, एयाइं खलु ताइं छ अट्टमंडलाइं तेरस य सत्तट्ठिभागाइं अट्टमंडलस्स जाइं चंदे उत्तराए भागाए पविसमाणे चारं चरइ, एतावता य पट्मे चंदायणे समत्ते भवइ, ता णक्खत्ते अट्टमासे णो चंदे अट्टमासे णो चंदे अट्टमासे णक्खत्ते अट्टमासे, ता णक्खत्ताओ अट्टमासाओ से चंदे चंदेणं अट्टमासेणं किमहियं चरइ ? ता एगं अट्टमंडलं चरइ चत्तारि य सट्ठिभागाइं अट्टमंडलस्स सत्तट्ठिभागं एगतीसाए छेत्ता णव भागाइं, ता दोच्चायणगए चंदे पुरत्थिमाए भागाए णिक्खममाणे सचउप्पण्णाइं जाइं चंदे परस्स चिण्णं पडिचरइ, सत्त तेरसगाइं जाइं चंदे अप्पणो चिण्णं पडिचरइ, ता दोच्चायणगए चंदे पच्चत्थिमाए भागाए णिक्खममाणे चउप्पण्णाइं जाइं चंदे परस्स चिण्णं पडिचरइ, तेरसगछाइं० चंदे अप्पणो चिण्णं पडिचरइ, अवरगाइं खलु दुवे तेरसगाइं जाइं चंदे केणइ असामण्णागाइं सयमेव पविट्ठित्ता २ चारं चरइ, कयराइं खलु ताइं दुवे तेरसगाइं जाइं चंदे केणइ असामण्णागाइं सयमेव पविट्ठित्ता २ चारं चरइ ? इमाइं खलु ताइं दुवे तेरसगाइं जाइं चंदे केणइ असामण्णागाइं सयमेव पविट्ठित्ता २ चारं चरइ तं०-सव्व-

भंतरे चेव मंडले सव्ववाहिरे चेव मंडले, एयाइं खलु ताइं दुवे तेरसगाइं जाइं चंदे केणइ जाव चारं चरइ, एतावता दोच्चे चंदायणे समत्ते भवइ, ता णक्खत्ते मासे णो चंदे मासे चंदे मासे णो णक्खत्ते मासे, ता णक्खत्ते मासे चंदेणं मासेणं किं अहियं चरइ ? ता दो अद्धमंडलाइं चरइ अद्ध य सत्तट्ठिभागाइं अद्धमंडलस्स सत्तट्ठिभागं च एकतीसहा छेत्ता अट्टारस भागाइं, ता तच्चायणगए चंदे पच्चत्थिमाए भागाए पविसमाणे बाहिराणंतरस्स पच्चत्थिमिल्लस्स अद्धमंडलस्स ईयालीसं सत्तट्ठिभागाइं जाइं चंदे अप्पणो परस्स य चिण्णं पडिचरइ, तेरस सत्तट्ठिभागाइं जाइं चंदे परस्स चिण्णं पडिचरइ, तेरस सत्तट्ठिभागाइं चंदे अप्पणो परस्स चिण्णं पडिचरइ, एतावता बाहिराणंतरे पच्चत्थिमिल्ले अद्धमंडले समत्ते भवइ, ता तच्चायणगए चंदे पुरत्थिमाए भागाए पविसमाणे बाहिरत्तस्स पुरत्थिमिल्लस्स अद्धमंडलस्स ईयालीसं सत्तट्ठिभागाइं जाइं चंदे अप्पणो परस्स य चिण्णं पडिचरइ, तेरस सत्तट्ठिभागाइं जाइं चंदे परस्स चिण्णं पडिचरइ, तेरस सत्तट्ठिभागाइं जाइं चंदे अप्पणो परस्स चिण्णं पडिचरइ, एतावता बाहिरत्तच्चे पुरत्थिमिल्ले अद्धमंडले समत्ते भवइ, ता तच्चायणगए चंदे पच्चत्थिमाए भागाए पविसमाणे बाहिरत्तत्थस्स पच्चत्थिमिल्लस्स अद्धमंडलस्स अद्धसत्तट्ठिभागाइं च एकतीसहा छेत्ता अट्टारस भागाइं, जाइं चंदे अप्पणो परस्स य चिण्णं पडिचरइ, एतावता बाहिरत्तत्थपच्चत्थिमिल्ले अद्धमंडले समत्ते भवइ । एवं खलु चंदेणं मासेणं चंदे तेरस चउप्पणगाइं दुवे तेरसगाइं जाइं चंदे परस्स चिण्णं पडिचरइ, तेरस तेरसगाइं जाइं चंदे अप्पणो चिण्णं पडिचरइ, दुवे ईयालीसगाइं अद्ध सत्तट्ठिभागाइं सत्तट्ठिभागं च एकतीसहा छेत्ता अट्टारसभागाइं जाइं चंदे अप्पणो परस्स य चिण्णं पडिचरइ, अवराइं खलु दुवे तेरसगाइं जाइं चंदे केणइ असामणगाइं सयमेव पविट्ठित्ता २ चारं चरइ, इच्चेसो चंदमासोऽभिगमणणक्खमणवुट्ठिणिवुट्ठिअणवट्ठियसंठाणसंठिईविउव्वणगिट्ठिपत्ते रूवी चंदे देवे २ आहिएति वएजा ॥ ७९ ॥ तेरसमं पाहुडं समत्तं ॥१३॥

चोइसमं पाहुडं

ता कया ते दोसिणा बहू आहितेति वएजा ? ता दोसिणापक्खे णं दोसिणा बहू आहितेति वएजा, ता कइं ते दोसिणापक्खे दोसिणा बहू आहितेति वएजा ? ता अंधयारपक्खाओ णं० दोसिणा बहू आहिताति वएजा, ता कइं ते अंधयारपक्खाओ

दोसिणापक्खे दोसिणा बहू आहिताति वएजा ? ता अंधयारपक्खाओ णं दोसिणा-
पक्खं अयमाणे चंदे चत्तारि बायाले मुहुत्तसए छत्तालीसं च बावट्टिभागे मुहुत्तस्स
जाइं चंदे विरज्जइ, तं०-पटमाए पटमं भागं विइयाए विइयं भागं जाव पण्णरसीए
पण्णरसमं भागं, एवं खलु अंधयारपक्खाओ दोसिणापक्खे दोसिणा बहू आहिताति
वएजा, ता केवइया णं दोसिणापक्खे दोसिणा बहू आहिताति वएजा ? ता परित्ता
असंखेजा भागा । ता कया ते अंधयारे बहू आहिएति वएजा ? ता अंधयारपक्खे
णं अंधयारे बहू आहिएति वएजा, ता कहां ते अंधयारपक्खे० बहू आहिएति
वएजा ? तां दोसिणापक्खाओ णं अंधयारपक्खे अंधयारे बहू आहिएति वएजा,
ता कहां ते दोसिणापक्खाओ अंधयारपक्खे अंधयारे बहू आहिएति वएजा ? ता
दोसिणापक्खाओ णं अंधयारपक्खं अयमाणे चंदे चत्तारि बायाले मुहुत्तसए बायालीसं
च बावट्टिभागे मुहुत्तस्स जाइं चंदे रज्जइ, तं०-पटमाए पटमं भागं विइयाए विइयं
भागं जाव पण्णरसीए पण्णरसमं भागं, एवं खलु दोसिणापक्खाओ अंधयारपक्खे
अंधयारे बहू आहिएति वएजा, ता केवइए णं अंधयारपक्खे अंधयारे बहू आहिएति
वएजा ? ता परित्ता असंखेजा भागा ॥८०॥ **चोद्दसमं पाहुडं समत्तं ॥ १४ ॥**

पण्णरसमं पाहुडं

ता कहां ते सिग्घगई वत्थू आहितेति वएजा ? ता एएसि णं चंदिमसूरियगह-
गणणक्खत्ततारारूवाणं चंदेहिंतो सूरा सिग्घगई सूरेहिंतो गहा सिग्घगई गहोहिंतो
णक्खत्ता सिग्घगई णक्खत्तेहिंतो तारा० सिग्घगई, सव्वप्पगई चंदा सव्वसिग्घगई
तारा०, ता एगमेगेणं मुहुत्तेणं चंदे केवइयाइं भागसयाइं गच्छइ ? ता जं जं मंडलं
उवसंकमित्ता चारं चरइ तस्स २ मंडलपरिक्खेवस्स सत्तरस अडसट्ठि भागसए
गच्छइ मंडलं सयसहस्सेणं अट्ठाणउईसएहिं छेत्ता, ता एगमेगेणं मुहुत्तेणं सूरिए
केवइयाइं भागसयाइं गच्छइ ? ता जं जं मंडलं उवसंकमित्ता चारं चरइ तस्स २ मंडल-
परिक्खेवस्स अट्ठारस तीसे भागसए गच्छइ मंडलं सयसहस्सेणं अट्ठाणउईसएहिं छेत्ता,
ता एगमेगेणं मुहुत्तेणं णक्खत्ते केवइयाइं भागसयाइं गच्छइ ? ता जं जं मंडलं उव-
संकमित्ता चारं चरइ तस्स २ मंडलपरिक्खेवस्स अट्ठारस पण्णतीसे भागसए गच्छइ
मंडलं सयसहस्सेणं अट्ठाणउईसएहिं छेत्ता ॥८१॥ ता जया णं चंदं गइसमावण्णं सूरे
गइसमावण्णे भवइ से णं गइमायाए केवइयं विसेसेइ ? ता बावट्टिभागे विसेसेइ, ता
जया णं चंदं गइसमावण्णं णक्खत्ते गइसमावण्णे भवइ से णं गइमायाए केवइयं

विसेसेइ ? ता सत्तट्ठिभागे विसेसेइ, ता जया णं सूरं गइसमावण्णं णक्खत्ते गइ-
समावण्णे भवइ से णं गइमायाए केवइयं विसेसेइ ? ता पंचभागे विसेसेइ, ता जया
णं चंदं गइसमावण्णं अभीईणक्खत्ते गइसमावण्णे पुरत्थिमाए भागाए समासादेइ
पुरत्थिमाए भागाए समासादित्ता णव मुहुत्ते सत्तावीसं च सत्तट्ठिभागे मुहुत्तस्स
चंदेण सद्धिं जोयं जोएइ जोयं जोएत्ता जोयं अणुपरियट्ठइ जोयं अणुपरियट्ठित्ता विप्प-
जहइ २ ता विगयजोई यावि भवइ, ता जया णं चंदं गइसमावण्णं सवणे णक्खत्ते
गइसमावण्णे पुरत्थिमाए भागाए समासादेइ पुरत्थिमाए भागाए समासादेत्ता तीसं
मुहुत्ते चंदेण सद्धिं जोयं जोएइ २ ता जोयं अणुपरियट्ठइ जो० २ ता विप्पजहइ०
विगयजोई यावि भवइ, एवं एएणं अभिलावेणं णेयत्वं, पण्णरसमुहुत्ताइं तीसइमुहुत्ताइं
पणयालीसमुहुत्ताइं भाणियव्वाइं जाव उत्तरासादा० । ता जया णं चंदं गइसमावण्णं
गहे गइसमावण्णे पुरत्थिमाए भागाए समासादेइ पुर० २ ता चंदेणं सद्धिं जोगं
जुंजइ २ ता जोगं अणुपरियट्ठइ २ ता विप्पजहइ० विगयजोई यावि भवइ । ता जया
णं सूरं गइसमावण्णं अभीईणक्खत्ते गइसमावण्णे पुरत्थिमाए भागाए समासादेइ
पुर० २ ता चत्तारि अहोरत्ते छच्च मुहुत्ते सूरेण सद्धिं जोयं जोएइ २ ता जोयं अणु-
परियट्ठइ २ ता विप्पजहइ० २ ता विगयजोई यावि भवइ, एवं अहोरत्ता छ एक्कर्व,सं
मुहुत्ता य तेरस अहोरत्ता बारस मुहुत्ता य वीसं अहोरत्ता तिण्णि मुहुत्ता य सव्वे
भाणियव्वा जाव जया णं सूरं गइसमावण्णं उत्तरासादाणक्खत्ते गइसमावण्णे पुरत्थि-
माए भागाए समासादेइ पुर० २ ता वीसं अहोरत्ते तिण्णि य मुहुत्ते सूरेण सद्धिं जोयं
जोएइ जोयं जोएत्ता जोयं अणुपरियट्ठइ जो० जोएइ २ ता विप्पजहइ २ ता विगयजोई
यावि भवइ, ता जया णं सूरं गइसमावण्णं णक्खत्ते गइसमावण्णे पुरत्थिमाए भागाए
समासादेइ पु० २ ता सूरेण सद्धिं जोयं जुंजइ २ ता जोयं अणुपरियट्ठइ २ ता जाव
विगयजोई यावि भवइ ॥ ८२ ॥ ता णक्खत्तेणं मासेणं चंदे कइ मंडलाइं चरइ ?
ता तेरस मंडलाइं चरइ तेरस य सत्तट्ठिभागे मंडलस्स, ता णक्खत्तेणं मासेणं सूरे
कइ मंडलाइं चरइ ? ता तेरस मंडलाइं चरइ चोत्तालीसं च सत्तट्ठिभागे मंडलस्स,
ता णक्खत्तेणं मासेणं णक्खत्ते कइ मंडलाइं चरइ ? ता तेरस मंडलाइं चरइ अद्ध-
सीयालीसं च सत्तट्ठिभागे मंडलस्स, ता चंदेणं मासेणं चंदे कइ मंडलाइं चरइ ? ता
चोइस चउभागाइं मंडलाइं चरइ एणं च चउव्वीससयभागं मंडलस्स, ता चंदेणं
मासेणं सूरे कइ मंडलाइं चरइ ? ता पण्णरस चउभागूणाइं मंडलाइं चरइ एणं च

चउवीससयभागं मंडलस्स, ता चंदेणं मासेणं णक्खत्ते कइ मंडलाइं चरइ ? ता पण्ण-
रस चउभागूणाइं मंडलाइं चरइ छच्च चउवीससयभागे मंडलस्स, ता उडुणा मासेणं
चंदे कइ मंडलाइं चरइ ? ता चोदस मंडलाइं चरइ तीसं च एगट्ठिभागे मंडलस्स,
ता उडुणा मासेणं सूरे कइ मंडलाइं चरइ ? ता पण्णरस मंडलाइं चरइ, ता उडुणा
मासेणं णक्खत्ते कइ मंडलाइं चरइ ? ता पण्णरस मंडलाइं चरइ पंच य वावीससय-
भागे मंडलस्स, ता आइच्चेणं मासेणं चंदे कइ मंडलाइं चरइ ? ता चोदस मंडलाइं
चरइ एक्कारसभागे मंडलस्स, ता आइच्चेणं मासेणं सूरे कइ मंडलाइं चरइ ? ता
पण्णरस चउभागाहियाइं मंडलाइं चरइ, ता आइच्चेणं मासेणं णक्खत्ते कइ मंड-
लाइं चरइ ? ता पण्णरस चउभागाहियाइं मंडलाइं चरइ पंचत्तंसं च चउवीस-
सयभागमंडलाइं चरइ, ता अभिवट्ठिएणं मासेणं चंदे कइ मंडलाइं चरइ ? ता पण्ण-
रस मंडलाइं० तेसीइं छलसीयसयभागे मंडलस्स, ता अभिवट्ठिएणं मासेणं सूरे कइ
मंडलाइं चरइ ? ता सोलस मंडलाइं चरइ तिहिं भागेहिं ऊणगाइं दोहिं अडयालेहिं
सएहिं मंडलं छेत्ता, ता अभिवट्ठिएणं मासेणं णक्खत्ते कइ मंडलाइं चरइ ? ता
सोलस मंडलाइं चरइ सीयालीसएहिं भागेहिं अहियाइं चोदसहिं अट्ठासीएहिं मंडलं
छेत्ता ॥८३॥ ता एगमेगेणं अहोरत्तेणं चंदे कइ मंडलाइं चरइ ? ता एगं अद्ध-
मंडलं चरइ एक्कीसाए भागेहिं ऊणं णवाहिं पण्णरसेहिं अद्धमंडलं छेत्ता, ता एगमेगेणं
अहोरत्तेणं सूरिए कइ मंडलाइं चरइ ? ता एगं अद्धमंडलं चरइ, ता एगमेगेणं अहो-
रत्तेणं णक्खत्ते कइ मंडलाइं चरइ ? ता एगं अद्धमंडलं चरइ दोहिं भागेहिं अहियं
सत्तहिं वत्तीसेहिं सएहिं अद्धमंडलं छेत्ता, ता एगमेगं मंडलं चंदे कइहिं अहोरत्तेहिं
चरइ ? दोहिं अहोरत्तेहिं चरइ एक्कीसाए भागेहिं अहिएहिं चउहिं चोयालेहिं
सएहिं राइंदिएहिं छेत्ता, ता एगमेगं मंडलं सूरे कइहिं अहोरत्तेहिं चरइ ? ता दोहिं
अहोरत्तेहिं चरइ, ता एगमेगं मंडलं णक्खत्ते कइहिं अहोरत्तेहिं चरइ ? ता दोहिं
अहोरत्तेहिं चरइ दोहिं ऊणेहिं तिहिं सत्तसट्ठेहिं सएहिं राइंदिएहिं छेत्ता, ता जुगेणं
चंदे कइ मंडलाइं चरइ ? ता अट्ठ चुलसीए मंडलसए चरइ, ता जुगेणं सूरे कइ
मंडलाइं चरइ ? ता णवपण्णरसमंडलसए चरइ, ता जुगेणं णक्खत्ते कइ मंडलाइं
चरइ ? ता अट्ठारस पण्णतीसे दुभागमंडलसए चरइ । इच्चेसा मुहुत्तगई रिक्खाइमा-
सराइंदियजुगमंडलपविभत्ता सिग्घगई वत्थू आहितेति (वएज्जा) वेमि ॥८४॥ पण्ण-
रसमं पाहुडं समत्तं ॥१५॥

चन्द्रप्रज्ञप्ति सूत्र

ता कहं ते दोसिणाल्क्खणे आहिएति वएज्जा ? ता चंदलेसाइ य दोसिणाइ य दोसिणाइ य चंदलेसाइ य के अट्ठे किं ल्क्खणे ?, ता एगट्ठे एगलक्खणे, ता कहं ते सूरलक्खणे आहिएति वएज्जा ? ता सूरलेस्साइ य आयवेइ य आयवेइ य सूरलेस्साइ य के अट्ठे किं ल्क्खणे ? ता एगट्ठे एगलक्खणे, ता कहं ते छायालक्खणे आहिएति वएज्जा ? ता अंधयारेइ य छायाइ य छायाइ य अंधयारेइ य के अट्ठे किं ल्क्खणे ? ता एगट्ठे एगलक्खणे ॥८५॥ सोलसमं पाहुडं समत्तं ॥१६॥

सत्तरसमं पाहुडं

ता कहं ते चयणोववाया आहितेति वएज्जा ? तत्थ खलु इमाओ पणवीसं पडिवत्तीओ पणत्ताओ, तं०—तत्थ एगे एवमाहंसु—ता अणुसमयमेव चंदिमसूरिया अण्णे चयंति अण्णे उववज्जंति० एगे एवमाहंसु १, एगे पुण एवमाहंसु—ता अणुमुहुत्तमेव चंदिमसूरिया अण्णे चयंति अण्णे उववज्जंति००२, एवं जहेव हेट्ठा तहेव जाव ता एगे पुण एवमाहंसु—ता अणुउस्सप्पिणिओसप्पिणिमेव चंदिमसूरिया अण्णे चयंति अण्णे उववज्जंति० एगे एवमाहंसु २५, वयं पुण एवं वयामो—ता चंदिमसूरिया णं जोइसिया देवा महिद्धिया महज्जुइया महाबला महाजसा महासोक्खा महाणुभावा क्खवत्थधरा वरमल्लधरा वरगंधधरा वराभरणधरा अवोच्छित्तिणयट्ठयाए काले अण्णे चयंति अण्णे उववज्जंति० ॥८६॥ सत्तरसमं पाहुडं समत्तं ॥१७॥

अट्ठारसमं पाहुडं

ता कहं ते उच्चत्ते आहितेति वएज्जा ? तत्थ खलु इमाओ पणवीसं पडिवत्तीओ प०, तं०—तत्थेगे एवमाहंसु—ता एगं जोयणसहस्सं सूरं उहं उच्चत्तेणं दिवहं चंदे एगे एवमाहंसु १, एगे पुण एवमाहंसु—ता दो जोयणसहस्साइं सूरं उहं उच्चत्तेणं अट्ठाइजाइं चंदे एगे एवमाहंसु २, एगे पुण एवमाहंसु—ता तिण्णिण जोयणसहस्साइं सूरं उहं उच्चत्तेणं अद्धुट्ठाइं चंदे एगे एवमाहंसु ३, एगे पुण एवमाहंसु—ता चत्तारि जोयणसहस्साइं सूरं उहं उच्चत्तेणं अद्धपंचमाइं चंदे एगे एवमाहंसु ४, एगे पुण एवमाहंसु—ता पंच जोयणसहस्साइं सूरं उहं उच्चत्तेणं अद्धट्ठट्ठाइं चंदे एगे एवमाहंसु ५, एगे पुण एवमाहंसु—ता छ जोयणसहस्साइं सूरं उहं उच्चत्तेणं अद्धसत्तमाइं चंदे एगे एवमाहंसु ६, एगे पुण एवमाहंसु—ता सत्त जोयणसहस्साइं सूरं उहं उच्चत्तेणं अद्धट्ठमाइं

चंदे एगे एवमाहंसु ७, एगे पुण एवमाहंसु—ता अट्ट जोयणसहस्साइं सूरे उट्ठं उच्चत्तेणं
 अट्टणवमाइं चंदे एगे एवमाहंसु ८, एगे पुण एवमाहंसु—ताणवजोयणसहस्साइं सूरे उट्ठं
 उच्चत्तेणं अट्टदसमाइं चंदे एगे एवमाहंसु ९, एगे पुण एवमाहंसु—ता दस जोयणसहस्साइं
 सूरे उट्ठं उच्चत्तेणं अट्टएक्कारस चंदे एगे एवमाहंसु १०, एगे पुण एवमाहंसु—ता एक्कारस
 जोयणसहस्साइं सूरे उट्ठं उच्चत्तेणं अट्टवारस चंदे ११, एएणं अभिलावेणं णेयत्वं
 वारस सूरे अट्टतेरस चंदे १२, तेरस सूरे अट्टचोदस चंदे १३, चोदस सूरे अट्टपण्णरस
 चंदे १४, पण्णरस सूरे अट्टसोलस चंदे १५, सोलस सूरे अट्टसत्तरस चंदे १६,
 सत्तरस सूरे अट्टअट्टारस चंदे १७, अट्टारस सूरे अट्टएगूणवीसं चंदे १८, एगूण-
 वीसं सूरे अट्टवीसं चंदे १९, वीसं सूरे अट्टएक्कवीसं चंदे २०, एक्कवीसं सूरे अट्ट-
 बावीसं चंदे २१, बावीसं सूरे अट्टतेवीसं चंदे २२, तेवीसं सूरे अट्टचउवीसं चंदे
 २३, चउवीसं सूरे अट्टपणवीसं चंदे एगे एवमाहंसु २४, एगे पुण एवमाहंसु—ता
 पणवीसं जोयणसहस्साइं सूरे उट्ठं उच्चत्तेणं अट्टछवीसं चंदे एगे एवमाहंसु २५ ।
 वयं पुण एवं वयामो—ता इमीसे रयणप्यमाए पुटवीए बहुसमरमणिजाओ भूमिभागाओ
 सत्तणउइजोयणसए उट्ठं उप्पइत्ता हेट्ठिले ताराविमाणे चारं चरइ अट्टजोयणसए उट्ठं
 उप्पइत्ता सूरविमाणे चारं चरइ अट्टअसीए जोयणसए उट्ठं उप्पइत्ता चंदविमाणे
 चारं चरइ णव जोयणसयाइं उट्ठं उप्पइत्ता उवारिं ताराविमाणे चारं चरइ, हेट्ठि-
 ल्लाओ ताराविमाणाओ दसजोयणाइं उट्ठं उप्पइत्ता सूरविमाणे चारं चरइ णउइं जोय-
 णाइं उट्ठं उप्पइत्ता चंदविमाणे चारं चरइ दसोत्तरं जोयणसयं उट्ठं उप्पइत्ता उव-
 रिल्ले तारारूवे चारं चरइ, सूरविमाणाओ असीइं जोयणाइं उट्ठं उप्पइत्ता चंद-
 विमाणे चारं चरइ जोयणसयं उट्ठं उप्पइत्ता उवरिल्ले तारारूवे चारं चरइ, चंद-
 विमाणाओ णं वीसं जोयणाइं उट्ठं उप्पइत्ता उवरिल्ले तारारूवे चारं चरइ, एवामेव
 सपुव्वावरेणं दसुत्तरजोयणसयं बाहल्ले तिरियमसंखेज्जे जोइसविसए जोइसं चारं
 चरइ आहितेति वएजा ॥८७॥ ता अत्थि णं चंदिमसूरियाणं देवाणं हिट्ठं पि तारा-
 रूवा अणुं पि तुल्लावि समं पि तारारूवा अणुं पि तुल्लावि उप्पि पि तारारूवा अणुं पि
 तुल्लावि ? ता अत्थि, ता कइं ते चंदिमसूरियाणं देवाणं हिट्ठं पि तारारूवा अणुं पि
 तुल्लावि समं पि तारारूवा अणुं पि तुल्लावि उप्पि पि तारारूवा अणुं पि तुल्लावि ? ता
 जहा जहा णं तेसि णं देवाणं तवणियमवं भचेराइं उस्सियाइं भवंति तहा तहा णं तेसि
 देवाणं एवं भवइ, तंजहा—अणुत्ते वा तुल्लत्ते वा, ता एवं खलु चंदिमसूरियाणं देवाणं

हिङ्गिपि तारारूवा अणुपि तुल्लावि तहेव जाव उर्धिपि तारारूवा अणुपि तुल्लावि॥८८॥
 ता एगमेगस्स णं चंदस्स देवस्स केवइया गहा परिवारो प०, केवइया णवखत्ता परि-
 वारो पण्णत्तो, केवइया तारा परिवारो पण्णत्तो ? ता एगमेगस्स णं चंदस्स देवस्स
 अट्ठासीइगहा परिवारो पण्णत्तो, अट्ठावीसं णवखत्ता परिवारो पण्णत्तो, छावट्ठि-
 सहस्साइं णव चेव सयाइं पंचुत्तराइं (पंचसयराइं) एगससीपरिवारो तारागण-
 कोडिकोडीणं ॥१॥ परिवारो प० ॥८९॥ ता मंदरस्स णं पव्वयस्स केवइयं अवाहाए
 जोइसे चारं चरइ ? ता एक्कारस एक्कीसे जोयणसए अवाहाए जोइसे चारं चरइ,
 ता लोयंताओ णं केवइयं अवाहाए जोइसे प० ? ता एक्कारस एक्कारे जोयणसए
 अवाहाए जोइसे प० ॥ ९० ॥ ता जंबुद्धीवे णं दीवे कयरे णवखत्ते सव्वब्भंतरिल्लं
 चारं चरइ, कयरे णवखत्ते सव्वबाहिरिल्लं चारं चरइ, कयरे णवखत्ते सव्वघरिल्लं
 चारं चरइ, कयरे णवखत्ते सव्वहिट्ठिल्लं चारं चरइ ? ता अमीई णवखत्ते सव्व-
 ण्भितरिल्लं चारं चरइ, मूले णवखत्ते सव्वबाहिरिल्लं चारं चरइ, साई णवखत्ते सव्वु-
 वरिल्लं चारं चरइ, भरणी णवखत्ते सव्वहेट्ठिल्लं चारं चरइ ॥९१॥ ता चंदविमाणे
 णं किंसंठिए प० ? ता अद्धकविट्ठगसंठाणसंठिए सव्वफाल्लियामए अब्भुग्गवसूसिय-
 पहसिए विविहमणिरयणभत्तिचित्ते जाव पडिरूवे एवं सूरविमाणे गहविमाणे णवखत्त-
 विमाणे ताराविमाणे । ता चंदविमाणे णं केवइयं आयामविकखंभेणं केवइयं परि-
 कखेवेणं केवइयं बाहल्ले प० ? ता एगट्ठिभागे जोयणस्स आयामविकखंभेणं
 तं तिगुणं सविसेसं परिरएणं अट्ठावीसं एगट्ठिभागे जोयणस्स बाहल्लेणं पण्णत्ते, ता
 सूरविमाणे णं केवइयं आयामविकखंभेणं पुच्छ, ता अडयलीसं एगट्ठिभागे जोय-
 णस्स आयामविकखंभेणं तं तिगुणं सविसेसं परिरएणं चउत्वीसं एगट्ठिभागे जोयणस्स
 बाहल्लेणं प०, ता णवखत्तविमाणे णं केवइयं पुच्छ, ता कोसं आयामविकखंभेणं तं
 तिगुणं सविसेसं परिरएणं अद्धकोसं बाहल्लेणं प०, ता ताराविमाणे णं केवइयं पुच्छ,
 ता अद्धकोसं आयामविकखंभेणं तं तिगुणं सविसेसं परिरएणं पंचधणुसयाइं बाहल्लेणं
 प० । ता चंदविमाणं णं कइ देवसाहस्सीओ परिवहंति ? ता सोल्लस देवसाहस्सीओ
 परिवहंति, तं०—पुरत्थिमेणं सीहरूवधारीणं चत्तारि देवसाहस्सीओ परिवहंति, दाहि-
 णेणं गयरूवधारीणं चत्तारि देवसाहस्सीओ परिवहंति, पच्चत्थिमेणं बसहरूवधारीणं
 चत्तारि देवसाहस्सीओ परिवहंति, उत्तरेणं तुरगरूवधारीणं चत्तारि देवसाहस्सीओ
 परिवहंति, एवं सूरविमाणंपि, ता गहविमाणे णं कइ देवसाहस्सीओ परिवहंति ? ता

अद्द देवसाहस्सीओ परिवहंति, तं०—पुरत्थिमेणं सीहरूवधारीणं देवाणं दो देवसाहस्सीओ परिवहंति, एवं जाव उत्तरेणं तुरगरूवधारीणं०, ता णक्खत्तविमाणे णं कइ देवसाहस्सीओ परिवहंति ? ता चत्तारि देवसाहस्सीओ परिवहंति, तं०—पुरत्थिमेणं सीहरूवधारीणं देवाणं एक्का देवसाहस्सी परिवहइ, एवं जाव उत्तरेणं तुरगरूवधारीणं देवाणं०, ता ताराविमाणे णं कइ देवसाहस्सीओ परिवहंति ? ता दो देवसाहस्सीओ परिवहंति, तं०—पुरत्थिमेणं सीहरूवधारीणं देवाणं पंच देवसया परिवहंति, एवं जावत्तरेणं तुरगरूवधारीणं० ॥९२॥ ता एएसि णं चंदिमसूरियगहगणणक्खत्ततारा-रूवाणं कयरे २ हितो सिग्घगई वा मंदगई वा ? ता चंदेहितो सूरा सिग्घगई, सूरैहितो गहा सिग्घगई, गहेहितो णक्खत्ता सिग्घगई, णक्खत्तेहितो तारा० सिग्घगई, सव्वप्पगई चंदा, सव्वसिग्घगई तारा० । ता एएसि णं चंदिमसूरियगहगण-णक्खत्ततारारूवाणं कयरे २ हितो अण्णिद्धिया वा महिद्धिया वा ? ता तारा० हितो णक्खत्ता महिद्धिया, णक्खत्तेहितो गहा महिद्धिया, गहेहितो सूरा महिद्धिया, सूरै-हितो चंदा महिद्धिया, सव्वप्पद्धिया तारा०, सव्वमहिद्धिया चंदा ॥ ९३ ॥ ता जंबुदीवे णं दीवे तारारूवस्स य २ एस णं केवइए अवाहाए अंतरे पण्णत्ते ? ता दुविहे अंतरे प०, तं०—वाघाइमे य णिब्बाघाइमे य, तत्थ णं जे से वाघाइमे से णं जहण्णेणं दोण्णि बावट्ठे जोयणसए उक्कोसेणं बारस जोयणसहस्साइं दोण्णि बायाले जोयणसए तारारूवस्स य २ अवाहाए अंतरे पण्णत्ते, तत्थ णं जे से णिब्बाघाइमे से णं जहण्णेणं पंच धणुसयाइं उक्कोसेणं अद्दजोयणं तारारूवस्स य २ अवाहाए अंतरे प० ॥९४॥ ता चंदस्स णं जोइसिंदस्स जोइसरण्णो कइ अग्गमहिसीओ पण्णत्ताओ ? ता चत्तारि अग्गमहिसीओ पण्णत्ताओ, तं०—चंदप्पभा दोसिणाभा अच्चि-माली पभंकरा, तत्थ णं एगमेगाए देवीए चत्तारि देवीसाहस्सी परिवारो पण्णत्तो, पभू णं ताओ एगमेगा देवी अण्णाइं चत्तारि २ देवीसहस्साइं परिवारं विउत्वित्ताए, एवामेव सपुब्बावरेणं सोलस देवीसहस्सा, सेत्तं तुडिए, ता पभू णं चंदे जोइसिंदे जोइसराया चंदवडिंसए विमाणे सभाए सुहम्माए तुडिएणं रुद्धिं दिव्वाइं भोगभोगाइं भुंजमाणे विहरित्तए ? णो इणट्ठे समट्ठे, पभू णं चंदे जोइसिंदे जोइसराया चंदवडिं-सए विमाणे सभाए सुहम्माए चंदंसि सीहासणंसि चउहिं सामाणियसाहस्सीहिं चउहिं अग्गमहिसीहिं सपरिवाराहिं तिहिं परिसाहिं सत्तहिं अणिएहिं सत्तहिं अणिया-हिवईहिं सोलसहिं आयरक्खदेवसाहस्सीहिं अण्णेहिं य ब्रह्महिं जोइसिएहिं देवेहिं देवीहिं य सद्धिं महया ह्यणट्ठगीयवाइयतंतीतलतालतुडियधणमुहंगपडुप्पवाइयरवेणं

दिग्वाहं भोगभोगाहं भुञ्जमाणे विहरित्ते केवलं परियारणिहीए णो चेव णं मेहुण-
वत्तियाए । ता सूरस्स णं जोइसिंदस्स जोइसरणो कइ अग्गमहिसीओ प० ? ता
चत्तारि अग्गमहिसीओ प०, तंजहा—सूरप्पभा आयवा अच्चिमाला पक्कंकरा, सेसं
जहा चंदस्स णवरं सूखडेंसए विमाणे जाव णो चेव णं मेहुणवत्तियाए ॥९५॥ ता
जोइसियाणं देवाणं केवइयं कालं ठिई पणत्ता ? ता जहण्णेणं अट्ठभागपलिओवमं
उक्कोसेणं पलिओवमं वाससयसहस्समम्भहियं, ता जोइसियाणं देवीणं केवइयं कालं
ठिई प० ? ता जहण्णेणं अट्ठभागपलिओवमं उक्कोसेणं अट्ठपलिओवमं पण्णासाए
वाससहस्सेहिं अम्भहियं, ता चंदविमाणे णं देवाणं केवइयं कालं ठिई पणत्ता ? ता
जहण्णेणं चउत्तभागपलिओवमं उक्कोसेणं पलिओवमं वाससयसहस्समम्भहियं, ता
चंदविमाणे णं देवीणं केवइयं कालं ठिई प० ? ता जहण्णेणं चउत्तभागपलिओवमं
उक्कोसेणं अट्ठपलिओवमं पण्णासाए वाससहस्सेहिं अम्भहियं, ता सूरविमाणे णं
देवाणं केवइयं कालं ठिई पणत्ता ? ता जहण्णेणं चउत्तभागपलिओवमं उक्कोसेणं
पलिओवमं वाससहस्समम्भहियं, ता सूरविमाणे णं देवीणं केवइयं कालं ठिई प० ?
ता जहण्णेणं चउत्तभागपलिओवमं उक्कोसेणं अट्ठपलिओवमं पंचहिं वाससएहिं
अम्भहियं, ता गहविमाणे णं देवाणं केवइयं कालं ठिई प० ? ता जहण्णेणं चउ-
त्तभागपलिओवमं उक्कोसेणं पलिओवमं, ता गहविमाणे णं देवीणं केवइयं कालं
ठिई प० ? ता जहण्णेणं चउत्तभागपलिओवमं उक्कोसेणं अट्ठपलिओवमं, ता
णक्खत्तविमाणे णं देवाणं केवइयं कालं ठिई प० ? ता जहण्णेणं चउत्तभागपलिओ-
वमं उक्कोसेणं अट्ठपलिओवमं, ता णक्खत्तविमाणे णं देवीणं केवइयं कालं ठिई
प० ? ता जहण्णेणं अट्ठभागपलिओवमं उक्कोसेणं चउत्तभागपलिओवमं, ता तारा-
विमाणे णं देवाणं पुच्छा, ता जहण्णेणं अट्ठभागपलिओवमं उक्कोसेणं चउत्तभाग-
पलिओवमं, ता ताराविमाणे णं देवीणं पुच्छा, ता जहण्णेणं अट्ठभागपलिओवमं
उक्कोसेणं साइरेगअट्ठभागपलिओवमं ॥ ९६ ॥ ता एएसिं णं चंदिमसूरियगहगण-
णक्खत्ततारारूवाणं कयरे २ हितो अप्पा वा बहुया वा तुल्ला वा विसेसाहिया वा ?
ता चंदा य सूरा य एए णं दो वि तुल्ला सव्वत्थोवा, णक्खत्ता संखिज्जगुणा, गहा
संखिज्जगुणा, तारा० संखिज्जगुणा ॥९७॥ अट्ठारसमं पाहुडं समत्तं ॥१८॥

ता कइ णं चंदिमसूरिया सव्वलोयं ओभासंति उज्जोएंति तवेति पभावेति आहि-
तेति वएजा ? तत्थ खलु इमाओ दुवाल्स पडिवत्तीओ, पणत्ताओ, तं०—तत्थेगे
एवमाहंसु—ता एगे चंदे एगे सूरै सव्वलोयं ओभासइ उज्जोएइ तवेइ पभासेइ० एगे
एवमाहंसु १, एगे पुण एवमाहंसु—ता तिण्णि चंदा तिण्णि सूरु सव्वलोयं ओभासेति
४००० एगे एवमाहंसु २, एगे पुण एवमाहंसु—ता आउट्टिं चंदा आउट्टिं सूरु सव्वलोयं
ओभासेति ४००० एगे एवमाहंसु ३, एगे पुण एवमाहंसु—एएणं अभिलावेणं णेयव्वं
सत्त चंदा सत्त सूरु दस चंदा दस सूरु बारस चंदा बारस सूरु बायालीसं चंदा
२ बावत्तरिं चंदा २ बायालीसं चंदसयं २ बावत्तरं चंदसयं बावत्तरं सूरसयं
बायालीसं चंदसहस्सं बायालीसं सूरसहस्सं बावत्तरं चंदसहस्सं बावत्तरं सूरसहस्सं
सव्वलोयं ओभासेति ४००० एगे एवमाहंसु १२, वयं पुण एवं वयामो—ता अयणं
जंबुद्दीवे २ जाव परिकखेवेणं, ता जंबुद्दीवे २ केवइया चंदा पभासेसु वा पभासेति
वा पभासेस्संति वा ? केवइया सूरु तविसु वा तवेति वा तविस्संति वा ? केवइया
णक्खत्ता जोयं जोइसु वा जोएंति वा जोइस्संति वा ? केवइया गहा चारं चरिसु
वा चरंति वा चरिस्संति वा ? केवइयाओ तारागणकोडिकोडीओ सोमं सोमैसु वा
सोमैति वा सोभिस्संति वा ? ता जंबुद्दीवे २ दो चंदा पभासेसु वा ३, दो सूरिया
तवइंसु वा ३, छय्यणं णक्खत्ता जोयं जोएंसु वा ३, छावत्तरि गहसयं चारं चरिसु
वा ३, एणं सयसहस्सं तेत्तीसं च सहस्सा णव य सया पण्णासा तारागणकोडि-
कोडीणं सोमं सोमैसु वा ३, “दो चंदा दो सूरु णक्खत्ता खलु हवंति छय्यणा ! छावत्तरं
गहसयं जंबुद्दीवे विचारीणं ॥ १ ॥ एणं च सयसहस्सं तेत्तीसं खलु भवे सहस्साइ ।
णव य सया पण्णासा तारागणकोडिकोडीणं ॥ २ ॥” ता जंबुद्दीवं णं दीवं ल्वणे
णामं समुद्दे वट्ठे वलयागारसंठाणसंठिए सव्वओ समंता संपरिन्निक्खत्ताणं चिट्ठइ, ता
ल्वणे णं समुद्दे किं समचक्खाल्संठिए विसमचक्खाल्संठिए ? ता ल्वणसमुद्दे
समचक्खाल्संठिए णो विसमचक्खाल्संठिए, ता ल्वणसमुद्दे केवइयं चक्खाल-
विकखंमेणं केवइयं परिकखेवेणं आहिएति वएजा ? ता दो जोयणसयसहस्साइं
चक्खालविकखंमेणं पण्णरस जोयणसयसहस्साइं एकासीयं च सहस्साइं सयं च
ल्वणं किंचिविसेसूणं परिकखेवेणं आहिएति वएजा, ता ल्वणसमुद्दे केवइयं चंदा
पभासेसु वा ३ ! एवं पुच्छा जाव केवइयाउ तारागणकोडिकोडीओ० सोमिसु वा ३!,
ता ल्वणे णं समुद्दे चत्तारि चंदा पभासेसु वा ३, चत्तारि सूरिया तवइंसु वा ३,

वारस णक्खत्तसयं जोयं जोएंसु वा ३, तिण्णि वावण्णा महग्गहसया चारं चरिसु
 वा ३, दो सयसहस्सा सत्तद्धिं च सहस्सा णव य सया तारागणकोडिकोडीणं० सोभिसु
 वा ३ । पण्णरस सयसहस्सा एक्कासीयं सयं च ऊयालं । किंचिविसेसेणूणो ल्वणो-
 दहिणो परिकखेवो ॥१॥ चत्तारि चैव चंदा चत्तारि य सूरिया ल्वणतोए । वारस
 णक्खत्तसयं गहाण तिण्णोव वावण्णा ॥२॥ दो चैव सयसहस्सा रुत्तद्धिं खलु भवे
 सहस्साइं । णव य सया ल्वणजले तारागणकोडिकोडीणं ॥ ३ ॥ ता ल्वणसमुद्दं०
 धायईसंडे णामं दीवे वट्ठे वलयागारसंटाणसंटिए तहेव जाव णो विसमचक्कवाल-
 संटिए, धायईसंडे ण दीवे केवइयं चक्कवालविकखंभेणं केवइयं परिकखेवेणं आहि-
 एति वएज्जा ? ता चत्तारि जोयणसयसहस्साइं चक्कवालविकखंभेणं ईयालीसं जोयण-
 सयसहस्साइं दस य सहस्साइं णव य एगट्ठे जोयणसए किंचिविसेसूणे परिकखेवेणं
 आहिएति वएज्जा, धायईसंडे० दीवे केवइया चंदा पभासेंसु वा ३ पुच्छा तहेव, ता
 धायईसंडे णं दीवे वारस चंदा पभासेंसु वा ३, वारस सूरिया तवेंसु वा ३, तिण्णि
 छत्तीसा णक्खत्तसया जोयं जोएंसु वा ३, एगं छप्पण्णं महग्गहसहस्सं चारं चरिसु
 वा ३, अट्ठेव सयसहस्सा तिण्णि सहस्साइं सत्त य सयाइं । एगससीपरिवारो तारागण-
 कोडिकोडीओ ॥ १ ॥ सोभं सोभेंसु वा ३—धायईसंडपरिरओ ईयाल दसुत्तरा सय-
 सहस्सा । णव सया य एगट्ठा किंचिविसेसपरिहीणा ॥ १ ॥ चउवीसं ससिरविणो
 णक्खत्तसयाय तिण्णि छत्तीसा । एगं च गहसहस्सं छप्पण्णं धायईसंडे ॥ २ ॥
 अट्ठेव सयसहस्सा तिण्णि सहस्साइं सत्त य सयाइं । धायईसंडे दीवे तारागणकोडि-
 कोडीणं ॥ ३ ॥ ता धायईसंडं णं दीवं कालोए णामं समुद्दे वट्ठे वलयागारसंटाण-
 संटिए जाव णो विसमचक्कवालसंटाणसंटिए, ता कालोए णं समुद्दे केवइयं चक्क-
 वालविकखंभेणं केवइयं परिकखेवेणं आहिएति वएज्जा ? ता कालोए णं समुद्दे अट्ठ
 जोयणसयसहस्साइं चक्कवालविकखंभेणं पण्णत्ते एक्काणउइं जोयणसयसहस्साइं सत्तरिं
 च सहस्साइं छच्च पंचुत्तरे जोयणसए किंचिविसेसाहिए परिकखेवेणं आहिएति वएज्जा,
 ता कालोए णं समुद्दे केवइया चंदा पभासेंसु वा ३ पुच्छा, ता कालोए समुद्दे
 बायालीसं चंदा पभासेंसु वा ३, बायालीसं सूरिया तवेंसु वा ३, एक्कारस वावत्तरा
 णक्खत्तसया जोयं जोइंसु वा ३, तिण्णि सहस्सा छच्च छण्णउया महग्गहसया चारं
 चरिसु वा ३, वारस सयसहस्साइं अट्ठावीसं च सहस्साइं णव य सयाइं पण्णासा
 तारागणकोडिकोडीओ सोभं सोभेंसु वा सोभंति वा सोभिस्संति वा, “ एक्काणउइं

सयराइं सहस्साइं परिरओ तस्स । अहियाइं छच्च पंचुत्तराइं कालोयहिवरस्स ॥ १ ॥
 बायालीसं चंदा बायालीसं च दिणयरा दित्ता । कालोयहिंमि एए चरंति संबद्धलेसागा
 ॥ २ ॥ णक्खत्तसहस्सं एगमेव छावत्तरं च सयमण्णं । छच्च सया छण्णउया मह-
 ग्गहा तिण्णिण य सहस्सा ॥ ३ ॥ अट्ठावीसं कालोयहिंमि बारस य सहस्साइं । णव
 य सया पण्णासा तारागणकोडिकोडीणं ॥ ४ ॥” ता कालोयं णं समुद्दं पुक्खरवरे
 णामं दीवे वट्टे वलयागारसंटाणसंठिए सव्वओ समंता संपरिक्खत्ताणं चिट्ठइ, ता
 पुक्खरवरे णं दीवे किं समचक्खवाल्लसंठिए विसमचक्खवाल्लसंठिए ? ता समचक्खवाल-
 लसंठिए णो विसमचक्खवाल्लसंठिए, ता पुक्खरवरे णं दीवे केवइयं समचक्खवाल्लविकखं-
 भेणं केवइयं परिकखेवेणं ? ता सोलस जोयणसयसहस्साइं चक्खवाल्लविकखंभेणं एगा
 जोयणकोडी बाणउइं च सयसहस्साइं अउणावण्णं च सहस्साइं अट्ठचउणउए
 जोयणसए परिकखेवेणं आहिएति वएजा, ता पुक्खरवरे णं दीवे केवइया चंदा
 पभासंसु वा ३ पुच्छा तहेव, ता चोयाल्लचंदसयं पभासंसु वा ३, चोत्तालं सूरियाणं
 सयं तवइंसु वा ३, चत्तारि सहस्साइं बत्तीसं च णक्खत्ता जोयं जोएंसु वा ३, बारस
 सहस्साइं छच्च बावत्तरा महग्गहसया चारं चरिसु वा ३, छण्णउइसयसहस्साइं
 चोयालीसं सहस्साइं चत्तारि य सयाइं तारागणकोडिकोडीणं सोमं सोभिसु वा ३,
 “कोडी बाणउइं खल्ल अउणाणउइं भवे सहस्साइं । अट्ठसया चउणउया य परिरओ
 पोक्खरवरस्स ॥१॥ चोत्तालं चंदसयं चत्तालं चेव सूरियाण सयं । पोक्खरवरदीवम्मि
 चरंति एए पभासंता ॥ २ ॥ चत्तारि सहस्साइं छत्तीसं चेव हुंति णक्खत्ता । छच्च
 सया बावत्तर महग्गहा बारह सहस्सा ॥ ३ ॥ छण्णउइ सयसहस्सा चोत्तालीसं खल्ल
 भवे सहस्साइं । चत्तारि य सया खल्ल तारागणकोडिकोडीणं ॥ ४ ॥” ता पुक्खर-
 वरस्स णं दीवस्स० बहुमज्झदेसभाए माणुसुत्तरे णामं पव्वए वलयागारसंटाणसंठिए
 जे णं पुक्खरवरं दीवं दुहा विभयमाणे २ चिट्ठइ, तंजहा—अब्भितरपुक्खरद्धं च
 बाहिरपुक्खरद्धं च, ता अब्भितरपुक्खरद्धे णं किं समचक्खवाल्लसंठिए विसमचक्खवाल-
 लसंठिए ? ता समचक्खवाल्लसंठिए णो विसमचक्खवाल्लसंठिए, ता अब्भितरपुक्खरद्धे
 णं केवइयं चक्खवाल्लविकखंभेणं केवइयं परिकखेवेणं आहिएति वएजा ? ता अट्ठ
 जोयणसयसहस्साइं चक्खवाल्लविकखंभेणं एक्का जोयणकोडी बायालीसं च सयसहस्साइं
 तीसं च सहस्साइं दो अउणापण्णे जोयणसए परिकखेवेणं आहिएति वएजा, ता
 अब्भितरपुक्खरद्धे णं केवइया चंदा पभासंसु वा ३ केवइया सूरा तविसु वा ३
 पुच्छा, ता बावत्तरिं चंदा पभासंसु वा ३, बावत्तरिं सूरिया तवइंसु वा ३, दोण्णि

सोला णवखत्तसहस्सा जोयं जोएसु वा ३, छ महग्गहसहस्सा तिण्णि य वत्तीसा चारं चरेसु वा ३, अडयालीससयसहस्सा बावीसं च सहस्सा दोण्णि य सया तारागणकोडिकोडीणं सोमं सोभिसु वा ३ । ता समयदखेत्ते णं केवइयं आयामविकखंभेणं केवइयं परिकखेवेणं आहिएति वएज्जा? ता पणयालीसं जोयणसयसहस्साइं आयामविकखंभेणं एगा जोयणकोडी बायालीसं च सयसहस्साइं दोण्णि य अउणापण्णे जोयणसए परिकखेवेणं आहिएति वएज्जा, ता समयदखेत्ते णं केवइया चंदा पभासेंसु वा ३ पुच्छा तहेव, ता वत्तीसं चंदसयं पभासेंसु वा ३, वत्तीसं सूरियाण सयं तवइंसु वा ३, तिण्णि सहस्सा छच्च छण्णउया णक्खत्तसया जोयं जोएसु वा ३, एक्कारस सहस्सा छच्च सोल्लस महग्गहसया चारं चरिसु वा ३, अट्ठासीइं सयसहस्साइं चत्तालीसं च सहस्सा सत्त य सया तारागणकोडिकोडीणं सोमं सोभिसु वा ३, अट्ठेव सयसहस्सा अग्गिंतरपुक्खरस्स विकखंभो । पणयाल्लसयसहस्सा माणुसखेत्तरस्स विकखंभो ॥१॥ कोडी बायालीसं सहस्स दुसया य अउणपणासा । माणुसखेत्तपरिरओ एमेव य पुक्खरद्धस्स ॥२॥ बावत्तरिं च चंदा बावत्तरिमेव दिणयरा दित्ता । पुक्खरवरदीवट्ठे चरंति एए पभासेंता ॥३॥ तिण्णि सया वत्तीसा छच्च सहस्सा महग्गहाणं तु । णक्खत्ताणं तु भवे सोलाइं दुवे सहस्साइं ॥४॥ अडयाल्लसयसहस्सा बावीसं खलु भवे सहस्साइं । दो य सय पुक्खरद्धे तारागणकोडिकोडीणं ॥५॥ वत्तीसं चंदसयं वत्तीसं चेव सूरियाण सयं । सयलं माणुसल्लोयं चरंति एए पभासेंता ॥६॥ एक्कारस य सहस्सा छच्चि य सोला महग्गहाणं तु । छच्च सया छण्णउया णक्खत्ता तिण्णि य सहस्सा ॥७॥ अट्ठासीइ चत्ताइं सयसहस्साइं मणुयल्लोयंमि । सत्त य सया अणूणा तारागणकोडिकोडीणं ॥८॥ एसो तारापिंडो सव्वसमासेण मणुयल्लोयंमि । वहिया पुण ताराओ जिणेहिं भणिया असंखेज्जा ॥ ९ ॥ एवइयं तारगं जं भणियं माणुसंमि लोयंमि । चारं कल्लुयापुप्फसंठियं जोइसं चरइ ॥ १० ॥ रविससिग्गहणदत्ता एवइया आहिया मणुयलोए । जेसिं णामागोत्तं ण पागया पण्णवेहिति ॥ ११ ॥ छावट्ठिं पिडगाइं चंदाइच्चाण मणुयल्लोयंमि । दो चंदा दो सूरा य हुंति एक्केक्केए पिडए ॥१२॥ छावट्ठिं पिडगाइं णक्खत्ताणं तु मणुयल्लोयंमि । छप्पणं णदत्ता हुंति एक्केक्केए पिडए ॥१३॥ छावट्ठिं पिडगाइं महग्गहाणं तु मणुयल्लोयंमि । छावत्तरं गहसयं होइ एक्केक्केए पिडए ॥ १४ ॥ चत्तारि य पंतीओ चंदाइच्चाण मणुयल्लोयंमि । छावट्ठिं २ च होइ एक्किककिया पंती ॥१५॥ छप्पणं पंतीओ णवदत्ताणं तु मणुयल्लोयंमि । छावट्ठिं २ हवंति एक्किककिया पंती ॥ १६ ॥ छावत्तरं गहाणं

पंतिसयं हवइ मणुयलोयंमि । छावट्टिं २ हवइ य एककेक्किया पंती ॥ १७ ॥ से
मेरुमणुचरंता पयाहिणावत्तमंडला सव्वे । अणवट्टियजोगेहिं चंदा सूरा गहगणा
य ॥ १८ ॥ णक्खत्ततारगाणं अवट्टिया मंडला मुणेयव्वा । तेवि य पयाहिणा-
वत्तमेव मेरुं अणुचरंति ॥ १९ ॥ रयणियरदिणयराणं उट्ठं च अहे व संक्रमो
णत्थि । मंडलसंक्रमणं पुण सद्धिमतरखाहिरं तिरिए ॥ २० ॥ रयणियरदिणयराणं
णक्खत्ताणं महग्गहाणं च । चारविसेसेण भवे सुहदुक्खविही मणुस्साणं ॥ २१ ॥
तेसिं पविसंताणं तावक्खेत्तं तु वट्ठए णिययं । तेणेव क्रमेण पुणो परिहायइ णिक्ख-
मंताणं ॥ २२ ॥ तेसिं कलंबुयापुप्फसंठिया हुंति तावक्खेत्तपहा । अंतो य संकुट्टा
वाहि वित्थडा चंदसूराणं ॥ २३ ॥ केणं वट्ठइ चंदो ? परिहाणी केण होइ चंदस्स ?
कालो वा जोण्हो वा केणऽणुभावेण चंदस्स ॥ २४ ॥ किण्हं राहुविमाणं णिच्चं चंदेण
होइ अविरहियं । चउरंगुलमसंपत्तं हिच्चा चंदस्स तं चरइ ॥ २५ ॥ वावट्टिं २ दिवसे २
उ सुक्कपक्खस्स । जं परिवट्ठइ चंदो खवेइ तं चेव कालेण ॥ २६ ॥ पण्णरसइभागेण
य चंदं पण्णरसमेव तं वरइ । पण्णरसइभागेण य पुणोवि तं चेव वक्कमइ ॥ २७ ॥
एवं वट्ठइ चंदो परिहाणी एव होइ चंदस्स । कालो वा जुण्हो वा एवऽणुभावेण
चंदस्स ॥ २८ ॥ अंतो मणुस्सखेत्ते हवंति चारोवंगा उ उववण्णा । पंचविहा जोइ-
सिया चंदा सूरा गहगणा य ॥ २९ ॥ तेण परं जे सेसा चंदाइच्चगहतारणवत्ता ।
णत्थि गई णवि चारो अवट्टिया ते मुणेयव्वा ॥ ३० ॥ एवं जंबुद्वीवे दुगुणा ल्वणे
चउग्गुणा हुंति । लावणगा य तिगुणिया ससिसूरा धायइसंडे ॥ ३१ ॥ दो चंदा इह
दीवे चत्तारि य सायरे ल्वणतोए । धायइसंडे दीवे वारस चंदा य सूरा य ॥ ३२ ॥
धायइसंडप्पभिइसु उट्ठिद्धा तिगुणिया भवे चंदा । आइल्लचंदसहिया अणंतराणंतरे
खेत्ते ॥ ३३ ॥ रिक्खग्गहतारगं दीवसमुद्दे जहिच्छसी णाउं । तस्ससीहिं तग्गुणियं
रिक्खग्गहतारगं तु ॥ ३४ ॥ बहिया उ माणुसणगस्स चंदसूराणऽवट्टिया
जोण्हा । चंदा अभीइजुत्ता सूरा पुण हुंति पुस्सेहिं ॥ ३५ ॥ चंदाओ सूरस्स य
सूरा चंदस्स अंतरं होइ । पण्णाससहस्साइं तु जोयणाणं अणूणाइं ॥ ३६ ॥ सूरस्स
य २ ससिणो २ य अंतरं होइ । बाहिं तु माणुसणगस्स जोयणाणं सयसहस्सं ॥ ३७ ॥
सूरंतरिया चंदा चंदंतरिया य दिणयरा दित्ता । चित्तंतरलेसागा सुहलेसा मंदलेसा
य ॥ ३८ ॥ अट्ठासीइं च गहा अट्ठावीसं च हुंति णक्खत्ता । एगससीपरिवारो
एत्तो ताराण वोच्छामि ॥ ३९ ॥ छावट्टिसहस्साइं णव चेव सयाइं पंचसयराइं ।

एगससीपरिवारो तारागणकोडिकोडीणं ॥४०॥ ता अंतो मणुस्सखेत्ते जे चंदिमसूरिया गहगणणक्खत्ततारारूवा ते णं देवा किं उद्धोववण्णगा कप्पोववण्णगा विमाणोववण्णगा चारोववण्णगा चारट्टिइया गइरइया गइसमावण्णगा ? ता ते णं देवा णो उद्धोववण्णगा णो कप्पोववण्णगा विमाणोववण्णगा चारोववण्णगा णो चारट्टिइया गइरइया गइसमावण्णगा उद्धामुहकलंबुयापुप्फसंटाणसंठिएहिं जोयणसाहस्सिएहिं तावक्खेत्तेहिं साहस्सिएहिं बाहिराहि य वेउच्चियाहिं परिसाहिं महया ह्यणट्टगीयवाइयतंतीतल्लाल्लुडियघणमुइंगपडुप्पवाइयरवेणं महया उक्किट्टिसीहणाएवलकलरवेणं अच्छं पव्वयरायं पयाहिणावत्तमंडलचारं मेरुं अणुपरियट्टंति, ता तेसि णं देवाणं जाहे इंदे चयइ से कहमियाणिं पकरंति ? ता चत्तारि पंच सामाणियदेवा तं ठाणं उवसंपज्जित्ताणं विहरंति जाव अण्णे इत्थ इंदे उववण्णे भवइ, ता इंदट्टाणे णं केवइएणं कालेणं विरहिए पण्णत्ते ? ता जहण्णेणं इवकं समयं उवक्कोसेणं छम्मासे, ता बहिया णं माणुस्सक्खेत्तस्स जे चंदिमसूरियगह जाव तारारूवा ते णं देवा किं उद्धोववण्णगा कप्पोववण्णगा विमाणोववण्णगा चारट्टिइया गइरइया गहसमावण्णगा ? ता ते णं देवा णो उद्धोववण्णगा णो कप्पोववण्णगा विमाणोववण्णगा णो चारोववण्णगा चारट्टिइया णो गइरइया णो गइसमावण्णगा पक्किट्टगसंटाणसंठिएहिं जोयणसयसाहस्सिएहिं तावक्खेत्तेहिं सयसाहस्सियाहिं बाहिराहिं वेउच्चियाहिं परिसाहिं महया ह्यणट्टगीयवाइय जाव रवेणं दिव्वाइं भोगभोगाइं भुंजमाणा विहरंति, सुहलेसा मंदलेसा मंदायदलेसा चित्तंतरलेसा अण्णोणसमोगादाहिं लेसाहिं कूडा इव ठाणटिया ते पएसे सव्वओ समंता ओभासंति उज्जोवेति तवेति पभासेति, ता तेसि णं देवाणं जाहे इंदे चयइ से कहमियाणिं पकरंति ? ता चत्तारि पंच सामाणियदेवा तं ठाणं तहेव जाव छम्मासे ॥ ९८ ॥ ता पुक्खरवरं णं दीवं पुक्खरोदे णामं समुद्दे वट्टे वल्लयागारसंटाणसंठिए सव्व जाव चिट्टइ, ता पुक्खरोदे णं समुद्दे किं समच्चक्कवालसंठिए जाव णो विसमच्चक्कवालसंठिए, ता पुक्खरोदे णं समुद्दे केवइयं चक्कवालविकखंभेणं केवइयं परिदखेवेणं आहिएति वएजा ? ता संखेजाइं जोयणसहस्साइं आयामविकखंभेणं संखेजाइं जोयणसहस्साइं परिकखेवेणं आहिएति वएजा, ता पुक्खरवरोदे णं समुद्दे केवइया चंदा पभासेंसु वा ३ पुच्छ तहेव, ता पुक्खरोदे णं समुद्दे संखेजा चंदा पभासेंसु वा ३ जाव संखेजाओ तारागणकोडिकोडीओ सोभं सोभेसु वा ३ । एएणं अमिल्लवेणं

वरुणवरे दीवे वरुणोदे समुद्दे ४ खीरवरे दीवे खीरवरे समुद्दे ५ घयवरे दीवे पओदे समुद्दे ६ खोयवरे दीवे खोओदे समुद्दे ७ णंदिस्सरे दीवे णंदिस्सरवरे समुद्दे ८ अरुणोदे दीवे अरुणोदे समुद्दे ९ अरुणवरे दीवे अरुणवरे समुद्दे १० अरुणवरोभासे दीवे अरुणवरोभासे समुद्दे ११ कुंडले दीवे कुंडलोदे समुद्दे १२ कुंडलवरे दीवे कुंडलवरोदे समुद्दे १३ कुंडलवरोभासे दीवे कुंडलवरोभासे समुद्दे १४ सव्वेसिं विक्खंभपरिक्खेवो जोइसाइं पुक्खरोदसागरसरिसाइं । ता कुंडलवरोभासणं समुद्दं रुयए दीवे वट्टे वलयागारसंठाणसंठिए सव्वओ जाव चिड्डइ, ता रुयए णं दीवे किं समचक्कवाल जाव णो विसमचक्कवालसंठिए, ता रुयए णं दीवे केवइयं समचक्कवाल-विकखंभेणं केवइयं परिक्खेवेणं आहिएति वएज्जा ! ता असंखेज्जाइं जोयणसह-स्साइं चक्कवालविकखंभेणं असंखेज्जाइं जोयणसहस्साइं परिक्खेवेणं आहिएति वएज्जा, ता रुयगे णं दीवे केवइया चंदा पभासेंसु वा ३ पुच्छा, ता रुयगे णं दीवे असं-खेज्जा चंदा पभासेंसु वा ३ जाव असंखेज्जाओ तारागणकोडिकोडीओ सोमं सोमैंसु वा ३, एवं रुयगे समुद्दे रुयगवरे दीवे रुयगवरोदे समुद्दे रुयगवरोभासे दीवे रुयग-वरोभासे समुद्दे, एवं तिपडोयारा णेयव्वा जाव सूरु दीवे सूरुदे समुद्दे सूरुवरे दीवे सूरुवरे समुद्दे सूरुवरोभासे दीवे सूरुवरोभासे समुद्दे, सव्वेसिं विक्खंभपरिक्खेवजोइ-साइं रुयगवरोभासे सरिसाइं, ता सूरुवरोभासोदण्णं समुद्दं देवे णामं दीवे वट्टे वलया-गारसंठाणसंठिए सव्वओ समंता संपरिक्खित्ताणं चिड्डइ जाव णो विसमचक्कवाल-संठिए, ता देवे णं दीवे केवइयं चक्कवालविकखंभेणं केवइयं परिक्खेवेणं आहिएति वएज्जा ! ता असंखेज्जाइं जोयणसहस्साइं चक्कवालविकखंभेणं असंखेज्जाइं जोयण-सहस्साइं परिक्खेवेणं आहिएति वएज्जा, ता देवे णं दीवे केवइया चंदा पभासेंसु वा ३ पुच्छा तहेव, ता देवे णं दीवे असंखेज्जा चंदा पभासेंसु वा ३ जाव असं-खेज्जाओ तारागणकोडिकोडीओ० सोमैंसु वा ३ । एवं देवोदे समुद्दे णागे दीवे णागोदे समुद्दे जक्खे दीवे जक्खोदे समुद्दे भूए दीवे भूओदे समुद्दे सयंभुरमणे दीवे सयंभुरमणे समुद्दे सव्वे देवदीवसरिसा ॥ ९९-१००-१०१ ॥ एगूणवीसइमं पाहुडं समत्तं ॥१६॥

वीसइमं पाहुडं

ता कइं ते अणुभावे आहिएति वएज्जा ! तत्थ खलु इमाओ दो पडिवत्तीओ पणत्ताओ, तं०-तत्थेगे एवमाइंसु-ता चंदिमसूरिया णं णो जीवा अजीवा णो घणा

झुसिरा णो बादरबोंदिधरा कलेवरा णत्थि णं तेसिं उट्टाणेइ वा कम्मेइ वा दलेइ वा
 वीरिएइ वा पुरिसक्कारपरक्कमेइ वा ते णो विज्जुं ल्वंति णो असणिं ल्वंति णो
 थणियं ल्वंति, अहे य णं वायरे वाउकाए संमुच्छइ अहे य णं वायरे वाउकाए
 संमुच्छित्ता विज्जुंपि ल्वंति असणिंपि ल्वंति थणियंपि ल्वंति एगे एवमाहंसु १, एगे
 पुण एवमाहंसु—ता चंदिमसूरिया णं जीवा णो अजीवा घणा णो झुसिरा बादर-
 बुंदिधरा कलेवरा अत्थि णं तेसिं उट्टाणेइ वा० ते विज्जुंपि ल्वंति ३ एगे एवमाहंसु २,
 वयं पुण एवं वयामो—ता चंदिमसूरिया णं देवा महिद्धिया जाव महाणुभागा वर-
 वत्थधरा वरमल्लधरा० वराभरणधारी अवोच्छित्तिणयट्टयाए अण्णे चयंति अण्णे
 उववज्जंति० ॥१०२॥ ता कहं ते राहुकम्मे आहिएति दएज्जा? तत्थ रूळु इमाओ
 दो पडिवत्तीओ पण्णत्ताओ, तं०—तत्थेगे एवमाहंसु—ता अत्थि णं से राहू देवे जे
 णं चंदं वा सूरं वा गिण्हइ एगे एवमाहंसु १, एगे पुण एवमाहंसु—ता णत्थि णं
 से राहू देवे जे णं चंदं वा सूरं वा गिण्हइ० २, तत्थ जे ते एवमाहंसु—ता अत्थि
 णं से राहू देवे जे णं चंदं वा सूरं वा गिण्हइ, ते एवमाहंसु—ता राहू णं देवे चंदं
 वा सूरं वा गेण्हमाणे बुद्धंतेणं गिण्हित्ता बुद्धंतेणं मुयइ बुद्धंतेणं गिण्हित्ता मुद्धंतेणं
 मुयइ मुद्धंतेणं गिण्हित्ता मुद्धंतेणं मुयइ, वामभुयंतेणं गिण्हित्ता वामभुयंतेणं मुयइ
 वामभुयंतेणं गिण्हित्ता दाहिणभुयंतेणं मुयइ दाहिणभुयंतेणं गिण्हित्ता बमभुयंतेणं
 मुयइ दाहिणभुयंतेणं गिण्हित्ता दाहिणभुयंतेणं मुयइ, तत्थ जे ते एवमाहंसु—ता
 णत्थि णं से राहू देवे जे णं चंदं वा सूरं वा गेण्हइ, ते एवमाहंसु—तत्थ णं इमे
 पण्णरस कसिणपोग्गला प०, तं०—सिंघाणए जडिलए खरए खयए अंजणे खंजणे
 सीयले हिमसीयले केलासे अरुणामे परिजए णमसूरए कडिलए पिंगलए राहू, ता
 जया णं एए पण्णरस कसिणा पोग्गला सया चंदस्स वा सूरस्स वा लेसाणुबद्धचारिणो
 भवंति तया णं माणुसल्लोयंसि माणुसा एवं वयंति—एवं खलु राहू चंदं वा सूरं वा
 गेण्हइ २, ता जया णं एए पण्णरस कसिणा पोग्गला णो सया चंदस्स वा सूरस्स
 वा लेसाणुबद्धचारिणो भवंति तया णं माणुसल्लोयस्मि मणुस्सा एवं वयंति—एवं खलु
 राहू चंदं वा सूरं वा गेण्हइ०, एए एवमाहंसु, वयं पुण एवं वयामो—ता राहू णं
 देवे महिद्धिए० महाणुभावे वरवत्थधरे जाव वराभरणधारी, राहुस्स णं देवस्स णव
 णामधेज्जा प०, तं०—सिंघाणए जडिलए खरए खेत्तए दहूरे मगरे मच्छे कच्छमे
 किण्हसप्पे, ता राहुस्स णं देवस्स विमाणा पंचवण्णा प०, तं०—किण्ह। णीला लोहिया
 हालिहा सुक्किल्ला, अत्थि कालए राहुविमाणे खंजणवण्णाभे प०, अत्थि णीलए

राहुविमाणे लाउयवण्णामे पण्णत्ते, अत्थि लोहिए राहुविमाणे मंजिद्धावण्णामे पण्णत्ते, अत्थि हाल्लिए राहुविमाणे हाल्लिद्धावण्णामे प०, अत्थि सुक्किल्लिए राहुविमाणे भासरासिवण्णामे प०, ता जया णं राहुदेवे आगच्छमाणे वा गच्छमाणे वा विउव्वेमाणे वा परियारेमाणे वा चंदस्स वा सूरस्स वा लेस्सं पुरत्थिमेणं आवरित्ता पच्चत्थिमेणं वीईवयइ तया णं पुरत्थिमेणं चंदे वा सूरे वा उवदंसेइ पच्चत्थिमेणं राहु, जया णं राहुदेवे आगच्छेमाणे वा गच्छेमाणे वा विउव्वेमाणे वा परियारेमाणे वा चंदस्स वा सूरस्स वा लेसं दादिणेणं आवरित्ता उत्तरेणं वीईवयइ तया णं दाहिणेणं चंदे वा सूरे वा उवदंसेइ उत्तरेणं राहु, एएणं अमिल्लावेणं पच्चत्थिमेणं आवरित्ता पुरत्थिमेणं वीईवयइ उत्तरेणं आवरित्ता दाहिणेणं वीईवयइ जया णं राहु देवे आगच्छमाणे वा गच्छमाणे वा विउव्वेमाणे वा परियारेमाणे वा चंदस्स वा सूरस्स वा लेसं दाहिणपुरत्थिमेणं आवरित्ता उत्तरपच्चत्थिमेणं वीईवयइ तया णं दाहिणपुरत्थिमेणं चंदे वा सूरे वा उवदंसेइ उत्तरपच्चत्थिमेणं राहु, जया णं राहु देवे आगच्छमाणे वा गच्छमाणे वा विउव्वमाणे वा परियारेमाणे वा चंदस्स वा सूरस्स वा लेसं दाहिणपच्चत्थिमेणं आवरित्ता उत्तरपुरत्थिमेणं वीईवयइ तया णं दाहिणपच्चत्थिमेणं चंदे वा सूरे वा उवदंसेइ उत्तरपुरत्थिमेणं राहु, एएणं अमिल्लावेणं उत्तरपच्चत्थिमेणं आवरेत्ता दाहिणपुरत्थिमेणं वीईवयइ, उत्तरपुरत्थिमेणं आवरेत्ता दाहिणपच्चत्थिमेणं वीईवयइ, ता जया णं राहु देवे आगच्छमाणे वा० चंदस्स वा सूरस्स वा लेसं आवरेमाणे चिट्ठइ (आवरेत्ता वीईवयइ), तया णं मणुस्सल्लोए मणुस्सा वयंति—एवं खलु राहुणा चंदे वा सूरे वा गहिए०, ता जया णं राहु देवे आगच्छमाणे वा० चंदस्स वा सूरस्स वा लेसं आवरेत्ता पासेणं वीईवयइ तया णं मणुस्सल्लोयंमि मणुस्सा वयंति—एवं खलु चंदेण वा सूरेण वा राहुस्स कुच्छी मिण्णा०, ता जया णं राहुदेवे आगच्छमाणे वा चंदस्स वा सूरस्स वा लेसं आवरेत्ता पच्चोसक्कइ तया णं मणुस्सल्लोए मणुस्सा वयंति—एवं खलु राहुणा चंदे वा सूरे वा वंते० राहुणा०२, ता जया णं राहु देवे आगच्छमाणे वा० चंदस्स वा सूरस्स वा लेसं आवरेत्ता मज्झंमज्झेणं वीईवयइ तया णं मणुस्सल्लोए मणुस्सा वयंति० राहुणा चंदे वा सूरे वा वीइयरिए० राहुणा०२, ता जया णं राहु देवे आगच्छमाणे० चंदस्स वा सूरस्स वा लेसं आवरेत्ताणं अहे सपक्खिं सपडिदिसिं चिट्ठइ तया णं मणुस्सल्लोयंसि मणुस्सा वयंति० राहुणा चंदे वा घत्थे० राहुणा० २। ता

कइविहे णं राहू प० ? ता दुविहे प०, तं०-धुवराहू य पव्वराहू य, तत्थ णं जे से धुवराहू मे णं बहुलपक्खस्स पाडिंवेए पण्णरसइभागेणं भागं चंदस्स लेसं आवरे-माणे० चिद्धइ, तं०-पट्टमाए पट्टमं भागं जाव पण्णरसमं भागं, चरमे समए चंदे रत्ते भवइ, अवसेसे समए चंदे रत्ते य विरत्ते य भवइ, तमेव सुक्कपक्खे उवदंसेमाणे २ चिद्धइ, तं०-पट्टमाए पट्टमं भागं जाव चंदे विरत्ते भवइ, अवसेसे समए चंदे रत्ते य विरत्ते य भवइ, तत्थ णं जे से पव्वराहू से जहण्णेणं छण्हं मासाणं, उवकोसेणं बायालीसाए मासाणं चंदस्स अडयालीसाए संवच्छराणं सूरस्स ॥ १०३ ॥ ता कहं ते चंदे ससी २ आहिएति वएजा ? ता चंदस्स णं जोइसिंदस्स जोइसरण्णे मियंके विमाणे कंता देवा कंताओ देवीओ कंताइं आसणसयणखंभंभंडमत्तौवगरणाइं अप्पणावि य णं चंदे देवे जोइसिंदे जोइसराया सोमे कंते सुभगे पियदंसणे सुरूवे ता एवं खलु चंदे ससी चंदे ससी आहिएति वएजा । ता कहं ते सूरिए आइच्चे सूरै २ आहिएति वएजा ? ता सूराइया णं समयाइ वा आवलियाइ वा आणापाणूइ वा थोवेइ वा जाव उस्सप्पिणिओसप्पिणीइ वा, एवं खलु सूरै आइच्चे २ आहिएति वएजा ॥ १०४ ॥ ता चंदस्स णं जोइसिंदस्स जोइसरण्णे कइ अग्गमहिसीओ पण्णत्ताओ ? ता चंदस्स० चत्तारि अग्गमहिसीओ पण्णत्ताओ, तं०-चंदप्पभा दोसिणाभा अच्चिमाली पभंकरा, जहा हेट्ठा तं चेव जाव णो चेव णं मेहुणवत्तिर्य, एवं सूरस्सवि णेयव्वं, ता चंदिमसूरिया णं जोइसिंदा जोइसरायाणो केरिए कामभोगे पच्चणुभवमाणा विहरंति ? ता से जहाणामए-केइ पुरिसे पट्टमजोव्वणुट्ठाणवल्लसमत्थे पट्टमजोव्वणुट्ठाणवल्लसमत्थाए भारियाए सद्धिं अचिरवत्तविवाहे अत्थत्था अत्थगवे-सणयाए सोलसवासविप्पवसिए से णं तओ लद्धे कयकज्जे अणइसमग्गे पुणरवि णियघरं हव्वमागए ण्हाए कयवल्लिकम्मे कयकोउयमंगलपायाच्छित्ते सुद्धप्पावेसाइं मंगलाइं वत्थाइं पवरपरिहिए अप्पमहग्घाभरणालंकियसरिरे मणुण्णं थालीपागसुद्धं अट्टारसवंजणाउलं भोयणं भुत्ते समाणे तंसि तारिसगंसि वासघरंसि अंतो बाहिरओ दूमियघट्टमट्ठे विचित्तउल्लोयचिल्लियतले बहुसमसुविभत्तभूमिभाए मणिरयण-पणासियंघयारे कालागरुपवरकुंदुरुक्कतुरुक्कधूवमघमघंतगंधुद्धुयाभिरामे सुगंधवरगंधिए गंधवट्ठिभूए तंसि तारिसगंसि सयणिज्जंसि दुहओ उण्णए मज्झोणयगंभीरे-साल्लिगणवट्ठिए पण्णत्तगंडविब्बोयणे सुरम्मे गंगापुल्लिगवाल्लयाउद्दाल्लसाल्लिए सुवि-रइयरयत्ताणे ओयवियलोमियलोमदुगूलमट्ठपडिच्छायणे रत्तंसुयसंबुडे सुरम्मे आई-णगरूयबूरगवगीयतूल्लासे सुगंधवरकुमुमत्तुण्णसयणोवयारकल्लिए ताए तारिसाए

भारियाए सद्धिं त्रिंगारागारचारुवेसाए संगयगयहसियभणियचिद्वियसंलावविलासणि-
उगजुत्तोवयारकुसलाए अणुरत्ताविरत्ताए मणाणुकूलाए एगंतरइपसत्ते अण्णत्थ कच्छइ
मणं अकुव्वमाणे इट्ठे सदफरिसरसरुवगंधे पंचविहे माणुस्सए कामभोगे पच्चणुभव-
माणे विहरिजा, ता से णं पुरिसे विउसमणकालसमयंसि केरिसयं सायासोक्खं पच्चणु-
भवमाणे विहरइ ? उरालं समणाउसो !, ता तस्स णं पुरिसस्स कामभोगेहितो एत्तो
अणंतगुणविसिद्धतरा चेव वाणमंतराणं देवाणं कामभोगा, वाणमंतराणं देवाणं काम-
भोगाहितो अणंतगुणविसिद्धतरा चेव असुरिदवज्जियाणं भवणवासीणं देवाणं कामभोगा
असुरिदवज्जियाणं० देवाणं कामभोगेहितो अणंतगुणविसिद्धतरा चेव असुरकुमाराणं
इंदभूयाणं देवाणं कामभोगा, असुरकुमाराणं० देवाणं कामभोगेहितो० गहगण-
णक्खत्ततारारूवाणं कामभोगा, गहगणणक्खत्ततारारूवाणं कामभोगेहितो अणंतगुण-
विसिद्धतरा चेव चंदिमसूरियाणं देवाणं कामभोगा, ता एरिसए णं चंदिमसूरिया
जोइसिंदा जोइसरायाणो कामभोगे पच्चणुभवमाणा विहरंति ॥ १०५ ॥ तत्थ खलु
ईमे अट्ठासीई महग्गहा पण्णत्ता, तं०—इंगालए वियालए लोहियंके सणिच्छरे आहु-
णिए पाहुणिए कणे कणए कणकणए कणवियाणए १० कणगसंताणे सोमे सहिए
आसासणे कज्जोवए कव्वरए अयकरए दुंदुभए संखे संखणाभे २० संखवण्णाभे कंसे
कंसणाभे कंसवण्णाभे णीले णीलेभासे रुप्पे रुप्पोभासे भासे भासरासी ३० तिले
तिलपुप्फवण्णे दगे दगवण्णे काए बंधे इंदग्गी धूमकेऊ हरी पिंगलए ४० बुहे
सुकके बहस्सई राहू अगत्थी माणवए कामफासे धुरे पमुहे वियडे ५० विसंधी कप्पे-
ल्लए पइल्ले जडियालए अरुणे अग्गिल्लए काले महाकाले सोत्थिए सोवत्थिए ६०
वद्धमाणे पलंबे णिच्चालोए णिच्चुज्जोए सयंपभे ओभासे सेयंकरे खेमंकरे आभं-
करे पभंकरे ७० अरए विरए असोणे विसोणे विमले विवत्ते विवत्थे विसाले साले
सुव्वए ८० अणियट्ठी अणाविए एगजडी दुजडी कक्करिए रायगले पुप्फकेऊ
भावकेऊ ८८ ॥१०६॥ **वीसइमं पाहुडं समत्तं ॥२०॥**

इइ एस पाहुडत्था अभव्वजणहिययदुल्लहा इणमो । उक्कित्तिया भगवया जोइ-
सरायस्स पण्णत्ती ॥१॥ एस गहियावि संता थद्धे गारवियमाणिपडिणीए । अवहुस्सुए
ण देया तव्विवरीए भवे देया ॥ २ ॥ सद्धाधिइउट्ठाणुच्छाहकम्मबलवीरियपुरिसका-
रेहिं । जो सिक्खिओवि संतो अभायणे परिकहेजाहि ॥ ३ ॥ सो पवयणकुल्लाण-
संग्रवाहिरों णाणविणयपरिहीणो । अरहंतथेरगणहरमेरं किर होइ बोलीणो ॥ ४ ॥

तम्हा धिइउट्टाणुच्छाहकम्मबलवीरियसिक्खियं णाणं । धारेयत्वं णियमा ण य
 अविणीएसु दायत्वं ॥५॥ वीरवरस्स भगवओ जरमरणकिलेसदोसरहियस्स । वंतामि
 विणयपणओ सोक्खुप्पाए रया पाए ॥ ६ ॥ १०७ ॥

॥ चंदपणत्ती समत्ता ॥



सूरियपण्णत्ती

णमो अरिहंताणं णमो सिद्धाणं णमो आयरियाणं णमो उवज्झायाणं णमो लोए सव्वसाहूणं । तेणं कालेणं तेणं समएणं मिहिला णामं णयरी होत्था रिद्धत्थिमिय-समिद्धा पमुइयजणजाणवया जाव पासादीया ४ ॥ तीसे णं मिहिलाए णयरीए बहिया उत्तरपुरत्थिमे दिसीभाए माणिभद्दे णामं चेइए होत्था वण्णओ । तीसे णं मिहिलाए णयरीए जियसत्तु णामं राया होत्था वण्णओ । तस्स णं जियसत्तुस्स रण्णो धारिणी णामं देवी होत्था वण्णओ । तेणं कालेणं तेणं समएणं तम्मि माणिभद्दे चेइए सामी समोसढे, परिसा णिग्गया, धम्मो कहिओ, परिसा पडिगया जाव राया जामेव दिसिं पाउभूए तामेव दिसिं पडिगए ॥१॥ तेणं कालेणं तेणं समएणं समणस्स भगवओ महावीरस्स जेढ्ढे अंतेवासी इंदभूई णामं अणगारे गोयमे गोत्तेणं सत्तुस्सेहे समचउ-रंसंठाणसंठिए वज्जरिसहणारायसंघयणे जाव एवं वयासी-कइ मंडलाइ वच्चइ १, तिरिच्छा किं च गच्छइ २ । ओभासइ केवइयं ३, सेयाई किं ते संटिई ४ ॥१॥ कहिं पडिहया लेसा ५, कहिं ते ओयसंटिई ६ । के सूरियं वरयए ७, कहं ते उदयसंटिई ८ ॥२॥ कहं कट्ठा पोरिसिच्छाया ९, जोगे किं ते व आहिए १० । किं ते संवच्छराणाई ११, कइ संवच्छराइ य १२ ॥ ३ ॥ कहं चंदमसो बुद्धी १३, कया ते दोसिणा बहू १४ । केइ सिग्घगई बुत्ते १५, कहं दोसिणलक्खणं १६ ॥४॥ चयणोववाय १७ उच्चत्ते १८, सूरिया कइ आहिया १९ । अणुभावे के व संवुत्ते २०, एवमेयाइं वीसई ॥५॥२॥ बद्धोवद्धी मुहुत्ताणं १, अद्धमंडलसंटिई २ । के ते चिण्णं परियरइ ३, अंतरं किं चरंति य ४ ॥६॥ उग्गाहइ केवइयं ५, केवइयं च विकंपइ ६ । मंडलाण य संठाणे ७, विक्खंभो ८ अट्ट पाहुडा ॥७॥ छप्यं च य सत्तेव य अट्ट तिण्णि य हवंति पडिवत्ती । पट्टमस्स पाहुडस्स हवंति एयाउ पडिवत्ती ॥८॥३॥ पडिवत्तीओ उदए, तहा अत्थमणेसु य । मियवाए कण्णकला, मुहुत्ताण गईइ य ॥९॥ णिक्खममाणे सिग्घगई, पविसंते मंदगईइ य । दुलसीइसयं पुरिसाणं, तेसिं च पडिवत्तीओ ॥१०॥ उदयम्मि अट्ट भणिया भेयग्घाए दुवे य पडिवत्ती । चत्तारि मुहुत्तगईए हुंति तइयम्मि पडिवत्ती ॥११॥४॥ आवलिय १ मुहुत्तगो २,

एवं भागा य ३ जोगस्ता ४ । कूलाइं ५ पुण्णमासी ६ य, सण्णिवाए ७ य संटिई
 ८ ॥१२॥ तार(य)ग्गं च ९ णेया य १०, चंदमग्गत्ति ११ आवरे । देवयाण य
 अज्झयणे १२, मुहुत्ताणं णामया इय १३ ॥१३॥ दिवसा राइ वुत्ता य १४, तिहि
 १५ गोत्ता १६ भोयणाणि १७ य । आइच्चवार १८ मासा १९ य, पंच संबच्छरा
 २० इय ॥१४॥ जोइसस्स दाराइं २१, णक्खत्तविजए विय २२ । दसमे पाहुडे
 एए वावीसं पाहुडपाहुडा ॥१५॥५॥ एसो कमविसेसो ताव सूरियपण्ण-
 तीए अवसेसो अपरिसेसो भावियव्वो जहा चंदपण्णत्तीए
 जाव अंतिमा गाहत्ति ॥

॥ सूरियपण्णत्ती समत्ता ॥



